

**SEVENTH LEGISLATIVE ASSEMBLY OF MIZORAM
(TWELFTH SESSION)**

LIST OF BUSINESS

FOR TENTH SITTING ON MONDAY, THE 27th MARCH, 2017
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu LALSAWTA**, Minister to lay on the Table of the House the following :
 - i) Statement on Sixth Monthly Review of the Finance Minister on the Fiscal Position of the Government of Mizoram for the Second Half of 2014-2015 (October, 2014-March, 2015)(As required under Rule 11 of the Mizoram Fiscal Responsibility and Budget Management Rules, 2007).
 - ii) Statement on Sixth Monthly Review of the Finance Minister on the Fiscal Position of the Government of Mizoram for the First Half of 2015-2016 (April, 2015-September, 2015)(As required under Rule 11 of the Mizoram Fiscal Responsibility and Budget Management Rules, 2007).
 - iii) Statement on Sixth Monthly Review of the Finance Minister on the Fiscal Position of the Government of Mizoram for the Second Half of 2015-2016 (October, 2015-March, 2016) (As required under Rule 11 of the Mizoram Fiscal Responsibility and Budget Management Rules, 2007).
3. **Pu B.D. CHAKMA**, Minister to lay on the Table of the House a statement of correction on the reply given on the 20th March, 2017 to Starred Question No. 156, Ballot No.32 asked by **Pu Lalruatkima** regarding “Sericulture Department-in NLUP atanga sum hmuh leh hman dan chungchang”.
4. **Pu LALRUATKIMA**, to lay on the Table of the House the following Statements on Action Taken Reports of Public Accounts Committee:
 - i) Statement of Action Taken on the further recommendation of Public Accounts Committee contained in the 10th Action Taken Report, 2016 relating to Food, Civil Supplies &

Consumer Affairs Department (Ref : Para 2.5, 3.6 and 8.6 of the 10th Action Taken Report).

- ii) Statement of Action Taken on the further recommendation of Public Accounts Committee contained in the 17th Action Taken Report, 2016 relating to Industries Department (Geology & Mining Wing) (Ref : Para 1.8 of the 17th Action Taken Report).
- iii) Statement of Action Taken on the further recommendation of Public Accounts Committee contained in the 18th Action Taken Report, 2016 relating to Public Works Department (Ref : Para 1.9 of the 18th Action Taken Report).
- iv) Statement of Action Taken on the further recommendation of Public Accounts Committee contained in the 9th Action Taken Report, 2016 relating to Higher & Technical Education Department (Ref : Para 3.6 and 9.6 of the 9th Action Taken Report).
- v) Statement of Action Taken on the further recommendation of Public Accounts Committee contained in the 11th Action Taken Report, 2016 relating to Environment, Forest & Climate Change Department (Ref : Para 1.13 of the 11th Action Taken Report).
- vi) Statement of Action Taken on the further recommendation of Public Accounts Committee contained in the 14th Action Taken Report, 2016 relating to School Education Department (Ref : Para 1.4, 3.6 and 5.4 of the 14th Action Taken Report).

LEGISLATIVE BUSINESS

Bill for introduction, consideration and passing

- 5. **Pu ZODINTLUANGA**, Minister to beg leave of the House to introduce “The Mizoram Street Vendor (Protection of Livelihood and Regulation of Street Vending) (Repeal) Bill, 2017”.

ALSO

***to introduce the Bill
to move that the Bill be taken into consideration***

AND

to move that the Bill be passed.

FINANCIAL BUSINESS

DISCUSSION AND VOTING ON DEMANDS

- 6. **Pu R. LALZIRLIANA**, Minister to submit to the vote of the House various Demands under his charge.
- 7. **Pu P.C. LALTHANLIANA**, Minister to submit to the vote of the House various Demands under his charge.

NGURTHANZUALA
Secretary

S P E A K E R : Finna hi himna a ni si, Tangka sum himna a ni bawk;

Thuhrltu 7:12

Zawhna no. 124-na ah kan kal ang a, zawhna neitu member zahawm tak Pu Vanlalzawma i lo sawm ang.

Pu VANLALZAWMA : Pu Speaker ka lawm e, Minister zahawm tak for Labour, Employment & Industrial Training Department chhan atana ka zawhna chu heng hi a ni –

- a) MYC hmalakna in Mizoram pawn ah lehkha zirtur thalai engzatnge tirhchhuah an nih tawh?
- b) Eng zirturin nge tirh chhuah an nih?
- c) A senso engzatnge?

S P E A K E R : Chief Minister zahawm tak Pu Lal Thanhawla chhang turin i lo sawm ang

Pu LAL THANHAWLA, CHIEF MINISTER : Pu Speaker, member zahawm tak Pu Vanlalzawma zawhna –

- a) MYC hmalakna in Mizoram pawn ah lehkha zirtur thalai engzatnge tirhchhuah a nih tawh tih hi MYC in Mizoram pawnah lehkha zirtur tlai tirhchhuah a neilo
- b) Eng zir turin nge tirh chhuah an nih tih chu tirhchhuah an nei lo
- c) A senso engzatnge tih chu senso a awm lo, tirhchhuah an neih loh avangin Pu Speaker

S P E A K E R : Zawhbelhna, a neitu Pu Zawma

Pu VANLALZAWMA : Pu Speaker, thil kan lo hre sual deuh a nih dawn chu, kan MYC Chairman ni thin Pu Sangkunga kha Youth Commission Chairman i nih meuh chuan thalai hote i tir chhuak zung zung mai te ka lo ti a. A ni lahin heng atan hian kan state budget hi kan hmang lo va a ti mai si a, engpawh nisela thalai engemaw zat kha chu ram pawnah thil zir turin kan tir chhuak tih kha chu kan hre vek a. Pu Speaker, a remchang a nih chuan kan Minister zahawm tak khan khang kha eng pawisaa tirhchhuah nge ni a, engzatnge senso a nih tihte kha min hrilh thei tho em? Eng department tirhchhuah nge tihte pawh kan lo hre fuh chiahlo te pawh a ni thei a.

S P E A K E R : Chief Minister i sawm ang.

Pu LAL THANHAWLA, CHIEF MINISTER : An ni hian Agency
 hrang hrang nena in siam remin placement an zawn sak thin a ni. A bikin tunah tak hi chuan Hospitality lamah te, Aviation-ah te hei tunah pawh hian Airlines-a thawkte (Jet Airways niin ka hre ta), an lo kal dawn a, Air Hostess tur te an rawn zawng dawn a, khang kha an lo pui a, an lo negotiate a, an lo tanpui thin a, a tam thei ang ber min laksak theihna turin. Tunah hian a hranpa ve hrim hrimin MYC pawh ni lo Japanese Embassy leh helai tualchhung mite thahnem ngaihna in private negotiation-in an bei a. University of Kokoro te nen tunah hian inbiakna tha tak kan nei a, Japan ramah work course a tlem avangin thalai engemaw zat an duh a. Tunah hian anmahni pawhin Aizawlah ngei Japanese language, working knowledge an neih theihna turin language teacher te pawh an awm tir tawh a, tum hnih tum thum thalaite an zirtir a. Working knowledge an nei tawk tawh a an hriatah kan thawn chho a. An chhung ten engemaw indemnity bond ang deuh sign in tiang chuan tunah khian an awm a, eng eng emaw sawi neuh neuhte a awm avangin Japan rama Indian Embassy-a kan Consulate General awm te Mizo te an lo awm hlauh a. Tin, ka fanu te thiante pawh an lo awm a, chung chu ‘va tlawh ula, va ascertain teh u’ kan ti a. Mi thenkhat awmtha duh lo pahnih khat te an awm a, chungte chuan complaint te an rawn siam avangin. Amaherawhchu a dang ho kha chu an hlim khawp a, thlalak te an rawn thawn a, tunah hian helam panga tangkai tak pakhat College Lecturer amah ngei han en turin a han kal a. An thlalak te an rawn thawn a, an hlim hle a, chutih rual chuan hetiang zingah hian a tha vaklo te an lo awm ve leh hlauh thin a, ngun taka thlan an ni chung pawhin.

Tichuan tunah hian mi pathum leiba tam tak nei tlanbo an awm a, chungte chu engtinne sorkarin kan tih ang tih kan la ngaihtuah mek a ni. Mizo hming min ti chhe ve hrim hrim a; tin, a tam thei ang ber an la duh a tunah hian, amaherawhchu fimkhur a ngaih avangin kan pawng thawn chhoh mai mai lo a ni. Tin, sorkarin a mawh thui tak a phurh dawn avangin an chhungkhat te mawh phurtu tur te pawh in be rema in hriat tirin chutiang chuan fimkhur takin kan kal a, thalai a sawm tel tunah khian an awm a, Japanese language an zir belh leh a, working knowledge piah lamah an thiam tawka an hriat kha chuan placement tha tak vek an pe a. Tin, an zir lai pawhin an enkawl tha hle a, an hlim hle a ni tih kan hria a, chutianga kan thawn bak hi chu MYC atang hi chuan thawn an awmlo a ni, Pu Speaker.

S P E A K E R : Pu Ruatkima khan zawhna a siam leh a, Pu Zawma'n a zawt leh ang a,
Pu LALRUATKIMA : Pu Speaker, LE & IT Department hnuia MYC kal tlangin skilled development initiative scheme hrang hrangah training service provider hnenah khan mi engzatnge tirh an nih tawh? Engzatnge VTP kha engzatah nge kan tirh tawh tih kha ka zawh belhna ni sela. Tin, kha Pu Speaker, kan House Leader zahawm takin a sawi a, Japan-ah khan engvanginng NLUP pawisaa training tur kan tirh, eng agency nge kan hman tih kha ka zawhbelhna a ni e.

Pu VANLALZAWMA : Pu Speaker, kha Youth Commission lah chuan zirlai an lo tirchhuak lova. Amaherawhchu kan hriat angin NIAS chungchang te pawh kha kan lo hriat fuh loh vang nge ni Youth Commissioner Chairman te pawh kha bang tur te pawh khan an ti a, party ang khan a office kal turte kha kan dang a. Tichuan zirlai te pawhin an han ti chho ve a, tah chuan banna te pawh kha an thehlut a, pawm a ni ta mai si a. Anmahni in tumah an tirhchhuah bawk si loh chuan kha lai velah khan a banna kan pawm chhan tak te pawh chu hriat te pawh chu a va chakawm ve maw le House Leader-in min chhan theih hlauh chuan Pu Speaker.

S P E A K E R : Pu Beichhua'n zawt law law se

Dr. K.BEICHHUA : Pu Speaker, 2014 Parliament training tura kan kal khan Kolkota-ah kan riak a, chutah chuan kan MYC Chairman ngei kha NIAS te nen zanriah an ei ho in ka hria a. Zirlai in tirh thute pawh kha a sawi ngei a, NIAS-a zirlai 32 te kha MYC tirh an ni em tih pakhatna ni ta se. Pahnihnaah chuan kan MYC Chairman-in zirlai chhuak tur a vai liam thin hi MYC tirh an ni lo tihna em ni tih ka zawhna a ni e.

S P E A K E R : Awle, kha kha zawhna pakhat ah chuan a tawpna ni rih tawh sela, chhang turin Chief Minister i sawm ang.

Pu LAL THANHAWLA, CHIEF MINISTER : Pu Speaker, skill development te, capacity building te hi central sorkar atanga uar tur a ni a, keini pawhin kan uar a. Kan thalai te hi skill lama kan develop that poh leh self employment lamah te pawh an tha dawn tih kan hria a. Tichuan sorkar-in sum remchang kan neih loh chuan NLUP-ah pawh hian skill development leh capacity component kan nei ve tho a. Chu chu sorkarin a puk a ni, hei hi ral mai tur a ni lova, an chhung ten an rulh leh tur a ni. Chutiang chu a ni a, chuvangin thil hlauh thawnawm a ni lo ve tih kan sawi duh a.

Tin, Mizoram Youth Commission Chairman chuan department hrang hrang atangin, ‘hei chutiang khatiang kan tir chhuak dawn a, nang Youth Commission Chairman i ni si a, lo vai liam the’, an tih chuan vai liam zel mai turah ka ngai a, a genuine leh genuine loh kha lo va ascertain kher turah pawh ka ngai lova. Tin, sorkar leh sorkar chu in bum turah pawh ka ngai lova, chuvangin MYC Chairman hian chutiang khatiang chuan kan tir dawn a hei a tha khawp mai, nang i dinhmun nen te pawh a in mil a, min lo vai lian sak teh’, an tih kha chuan a vai liam rigawt kha chu hahthlak lo em a, ti mai zel turah ka ngai a, a lo vai liam te pawh kha tha ka ti. A vailiam te pawh khan incentive encouragement tha tak an nei phah a nih ka ring a ni.

Tin, NIAS (Nalanda Institute of Advance Studies) an tih hi diklo tak khan a rawn ri hluai a, fake a ni lo tih hi a chiang a, fake a ni lo. Tin, member zahawm tak Pu Vanlalzawma te, Pu Ruatkima te pawh an lo va leng a, a lawmawm ka ti a, a fake lo a ni tih hi Zoram mipui in hria sela, amaherawhchu institute tha tak erawh chu a ni lo mai thei a ni tih chu chu helaiah remchangah kan sawi duh a ni e.

Pu T. SANGKUNGA : Pu Speaker, thil hriat sual awma ka hriat vang leh a hma pawhin thil hriat sual vang nge thil mak leh inpuhna dik lo House pawn ah awm nuala ka hriat avangin i phalna in sawifiah ka duh a. Kan MLA tirha Delhi-a training tura kan kal khan Kolkata-ah kan riak a, chaw min eipuitu te kha NIAS an ni lo, Emporium and Consultancy Kolkatta Services an ni. Pu Ruatkima te hian Mizo naupang kan thawnte hi an zirna en an duh a. Emporium hian chaw ei ah min ko a, ka hnra a. Mahse Pu Ruatkima’n, ‘I va ei ang u, a mawh pawh ka la ang e,’ a tih avangin kan vaiin kan va ei a, a mal in ka ei pui awzawng lo. Khatih lai khan NIAS a lang lo hrim hrim. Chaw min eipuitu te hi Emporium ho an ni. Anni hian air hostess pawh 10 (sawm) chuang fe min laksak tawh a. India ram hotel tha ber bera kan nau te min dah sak tute an ni. Khang lai khan NIAS hi a rim pawh kan hre lo reng reng. Zan reia chaw eipui anga inpuh kha chu thil diklo let der a ni. Pu Ruatkima te, Pu Zawma te ka kalpui ngei te hi a hretu an ni, kan kal chen a in an vek avangin. Khami tuma Emporium ten motor-a min rawn hruai an tum pawhin Mizoram House motor kan hmang ang. MLA rual kan kal a ni a, NIAS hi kan la hre lo hrim hrim.

Khatiang thila bandh neih hial te an han sawi tak ah chuan lekhkathawn a lo kal zeuh zeuh a, MYC leh Building and Other Construction Worker Welfare Board te hian zuk endik hmasaa mi tir angin NIAS te hian an rawn ziak ta tlat mai a. Hei hi kan Minister nen pawh kan sawi a. MYC hian endik turin pakhat mah kan thawn in kan tir lova. Mahse skill development initiative scheme-a zirlai sanghnih chuang zet kan tirh chhuah khan kan Minister zahawm tak Pu Lalrinmawia Ralte hian kan tirhna te hi Government of India-a Labour Department-a a khawitu ten VTP rintlak an tih ni mahse endik vek tha kan ti a, kan tirh miah lohna NIAS pawh hi an lo en a ni awm e.

Pu LALRUAKIMA : Pu Speaker, tirh awm lo hian House-ah chhan a ni si a, tirh a awm bawk si a,

Pu T. SANGKUNGA : Tuna kan sawi hi chu skill development initiative scheme a ni a, kan Leader sawi nen hian a dang daih. Chuvangin NIAS-ah hian vawikhatmah endik turin mi kan la tir lova, an building hi eng ang nge tih pawh ka la hre lo reng reng. Chuvangin zan reia chaw ei a inpuh kha chu thil diklo let der a ni tih ka sawi duh a ni. Pu Ruatkima te nen kan ei chu a in zat vek, kan kalna pawh a inang vek. Anmahni rawt a ni a, kei phei chuan ka hreh khawp mai, an pha in ka ring miah lo.

A thu hrim in heng endik tur hian kan la in tir lo hrim hrim. Mahse tuna kan sawi min rawn tihbui lai tak SDIS-a central government-in VTP rintlak ti-a an rawn list te hnena zirlai 2000 vel tirh hi keini MYC (Mizoram Youth Commission) tirh bik pawh a ni lova. Labour and Employment leh Building and Other Construction Worker Welfare Board te nen kan Minister ho a kan rel thlap a ni a, central fund release zawng zawng pawh hi Labour and Employment kut ah a lut vek a, MYC kut ah cheng khat mah a lut lo. Youth Commission hian training tur zawn, mobilization and screening an ti a, Labour and Employment Officer te pawh screening ah hian an tel ziah a ni.

Heng zawng zawng ah hian NIAS a la lang lova, NIAS hian zuk endik hmasa anga min rawn chhuah thin hi thil diklo let der a ni. Hei hi chu tu hmaah pawh sawi ngam a ni. Mahse Minister zahawm tak Pu Lalrinmawia hian SDIS hnuia zirlai kan tirhna VTP te hi Labour and Employment and I T te nen i endik teh ang u. Naupang kan tir hnem si a, lo tha lo leh him lo, harsatna tawk te an lo awm palh takin i endik vek teh ang u tiin a rawt a.

Tichuan Labour and Employment leh MYC te nen Minister zahawm tak room-ah meeting kan nei a. Labour and Employment and IT Director, Labour Officer, Assistant Welfare Commissioner leh Superintendent MYC te endika zin kual turin kan ti a, a tha khawp mai an rawn ti a. Hyderabad-a zirlai thawn/tirh te pawh kan endik tir vek a ni. Tun hnu, hmanni mai a kan buai tak nuaih hnu-a NIAS Chairman in an institute endik anga a ziak hi enge a awmzia tiin ka zawt a. Kan officer pakhat chuan, ‘Khata kan kal pah khan officer 3 (LE + IT Director, Assiatant Welfare Commissioner leh Superintendent MYC) in NIAS hi kan zuk tlawh tel a ni,’ a ti a. NIAS tlawh tura tirh an nih loh avangin kan Minister leh kei chuan kan lo hre reng reng lova. SDIS hnuiai tirhte endik pahin NIAS hi an lo en ve tih tun hnu ah kan hre ve chauh a ni.

Pu LALRUATKIMA : Pu Speaker, clarification ti tu tur chu hon'ble concerned Minister a ni dawn lawm ni. (T.Sangkunga : A chhan chu keimah min puh avangin sawi fel a ngai a ni) NIAS chungchang kan sawi dawn a nih chuan
 (..... interruption.....)

August ni 4, 2015 khan lehkha siam a ni tawh a, NIAS prospectus-ah pawh hian a fee man hi ` 1,48,000/- a ni. ` 4 lakh leh tih kan pe a ni. Clarify zel ang. (Pu John Rotluangliana, Minister: Pu Speaker, hun hi i pe leh ringawt zel a, i rorel dan hi i tih lai deuh chu a ngai a ni.)

(.....Interruption)

Notice of termination kha pe turin an ti daih tawh a, 2105 August khan. Amaherawh chu khami hnu ah khan Notice of termination hi ni 15. Sept. ah hian MYC Secretary hmuh turin, Secretary of Building & Other Constructions hnenah

S P E A K E R : Aw le, thu rih rawh. (Pu T. Sangkunga: Pu Speaker, ka clarify a ngai tlat, mimal taka inpuh a nih avangin.) House Leader a ding laklawh a. Khawngaihin House Leader an din tawh hi chuan midang kha chu tlwmngaih chhuaha that hram hram tur, chu chu House dan a ni. House Leader a ding tawh a, anin a sawi ang a, clarification siam ngai a nih chuan siam phalsak rawh u, a dik emaw dik lo emaw, a Chairman nihna te pawh a ban phahna thil a ni a, ngatinge in phal loh? Dikna nen in phal tur a ni. Clarification a siam ngei ngei tur a ni, a

ban phahna case a ni tlat alawm . Chuvangin hrethiam rawh u, Opposition lam pawh khan in hrethiam tur a ni. Tunah House Leader sawm ang.

Pu LAL THANHAWLA, CHIEF MINISTER : Pu Speaker, a experience tu Minister aia hre zawkta in a chhang a, an ngaihthlak duh si loh chuan sawi tur ka nei lo.

Pu T. SANGKUNGA : Pu Speaker, sawi hi a tul tlat a ni. Chaw eia inpuh phei kha chu thil serious a ni a, NIAS institute awmna hi tun thleng pawh hian ka la hre ve lo a ni. Chuvangin dawta inpuh hi chu a dik lo a ni. Tin, NIAS te nena MoU termination order kha kan tihtir a ni, a chhan chu agreement sign hi kan hrelo reng reng. Minister zahawm tak hian, ‘agreement sign a awm a, pawisa min rawn dil belh a, naupang admission tur te an rawn dil belh tlat mai’, a ti a. A office-ah min ko phei a, Youth Commission atangin kan secretary J.T-a nen kan phei a, kha kha MoU a awm tih kan hriat ve tan na a ni. Minister room-a MoU kan va hmuh khan min surprise em em a. Engatinge MYC hming a tel? Hetah hian mawhphurhna pakhatmah kan nei lo reng reng. Kan remtihna la hmasa lo leh kan hriat loh a MoU-a MYC/Building and Other Construction Worker Welfare Board tih zel, kan hriat loh leh kan remtihna la lo-a an tih avangin a valid lo. MYC aiah hian Synod emaw lo dah ta se kan Synod hian, ‘A! hei kan lo tel reng alawm’, an ti hauh lovang. ‘Kan phalna loa MYC tih an telh avangin mawh kan phur ve ngawt thei lo’, ka ti a...

Pu T. SANGKUNGA : Kan Minister room-ah chiang takin ka sawi a, ‘In hriat loha tih a nih phei chuan termination order hi issue rawh u’, ka ti a. Kan secretary hnenah pawh verbal in, ‘Notice pek pawh a ngai lo, kan remtihna lo leh kan hriat lohva kan hming an ziah tel avangin null and void a ni, kan hriatloh leh remtihna lo in kan hming an hmang thei lo,’ ka ti a. Member zahawm tak duh angin termination order chungchangah clarification ka rawn siam a nih hi. Law leh Finance department te pawh hian mawh an phurh dawn chuan file ah an ‘VET’ thin. MYC pawh in MoU-a mawh kan phur ve dawn a nih chuan a file tal kan hmu ang a, meeting-ah emaw tal kan remtihna a tel tur a ni kan ti a. Kan tel ve miah lohna a nih avangin Minister zahawmtak min hrilh angin hei hi null and void a ni e tiin termination order hi ka ziahtir a. MoU terminate dawn chuan notice thla khat a ngai tih pawh kha kan zawm duh lo a ni, kan hriat loh leh kan remtihna tello a nih avangin. Member zahawm tak Pu Lalruatkima pawh khan

enchiang leh sela termination ti tur chuan one month notice pek tur tih a awm kha. MoU hi kan pawm lo, null and void a ni e tiin notice hi kan ti lo a ni.

Chutiang chu thil awmdan a nih avangin Pu Speaker, helaiah insawifiahna remchang tak ka nei thei a. Member zahawm tak Pu Beichhua, Siaha bialtu in diklo taka mahni a NIAS-a chaw ei ang hiala min puhna te pawh kha min duhsakna avangin point of clarification ka neih theih nan a ti a nih ka ring, min huat vang ni lovin min duhsak vang zawk ah ka ngai. Tuna an rawn sawi chaw ei chungchang ah hi chuan Emporium and Consultancy Services hi Pu Lalruatkima leh Pu Zawma te nen kan ei ho ngei a. Anni hi tun thlenga kan thawhpui rinawm ber, kan House Leader sawi angin an kaihruai na in New York University Assistant Professor pahnih an lo chho a, kan CM hi an va tlawh a, chungte nen chuan Mizoram thalaite training rawn pe in an hmanrua zawng zawng an rawn bun ang a, zirtirtu hlawh an tum bawk ang. MYC-in training tur an zawng ang a, a hmun an tum bawk ang a, annin expenditure an tum ang. An thiam hunah Gulf country-ah hna an zawn sak dawn a ni. Jet Airways-in vawi hnih air-hostess hi MYC office-ah an rawn la tawh a, ni 26.4.2017 hian a vawi thumna tur an rawn la leh dawn a. Mizo ten air-hostess kan nei tlem thin a, kan neih tamna bul pawh hi an ni a ni.

Pu Speaker, Emporium chu kan tlawh chiang khawp mai, mahse MLA thar zin ho kha kan tel dial dial tih erawh chu ka sawi lang duh a ni. Hmanni-a mahni pawh insawifiah theiloa kan inkalh khung reng mai kha chu a zahthlak a, kan puak keh lo chauh a ni. Tunah helaiah min duhsak taka Siaha bialtu Pu Beichhua'n inhrilhfiah theihna hun min siam sak hi lawmawm ka ti. Khang termination order te kha kan tel vang ni lovin a pawisa pek te pawh kha a hnu ah kan hre ve chauh a ni. A vai liamna ah pawh kan MLA zahawm tak Pu John Siamkunga hi Chief Guest a ni a, kei kha chu a va sawitu ve pakhat ka ni mai a, a hotupa ber Pu John Siamkunga kha a lang ve ta mang reng reng lo mai a, amah nen pawh kan sawi thin a, keimah kha a lang zawk ah ka tang zel a. Tin, khatiang vai liam tih pawh kha chhan ngaiin ka hria a, private-a skill training lo tir ho hian Youth Commission hi min sawm nasa a ni, kan va kal zauh zauh hman chauh a, kan hman loh chang a tam. Amaherawhchu, khawiahnge an tirh dawn tih kha kan va thlen hnu ah te kan hre ve chauh zel a ni.

Chuvangin thalai te encourage kan duh avangin hei hi kan sawi thin a. Tin, tunah hian Gulf country-ah engemaw zat kan thawn tawh a (Er. Lalrinawma & Pu

Lalruatkima : A sawi thui tawh mah mah a ni, Pu Speaker.) (Pu Lalruatkima : MoU 4th Aug, 2014-ah sign a ni a, 4th Aug, 2015, a kum khatna chiah ah terminate a ni. MYC hian NIAS hnenah termination hi discontinuation of sending candidates and termination of MoU tiin a thawn a, chutih lai chuan a hnu daih thla khat 15th Sept, 2015-ah hian Secretary, MB and OCWWB hian MYC Secretary hnenah notice of termination hi Minister hova 4th Aug, 2015-a rel angin lo pe rawh u a ti a. An lo in thiar fihlim daih tawh a ni, chuti a nih chuan hei hi L & E mawhphurhna em ni ni dawn...interruption by various members).

Pu Speaker, kan Minister zahawm tak hova ni 4.8.2015-a kan rel angin kan Minister khan Director L&E (Secretary MB and OCWWB) kha notice of termination pe turin nangin MYC hi lo hrilh la. Mahse, min rawn hrilh kha kan nghak peih lo reng reng. A chhan chu kan tel ve lohna ah khatianga notice pek kha a ngai lo reng reng. Kan hriat lohva kan hming kha lo tel a nih avangin Youth Commission hian hei hi kan hre ve lova, kan phalna lak a nih loh avangin mawhphurhna kan nei lova, null & void a ni e kan ti a ni. MoU ang hian termination chu ti dawn ila thla khat notice pek a ngai a ni, thla khat notice kan pek chuan kan tel a ang dawn tlat mai a. Chuvangin kan tel lohna, kan hriat loh a nih avangin MYC Secretary hnenah hetah hian mawh phurhna kan nei lo, thla khat kha nghak reng reng suh, vawiinah ziak nghal rawh ka ti a. Member zahawm tak Pu Lalruatkima rawn sawi ang khan Welfare Board Secretary rawn ziah hmaa kan tih kha, kha pawh kha clarify a ngaih avang khan Pu Speaker, Secretary Welfare Board-in a rawn ziah hmaa kan lo tih nachhan kha chu kan lungawi lo lutuk a, thlakhat notice hi a ngai lo ve, kan tel lo ve, NIAS nena MoU ziahah hian kan tel ve lo ve kan ti hmiah.

Pu LAL THANHAWLA, CHIEF MINISTER : Pu Speaker, member zahawm tak Pu T. Sangkunga chan tur chu ‘dawt a sual tin reng a an hek hunah che i eng ala thawl ang, lawm ula nasa takin hlim rawh u’ tih kha a chan tur a ni.

Pu LALRUATKIMA : Pu Speaker, nichina kan House member L&E changtu in a sawi ang khan NLUP suma Japan kal kha a sawi lang ta sa sa bawk a, Japan-a zirlai tirh kha eng vanga NLUP sum hmang khera tirh nge a nih? Kha kha engvanga NLUP sum hmang kher nge a nih ?

Pu LAL THANHAWLA, CHIEF MINISTER : Pu Speaker, kan duh duh kan hmang thei, khami component kha a awm avangin.

S P E A K E R : Zawhna dangah i kal ang, 125-na zawhna neitu Er. Lalrinawma, MLA zahawm tak i sawm ang.

Er. LALRINAWMA : Pu Speaker, ka lawm e. Horticulture changtu Minister zahawm tak hnena ka zawhna Starred Question 125-na -

- a) Horticulture Department hian Medicined Plant Nursery a nei em ? Lo nei ta se khawi hmunah te nge a neih?
- b) Medicinal Plant Nursery atan hian kum 2015-2017 chhungin cheng engzat nge sen ral a nih ? Ka lawm e.

S P E A K E R : Minister zahawm tak Pu P.C. Lalthanliana chhang turin ilo sawm ang.

Pu P.C. LALTHANLIANA, MINISTER : Pu Speaker, member zahawm tak Er. Lalrinawma zawhna -

- a) Horticulture Department hianin Medicined Plant Nursery a nei em ? Lo nei ta se khawi hmunah te nge a neih tih chhanna chu Horticulture Department hian Medicinal Plant Nursery a nei a. A neihna hmunte chu -

Sl.No.	Location	Division
1.	Thingdawl	Kolasib hnuaih
2.	Maudarh	Lunglei hnuaih
3.	Zawlnuam	Tuidam hnuaih
4.	Champhai & Tuipawl	Khawzawl hnuaih
5.	Serchhip	Serchhip hnuaih
6.	Thiak	Aizawl hnuaih
7.	Tuidam	Tuidam hnuaih

te a ni.

- b) Medicinal Plant Nursery atan hian kum 2015-2017 chhungin cheng engzat nge sen ral a nih tih chhanna chu - Medicinal Plant Nursery atan hian kum 2015-2017 chhungin sum hmuah a nih loh avangin pawisa sen ral a awm lo tih a ni e.

S P E A K E R : Zawhbelhna a neitu Pu Rinawma'n zaws se, Pu Thanliana'n zaws leh law law se.

Er. LALRINAWMA : Pu Speaker ka lawm e. Nursery te hi tikhan enkawl lohvin kan dah mai nge tih kha pakhatna ni sela. A pahnihnaah tun kum 2015-2017 chhung khan heng thlai tiakte hi engzatnge thar chhuah an nih tih kha ka zawt e. Ka lawm e.

S P E A K E R : Pu Lalthanliana'n zawt law law se.

Pu LALTHANLIANA : Pu Speaker, ka lawm e. He project hi Horticulture Department hian a la kengkawh zel dawn nge, enge a dinhmun tih kan zawt duh a ni.

S P E A K E R : A awm tawh loh chuan chhang turin Minister sawm ila.

Pu P.C. LALTHANLIANA, MINISTER : Pu Speaker, zaghna neitu Er. Lalrinawma, member zahawm tak zaghna kha enkawl zui a nih leh nih loh chungchangah chuan National Mission and Medical Plant (NMMP) hnuaia hemi Medicinal Plant atana pawisa hmuh hi 2008, 2009, 2010, 2011 chhung chauhva hmuh a ni a. Chuvang chuan, hemi hnuaiah hi chuan engmah nursery kha enkawl zui hran a ni lova. Amaherawhchu, kan nursery neih angte heng ang hi tih a ni avangin Horticulture Department hrim hrim angin khang nursery kha chu enkawl zui hrim hrim leh hman tangkai a ni a. Chu chu kan enkawl zui dan a ni a. Chungah chuan thlai thar chhuah zat tih leh khang neuh neuh kha chu khatiang kan enkawl zui atang kha chuan han sawi mai theih a ni lova, min lo hrethiam sela.

Tin, tunah hi chuan member zahawm tak Pu Thanliana zaghna ang deuh khan hemi National Mission and Medical Plant hi Horticulture Department hi a nodal-ah min rawn hmang tawh lo niin kan ngai a, Health Department lamah hian a awm tawh zawk a nih hmel.

S P E A K E R : Awle, zaghna dangah kan kal thei a. Zaghna no. 126-na hi mi 4 in an intawm a, Pu Vanlalzawma, Dr. K. Beichhua, Er. Lalrinawma leh Pu Lalruatkima, a hmasa ber Pu Zawma hi an zavaia aiawhin i lo sawm ang.

Pu VANLALZAWMA : Pu Speaker, ka lawm e. Kha tuna kan ngaihthlak tawh ang khan kan zaghna thehluh kha a lo inzul hlawm deuh a nih a rinawm a, an rawn tikhawm ta a. Heng hi kan zaghna te chu a ni. Minister zahawm tak Labour, Employment & Industrial Training Department chhan atan –

- a) Serchhip, Champhai South, Tawi, South Tuipui leh Tuichang Constituency chhungah Mizoram Building & Other Construction Workers Welfare Board sum kum 2013-2014 khan hman a ni em ? A nih chuan engzat nge sum hi hman a nih ?
- b) Mi engzatin nge dawng ?
- c) Mi pakhatin engzat nge a dawn ?
- d) Heng constituency-ah te hian Welfare member engzatnge awm ? Eng atan nge sum hi hman a nih a, engtik niah nge sum hi hman a nih ?
- e) Mizoram Building and Other Construction Worker's Welfare Board te'n inhlawha enzawngte tan sum a khawn labour cess pawisa kum 2011 a din tirh atanga vawiin thlengin cheng engzat nge a hmuh tawh ?
- f) Pawisa hmuh tawh hi cheng engzat nge ni tawh ? Cheng engzat nge a hman tawh ? Hlawhfate hnenah cheng engzat nge a hman ? Thildangah hmanna a awm em ? Awm ta se engah te nge, cheng engzat nge ?
- h) Heng kum 2012-2013, 2013-2014, 2014-2015, 2015-2016, 2016-2017 leh tun kum 2016-2017 kal mekah Mizoram Building and Other Construction Workers Welfare Board sum hmanga tanpuina dawng mi engzat nge awm tih hi ka zawt e. Ka lawm e.

S P E A K E R : Awle, zawhbelhna awm tur zawng zawng te pawh a zawt nghal vek ni tur a ni. Chief Minister zahawm tak chhang turin ilo sawm ang.

Pu LAL THANHAWLA, CHIEF MINISTER : Pu Speaker, member zahawm takte Pu Vanlalzawma, Dr. K. Beichhua, Er. Lalrinawma, Pu Lalruatkima te zighthna

- a) Serchhip, Champhai South, Tawi, South Tuipui leh Tuichang Constituency chhungah Mizoram Building & Other Construction Workers Welfare Board sum kum 2013-2014 khan hman a ni em ? A nih chuan engzat nge sum hi hman a nih tih chhanna chu Assembly Constituency ang zawngin Welfare Board sum hman dan hi chhinchhiah a ni lova. 2013-2014 chhunga sum pek chhuah zat chu `4,51,01,800/- a ni.

- b) Mi engzatin nge dawng tih chhanna chu – Constituency ang zawngin dawngtu chhinchhiahna a awm lo a ni.

- c) Mi pakhatin engzat nge dawn tih chhanna chu Constituency ang zawngin mi pakhatin a dawn zat chhinchhiah a awm loh avangin a zawhna hi constituency ang zawnga zawk a nih bawk si avangin khatiang zawng khan chhinchhiahna a awm lova
- d) Heng constituency-ah te hian Welfare member engzatnge awm ? Eng atan nge sum hi hman a nih a, engtik niah nge sum hi hman a nih tih chu Assembly Constituency ang zawngin welfare member hi chhinchhiah a ni lova, Assembly constituency angin sum hman chhuah dan pawh chhinchhiah a ni hek lo.
- e) Mizoram Building and Other Construction Worker's Welfare Board te'n in hlawha enzawngte tan sum a khawn labour cess pawisa kum 2011 a din tirk atanga vawiin ni thlengin cheng engzat nge a hmuh tawh tih chu - A din tirk atanga tun quarter tawp ni 31.12.2016 thleng khan ₹46,41,30,403/- a hmuh tawh a ni.
- f) Pawisa hmuh tawh hi cheng engzat nge ni tawh ? Cheng engzat nge a hman tawh ? Hlawhfate hnenah cheng engzat nge a hman ? Thildangah hmanna a awm em ? Awm ta se engah te nge, cheng engzat nge chhanna chu - Pawisa hmuh tawh hi ₹46,41,403/-

Pu LAL THANHAWLA , CHIEF MINISTER : Pawisa hman tawh zat chu ₹ 23,83,28,443/-, hlawhfa te hnenah ₹5,61,01,020/- hman a ni tawh. Capacity building atan te, Administration atan te ₹18,22,27,423/- hman a ni.

Tun dinhmunah Labour Cess tling khawm hman loh cheng engzatnge awm tih chhanna chu –

- g) Quarter tawp ni 31.12.2016 thleng khan ₹22,58,01,960/- hman loh a la awm.
- h) Heng kum 2012-2013, 2013-2014, 2014-2015, 2015-2016, 2016-2017 leh tun tun kum 2016-2017 kal mekah Mizoram Building and Other Construction Workers Welfare Board sum hmanga tanpuina dawng mi engzatnge awm tih chhanna chu –

Welfare Board sum hmanga tanpuina dawng mi 16672 an awm tawh. An vai hian in register vek an ni e, Pu Speaker, ka lawm e.

S P E A K E R : Zawhbelhna Pu K.Beichhua.

Dr. K. BEICHHUA : Pu Speaker, ka lawm e. Minister khan constituency wise in an chhinchhiah lem lo tih a sawi a, chhinchhiah duh chuan a chhinchhiah ve theih tho va.

Ka zawhbelhna chu -

- 1) Mizoram Building and other Construction Welfare Board-a inziak lut te leh an fate tana tanpuina chi engzatnge awm ?
- 2) Kum 2015-2016, 2016-2017 chhungin inziak lut fate zirna atana tanpuina pek thin tih tawp a ni em? Tihtawp ni se engnge a chhan ?
- 3) Death benefit ah mi engzatnge he pawisa atanga pek an nih?

S P E A K E R : A tam tawk em, hetah pawh hian zawhbelhna a tel teuh tawh a nia, Er. Lalrinawma.

Er. LALRINAWMA : Pu Speaker, ka zawhna chu a constituency ang hian min chhang lo a nih kha, heng kan pek te hi address an nei lo nge khua a awm lo nge ? Duh ni se chuan constituency wise in khua a awm vek a. A diltu te pawh khua a hriat theih vek a, hei hi rorelna sanga zawhna a ni a, an duh chuan min chhang thei a ni. Assembly House zah lohna a ni thei em min chhan loh hi tih ka zawt e.

Pu LALRUATKIMA : Pu Speaker, ka lawm e. Minister in min chhan ang khan Constituency chhung ami te CESS sumdawng Children Education Assistant leh a dangte dawng kha kan zawt a. Department pawh hian min chhang thei in ka hria a, Department dang te pawh min chhang mai a. Engatinge helaiyah hian thuruk bik thup tum a awm em ni? Elction hma lawka Serchhip District a sem chiam ni a sawi a kha a dik reng em ? Engzahnge khatah khan sem anih? Tih kan zawt leh a. tin, Champhai leh Serchhip district ah a constituency wise in min chhang thei lo nangin, hemi khaw hnih ah hian Children Education Assistant mi engzat hnenah nge pek an nih? Engzat te nge an nih?

An dawn dan kha a inang lova, sikul naupang ni lo ziah belh kha a awm teuh mai a, zirtirtute pawh an mangang tih kan dawng a, engvanga ziah belh ta teuh nge an nih naupang awm mang silo kha tih kan zawhbelh a ni.

S P E A K E R : Awle, Chief Minister i lo sawm ang, zawhbelhna chu duh tawk tawh ang aw.

Pu LAL THANHAWLA,CHIEF MINISTER : Pu Speaker, hetiang fund hi a awm tih pawh ka hre lova, Serchhip biala an sem leh sem loh pawh ka hre lo, sum lam hi ka ngaihtuah lo khawp mai a ka neih loh zawng tak a ni na in. An sem a nih pawhin engatinge a semtuten min hrilh ve loh, chanvo te ka neih ve tur a nih phei chuan engatinge min pek ve loh tih kha ka zawh letna zawk a ni e.

Hetiang fund hi a awm tih pawh ka hre lo va, an sawi luai luai takah chuan a endiktu tur mi rinawm tak tak te kan chhui tir mek a. An chhui chhuah hunah chuan an zighthna zawng zawng kha a chhan theih ka ring. Serchhip bialah te an lo han sem vak ringawt, engatinge bialtu MLA pawhin ka hriat ve loh, tute nge dawngtu tih kha chu kan la hre thei in ka ring a. Chuvangin Pu Speaker, to be very frank with you, hetiang fund hi a awm ngai tih ka hre vak lo. Tute nge dawng tih pawh hi hriat ka tum vak lo. Chuvangin khang zighthna zawng zawng kha chu ka chhang lo mai ang.

S P E A K E R : Awle, ‘ka tel ve lova, ka hre ve lo’, a ti tawh, khami bak kha chu engmah zawh tur dang a awm tawh lo.

Pu LAL THANHAWLA, CHIEF MINISTER : Pu Speaker, official ten Minister an duh chuan an thlim thei, kan Minister pawh khan a hriatpui loh a tam mai heng ah hian. Chuvang tak chuan kan chhui mek a ni. A changtu Minister pawh an thlim a nih chuan kei tuna temporary-a enkawlta chuan ka hre lo leh zual, Pu speaker.

Pu LALRUATKIMA : Pu Speaker, House Leader in a chhan lai khan rules leh act hi notified vek tawh a ni a 2019 atang khan. Khalaiah khan kan House Leader in ka hre lo a tih lai taka kha a chan loh pawh ni se, he House zahawm takah hian Act kha siam a ni a, chuvangin a hre lo tih kha ava mak ngai dawn ve mawle! Kan in thlahdah lutuk a kan hre lo zo ta nge ni. OM te

pawh 29th May 2012 ah tihchhuah a ni a, Assembly zawhna ah pawh a lut teuh tawh a, khangah te pawh khan hriat awm tak a ni.

Pu LAL THANHAWLA,CHIEF MINISTER : Pu Speaker, min puhna chu mithat chhia intlahdah tih a ni e, ka rawn puang a nih kha.

Pu ZORAM SANGLIANA : Pu Speaker, zawhbelh kha a thiang tawh hleinem. Commission-a tih mek lai a ni e tiin House Leader in a sawi tawh a, kan rules and procedure angin khang kha House chhungah sawi a thiang tawh lo.

S P E A K E R : Zawhna no.127-na Pu John Siamkunga kan sawm e.

Pu JOHN SIAMKUNGA : Pu Speaker, ka lawm e. Minister Animal Husbandry & Veterinary Department chhan atan heng zawhna te hi ka zawt e.

- a) Animal Husbandry hnuia NLUP hmanga eizawngtu beneficiaries awm zat min hrilh thei em?
- b) Animal Husbandry & Veterinary Department hnuia NLUP beneficiaries sum pek chhuah tawh total amount min hrilh thei em? 2012 – 2017.
- c) Bawnghnute, Vawksa, Bawngsa, Arsa lamah te kan thar chhuah a pung em?

Pu P.C LALTHANLIANA MINISTER : Pu Speaker, member zahawm tak zawhna chhanna chu hetiang hi a ni.

a-na zawhna chhanna chu –

AH & Vety Department hnuia NLUP hmanga eizawngtu (beneficiaries) awm zat chu 36,991 an ni.

AH & Vety Department hnuia NLUP hmanga beneficiary te hnena sum pek chhuah tawh total amount 2012-2017 ` 30,09,90,000 (vaibelchhe zathum sawm, nuaikua leh singkua) a ni. Bawng hnute, vawksa, Bawngsa, Arsa lamah te kan thar chhuah a pung hle a ni.

S P E A K E R : Aw, zawh belhna a awm thei lova, a neitu awmloh avangin. Nakin zel atan Minister te khan an awmloh vanga midang an chhan tir dawn chuan ziakin Chair hnenah ‘ani hi authority ka pe a ni’, tiin pe thin tawh se a tha ang.

Pu T.T. ZOTHANSANGA : Pu Speaker, kan Minister awm loh chhan kha, damlohma avanga zin a ni a, kha kha lehlam in inthlahdah vang ah an lo ngaih palh kha ka hlau a, ka rawn sawi zawk a ni.

S P E A K E R : Chu chu a dik a, mahse lehkha kha chu a ziah theih tho. Nakin zel atan, ‘ hei hi ka authorized a ni’, ti kha thehluh zel ni sela.

Zawhna 128-ah kal ila, zawhna neitu MLA zahawm tak Dr. K. Beichhua sawm ang.

Dr. K. BEICHHUA : Pu Speaker, ka lawm e, Personel & Administrative Reforms Department changtu Minister zahawm tak hnena ka zawhna chu:-

- a) Mizoram technical post hrang hrang Engineer, Medical Doctor, Vety Doctor etc. te exam MPSC hian conduct tumna a nei em?
- b) 2017-2017-ah MPSC-in combined competitive exam (MCS,MPS, etc) conduct a tum em? Conduct ta se preliminary test hi UPSC pattern (Paper II qualifying) a kalpui tumna a awm em?

S P E A K E R : Chhang turin Chief Minister zahawm tak sawm ang.

Pu LALTHANHAWLA, CHIEF MINISTER : Pu Speaker, member zahawm tak Dr. K. Beichhua zawhna chhanna chu :-

- a) Mizoram technical post hrang hrang Engineer, Medical Doctor, Vety Doctor post te hi a ruah a, a concerned department ten MPSC lama hnaruak hnawhkhhat tura requisition an siam chuan exam hi conduct a ni ang.
- b) Mizoram Civil Services (combine competitive examination) regulations, 2011 ang chuan combine competitive exam hi kum tin neih tura ruahman a ni a, amaherawchu he regulation hmanga lak tura tih post hrang hrangah post ruak a awm loh chuan exam hi conduct a ni lo ang.

Tun dinhmunah MPSC hian a concerned department atangin Mizoram Civil Services (MCS), Mizoram Finance & Accounts Service (MF&AS) leh Mizoram Information Service (MIS) atan vacancy notification a la dawng lo a, MPS atan vacancy a awm loh thu erawh a dawng tawh thung.

MCS (combined competitive examination) Regulations, 2011 tihdanglam UPSC pattern-a combined competitive exam preliminary test (paper-II qualifying chauh) anga kalpui tumna a awm rih lo.

S P E A K E R : Zawh belhna, a neitu Pu K. Beichhua.

Dr. K. BEICHHUA : Pu Speaker, Health Minister zahawm tak khan hmanni khan doctor 26 MPSC conduct a lak tur an ni ang tih kha a sawi a, a lawmawm viau a, chutihrual chuan technical post dang dang te pawh hi mamawhna a sang a, senior te an pension a, chu lovah indaihlohma a na chho zel a, chutihlai chuan a concerned department te hian, Personel & Administrative Reform department ah hian ngenna, dilna an rawn thlen ngailo em ni tih ka zawhbelh e.

S P E A K E R : Zawhbelhna dang a awmloh chuan chhang turin Chief Minister sawm ila.

Pu LAL THANHAWLA, CHIEF MINISTER : Pu Speaker, department hrang hrang, a bik in Engineering department ah te hian indaihlohma a nasa khawp mai a, amaherawhchu sum harsatna vang te in duh angin kan ti theilo a, hmalak a tam si a, a zau si a, a pung zel zawk si a, an indaihlo tawlh tawlh a ni. Amaherawh chu tunah hian, khang ang hna lo pung zel leh a tul anga han ti tur khan sum leh pai kan nei tawk lova, chuvangin tul ngawih ngawih, vawi tam tak department in an rawn dil pawh hian kan la pe hleithei lova, chutiang chu kan dinhmun a ni a. chuvangin Doctor an ni emaw, adangte pawh kha tunah hian kan mamawh em avangin tih dan ngaituah a ni a. Tin, department dang dangah Police-ah te hian kan indaihlo nasa a, amaherawhchu lak zut zut theih a ni lova, MPS-ah pawh tiang kha kan dinhmun a ni a, tiang khan notice an pe tawh a ni a, khang kha kan dinhmun a ni a, engpawhnise kan mamawh ang leh kan efficiency leh kan deliver theihna tur atan a tul ang anga hmalak zel chu kan tum a ni.

S P E A K E R : Awle, zawhna 129-na ah kan kal thei a, zawhna neitu MLA zahawm tak Pu Lalruatkima i sawm ang.

Pu LALRUATKIMA : Pu Speaker, ka lawm e. AH & Vety Department changtu Minister zahawm tak chhan atan ka Starred Question 129-na ka zawt e -

- a) Kum 2011-2016 chhungin NLUP sum engzatnge hmuh a nih? A year-wise in engzatnge?
- b) Eng trade-ah te nge hma lak a nih a, heng trade-ah te hian beneficiaries engzatnge awm?

S P E A K E R : Pu P.C. Lalthanliana, Minister zahawm takin lo chhan sak se.

Pu P.C. LALTHANLIANA, MINISTER : Pu Speaker, member zahawm tak Pu Lalruatkima zawhna chhanna chu hetiang hi a ni:-

a) Kum 2011-2016 chhungin NLUP sum AH & Vey Department in a hmuh zawng zawng chu ` 36094.83 lakhs (cheng vaibelchhe zathum sawmruk maktaduai sawmkua pali singriat sangthum) a ni a, year-wise a hmuh dan chu hetiang hi a ni.

- 1) 2010-2011 - ` 2832.48 lakhs
- 2) 2011- 2012 - ` 7325.35 lakhs
- 3) 2012-2013 - ` 6300.00 lakhs
- 4) 2013-2014 - ` 8540.00 lakhs
- 5) 2014-2015 - ` 11097.83 lakhs

Total = `36094.83 lakhs

b) AH & Vety Department hnuaiah heng trade-ah te hian hma lak a ni.

- 1) Dairy farming
- 2) Piggery farming
- 3) Poultry farming
- 4) Mithun farming/Hill cattle farming

Tuna trade tina beneficiaries awm zat chu a hnuai ami ang hi a ni

Pu P.C.LALTHANLIANA, MINISTER :

Trade	1 st phase	2 nd Phase	3 rd & 4 th Phase	TOTAL
Dairy farming	957	378	339	1674
Piggery farming	5291	6928	8163	20382
Poultry farming	1889	4285	4721	10895
Mithun/Hill Cattle farming	1943	1142	955	4040
TOTAL	10080	12733	14178	36991

(c) Beneficiary hnena sum leh hamthatna dang pek dan chu hetiang hi a ni -

Phase	Trade	Sum faia beneficiaries pakhat hnena pek zat	Hamthatna (tanpuina) pek dang te
1 st Phase	Dairy Piggery	` 29,150/-	Bawngpui pahnih (2) leh insurance -

	Poultry Mithun/Hill Cattle	` 1,00,000/- ` 1,00,000/- ` 1,00,000/-	- -
2 nd Phase	Dairy Piggery Poultry Mithun/Hill Cattle	` 29,944/- ` 80,000/- ` 91,000/- ` 1,00,000/-	Bawngpui pahnih (2) leh insurance Vawk note pali (4) Ar note za sawmnga (150) -
3 rd & 4 th Phase	Dairy Piggery Poultry Mithun/Hill Cattle	` 29,000/- ` 38,000/- ` 30,000/- ` 93,000/-	Bawngpui pahnih (2) leh insurance Vawk note paruk (6) Ar note za sawmnga (150), Ar note chaw, Ar lian chaw, Ar chaw pekna, Ar damdawi leh Tuizem -

(d) NLUP hi 1st leh 2nd Phase kalpui a ni tawh a. 3rd leh 4th Phase tunah kalpui mek a ni a, hmabak a awm tawh lo tih a ni e.

S P E A K E R : Awle, supplementary question a awm thei lo va. Question no.130-naah kan kal thei a. A zighthna neitu Dr.K.Beichhua zawt turin i sawm ang.

Dr. K. BEICHHUA : Pu Speaker, ka lawm e. Starred Question 130-na Sports & Youth Services Department changtu Minister zahawm tak hnenah ka zawt e.

S P E A K E R : Awle, Minister zahawm tak chhang turin i sawm ang.

Pu ZODINTLUANGA, MINISTER : Pu Speaker, member zahawm tak Dr.K.Beichhua zighthna Starred Question 130 na –

- (a) Siahna New Colony-a Indoor Stadium hi engtik kum atanga sak tan nge a nih ?

Chhanna - Kum 2011 atangin.

(b) Pawisa cheng engzatnge hemi sak nan hian sorkar in a sanction ?

Chhanna - 174.00 lakh.

(c) Tunge Contractor ? Engtika zawk tur nge a nih ?

Chhanna - Isaac T.Beingachha, Siaha a ni a, 19th August,

2016 khan zawk a ni.

Pu Speaker, thla hmasa mai khan Saiha-ah ka va kal a. Hemi kan Hall hi a satu mai kan ni a. Chutah chuan R.D. lam atang te leh BRGF lam atang te in chei chhoh ve mek a ni a. Mara Thalai Pawl ram a ni a, saw ram saw. Tunah sawn electrification saw Department-in a pass neitu kan nih loh avangin electric pawh saw kan la pawt thei lo a, anmahni hminga pawh a ngaih avangin. Tin, thalai sawn office leh parking tha tak an nei a. Tin, Shooting Gallery changtlung tak mai an zo tawh a. Hmanni khan hemi Saiha New Colony-a Indoor Stadium hnuaiah khan kan va hawng nghe nghe a. Tun atanga hun reilo teah Saiha bialtu MLA zahawm tak khua atang hian Mizoram aiawha Rifle Shooting te pawh an rawn chhuah ve vat kan beisei a ni tih kha ka chhanna a ni e.

S P E A K E R : Awle, zawkna hun a tawp ta e. Vawiinah hian kan member zahawm tak te pahnih Minister Pu C.Ngunlianchunga leh Pu JH Rothuama te damlohma thil avangin kan zingah an tel thei lo a ni tih House ka hriattir a. Tunah hian Laying of Papers-ah kan kal ang a. Pu Lalsawta, Minister zahawm takin paper lay tur pathum a neih ang te he House dawhkanah hian lay turin i sawm ang.

Pu LALSAWTA, MINISTER : Pu Speaker, ka lawm e. Governor recommendation ang leh i phalna in he House zahawm takah hian –

- i) Statement on Sixth Monthly Review of the Finance Minister on the Fiscal Position of the Government of Mizoram for the Second Half of 2014-2015 (October, 2014-March,2015)(As required under Rule 11 of the Mizoram Fiscal Responsibility and Budget Management Rules, 2007).
- ii) Statement on Sixth Monthly Review of the Finance Minister on the Fiscal Position of the Government of Mizoram for the First Half of 2015-2016 (April, 2015-September, 2015)(As required under Rule 11 of the Mizoram Fiscal Responsibility and Budget Management Rules, 2007).

- iii) Statement on Sixth Monthly Review of the Finance Minister on the Fiscal Position of the Government of Mizoram for the Second Half of 2015-2016 (October, 2015-March, 2016) (As required under Rule 11 of the Mizoram Fiscal Responsibility and Budget Management Rules, 2007) te hi ka rawn lay a.

Hemi rual hian kan lay chungchang ami hi bu thum a ni a, tlemte han sawifiah tulin ka hria a. Heng kan Report-ah leh Review-ah hian thil lang chiang chu tuna kan finance positiona kan pawisa hmuhma kawng te, kan senso na kawng te, kan puk dan te, khang kha chipchiar ang reng takin rawn ziahlan a ni a. Chu chu budget-ah pawh khan kan tarlang tawh a.

Chumi baka hemia an rawn tarlan leh thenkhat chu pakhat naah chuan Mizoramah company ten hna an rawn thawk neuh neuh a. Chutah chuan corporate social responsibility, vantlang leh mipui ten an hman ve tur ang chi zawng hi Finance Department hian tun ai hian company te hi phut na deuh ila tih a ni a. Tin, Mizoram mipuiin chhiah, tax leh non-tax, electricity chungchang te, water charges te, chi hrang hranga non-tax revenue kan hmuh ang hi awlsam zawka mipuiin an pek theihna tur atan hian remruatna siamsak tha kan ti a. Heng hi la ngaihtuah tur atan kan ti a. Theih phei chu ni se Public Kiosk for E-payment an ti a, awlsam zawka electronic payment te pawh hi buatsaih sak a tul tawh a ni tih a ni a.

Tin, a pathum-naah chuan mipuiin buhfai an dawn danah hian North Eastern State dang ten entirnan : Meghalaya leh Nagaland te ang deuha Food Security Act in dawng tura a tih, man tlawma an dawn ang hian Mizoram pawhin tih ve theih dan hi kan state sum dinhmun harsa tak ngaihtuahin tih ve theih ni se tih a ni a.

Chumi awmzia chu vawiinah kan hriat angin kan zavai deuh thawin ration man tlawmin kan dawng a. Tuna a to zawk kan tih pawh kg- a ` 25/-a kan lei te kha kg ah ` 15/- in kan va hrallh a. Kg 1 zelah ` 10 in (a phurh man lam chu eng pawh lo ni ta se) kan la inpe ta zawk a. Mahse Nagaland leh Meghalaya-ah te chuan Food Security Act-in a sawi ang chiah chiah deuh hian an lo pek avangin sum tam tak sorkar-in a sen loh phah theih tih hemi review in a rawn sawi pakhat a ni a.

A palina ah chuan tunhma te ngaiantuahin Food, Civil Supplies & Consumer Affairs Department-in buhfai leina leh phurh man ah Food Security Act hman a lo nih hnu hian cheng tam takin kan senso a lo tlahniam ta a. Cheng vaibelchhe 58 leh nuai 88 nuai zawnga han sawi chuan cheng nuai 5,888 zetin kan buhfai senso a lo tlem ta pawh hi mipui hriata tarlan hi tul kan ti a. Tin, GST hi kumin July ni 1 atang hian India ram pumpuiah tih tum a ni a, chutiang tur chuan central sorkar pawhin a tul ang ang in hma a la chho zel a. Hetiang a lo nih takah hian dan thar leh system thar a lo nih dawn tak avangin Taxation Department hi tih len a tih phuisui deuh a tulin kan hria a. A chhan chu mi state-ah chuan hman atangin kum 40/50, kum 100 atang daih tawhin Taxation te an lo ti a, keini hi chuan a building pawh tunah hian kan sak chu kan la luah lo a, chutiang vel chu kan la nih avangin mi state dangte ngaiantuahin kan la hnufual hle-in kan thlen chin a tawi hle a. Chuvang chuan Taxation department hi tih len ngaia hriat a ni.

Tin, a paruk-na a tawp berah chuan sorkar hnathawk te, sumdawng te, engineer te, doctor te leh lawyer ten private-a hna an thawh pawh a professional tax an pek hi tih pun a nih theih nan central sorkar-ah lehkha te pawh thawn leh a hmalak ni rawh se tih hi kan Review Committee te hian a sawilan te zing ami tlem te ka'n tarlang a ni. Pu Speaker, ka lawm e.

S P E A K E R : Le, a copy kha sem ni se. Tunah chuan kan Minister zahawm tak Pu B.D. Chakma in tahrik ni 20.3.2017-a zawhna no. 156-na tih dikna, statement of correction House-ah hian lay sela, amah ilo sawm ang.

Pu B.D.CHAKMA, MINISTER : Mr. Speaker Sir, with your permission Sir, I lay on the Table of the House a statement of correction on reply given on the 20th March, 2017 to the Starred Question No. 156 of Ballot No. 32 asked by hon'ble MLA Pu Lalruatkima regarding “Sericulture Department-in NLUP atanga sum hmuh leh hman dan chungchang”. Thank you Sir.

S P E A K E R : Awle, a copy kha member zahawm tak te hnenah sem leh ni se.

Tunah chuan Pu Lalruatkima Chairman, Public Accounts Committee in Statement House-a lay tur paruk a nei a. A neih zawng hi House dawhkan-ah han dah sela, amah ilo sawm ang.

Pu LALRUATKIMA : Pu Speaker, vawiin ah hian Public Accounts Committee Chairman ka nihna angin Statement paruk -

- i) Statement of Action Taken on the further recommendation of Public Accounts Committee contained in the 10th Action Taken Report, 2016 relating to Food, Civil Supplies & Consumer Affairs Department (Ref : Para 2.5, 3.6 and 8.6 of the 10th Action Taken Report).
- ii) Statement of Action Taken on the further recommendation of Public Accounts Committee contained in the 17th Action Taken Report, 2016 relating to Industries Department (Geology & Mining Wing) (Ref : Para 1.8 of the 17th Action Taken Report).
- iii) Statement of Action Taken on the further recommendation of Public Accounts Committee contained in the 18th Action Taken Report, 2016 relating to Public Works Department (Ref : Para 1.9 of the 18th Action Taken Report).
- iv) Statement of Action Taken on the further recommendation of Public Accounts Committee contained in the 9th Action Taken Report, 2016 relating to Higher & Technical Education Department (Ref : Para 3.6 and 9.6 of the 9th Action Taken Report).
- v) Statement of Action Taken on the further recommendation of Public Accounts Committee contained in the 11th Action Taken Report, 2016 relating to Environment, Forest & Climate Change Department (Ref : Para 1.13 of the 11th Action Taken Report).
- vi) Statement of Action Taken on the further recommendation of Public Accounts Committee contained in the 14th Action Taken Report, 2016 relating to School Education Department (Ref : Para 1.4, 3.6 and 5.4 of the 14th Action Taken Report).

Pu Speaker, i remtihna leh Public Accounts Committee in min authorized angin heng Statement te hi he House zahawm takah hian ka rawn lay e, ka lawm e.

S P E A K E R : Awle, a copy te kha member zahawm tak te hnenah sem leh ni se.

In changkim tawh a ni awm e. Tunah chuan Legislative Business-ah kan kal thei tawh a. Minister zahawm tak Pu Zodintluanga'n "The Mizoram Street Vendor (Protection of Livelihood and Regulation of Street Vending) (Repeal) Bill, 2017" hi House-ah introduce phalna dil turin i lo sawm ang.

Pu ZODINTLUANGA, MINISTER : Pu Speaker, i phalna leh he House remtihna in "The Mizoram Street Vendor (Protection of Livelihood and Regulation of Street Vending) (Repeal) Bill, 2017" hi introduce ka rawn dil e.

S P E A K E R : Awle, kan phal em? Kan phal a, han introduce sela, House-a sawiho turin rawn move nghal tawh mai rawh se.

Pu ZODINTLUANGA, MINISTER : Pu Speaker, i phalna leh he House remtihna in "The Mizoram Street Vendor (Protection of Livelihood and Regulation of Street Vending) (Repeal) Bill, 2017" hi ka rawn introduce a. Pu Speaker, he Bill hi tlem te han sawifiah tur a awm ve a. India sorkar chuan khawlaia thil zuar thin Street Vendor te hi an chanvo leh dikna te humhalh hi tul a ti in, heng sumdawngko te hi informal sector atanga formal sector-a suan luh hi Indian economy siam tu pawimawh an nih avang bawkin a ngai pawimawh hle a. Chumi avang chuan heng Street Vendor te awmdan relfel hi thil pawimawh takah Sorkar laipui chuan a ngai a ni. Chumi bawhzui chuan Ministry of Housing and Urban Poverty Alleviation, Government of India chuan khawlaia thil zuar thin te hi mumal taka enkawl leh an dikna chanvo humhalh sak a tul a ni tiin National Policy on Urban Street Vendors leh Model Bill a siam a. Chu National Policy leh Model Bill a siam te chu state hrang hrangah thawn chhuak in state ngaihdan te a dil a. Kum 2009-ah khan National Policy on Urban Street Vendors, 2009-ah revised policy leh model bill te chu rawn thawn leh in State te chu adopt turin a rawn ti bawk a. Dated ni 6 October, 2009-ah Ministry of Housing & Poverty Alleviation Secretary-in Mizoram Chief Secretary hnenah adopt mai turin thurawn a rawn pe a. Amaherawhchu, Mizoram sorkar chuan Municipality kan la neih loh avangin adopt mai ala remchan loh thu in kan chhang a ni. Date 29.10.2009-ah Union Minister-in Chief Minister hnenah lehkha in a rawn nawr leh a, hei hi State Minister in zu chhangin

ULB kan la neih loh avangin kan la adopt thei lo a ni tiin kan zu chhang leh a. Tichuan January 2010-ah UD & PA Department chuan model bill zul zui in The Mizoram Street Vendor Protection of Livelihood & Regulation of Street Vending Bill chu kan siam ta a, cabinet memo te siam in Council of Ministers ngaihtuah tura chhawp in, Council of Minister chuan a pawm pui ta a. The Mizoram Street Vendor Protection of Livelihood & Regulation of Street Vending Bill, 2011 chu Assembly Session date 13 & 14 December, 2011 a neih ah a lo passed ta bawk a. Tichuan, Act chu sorkar in a lo notify zui ta a ni.

Mizoram Legislative Assembly-in a passed hnu ah sorkar in a notify a, hemi atan hian Mizoram Street Vendor Protection of Livelihood & Regulation of Street Vending Rules, 2015 pawh kan siam nghe nghe a ni. Date 12.1.2012-ah Law & Judicial atangin Act accented copy hmuh a ni a, Mizoram Street Vendor Protection of Livelihood & Regulation of Street Vending Act, 2011 chu ni 13.1.2012-ah gazetted niin Government of India, Ministry of Housing & Poverty Alleviation-ah a copy pawh ni 17 thla hnih ah kan thawn thla a ni. Hemi hnu hian central sorkar chuan The Street Vendors Protection of Livelihood & Regulation of Street Vending Act, 2014 Act No. 7 of 2014 chu India ram pumpuia hman tura alo tih chhuah tak avangin Mizoram sorkar-in Act leh Rules a lo siam ve sa, The Mizoram Street Vendor Protection of Livelihood & Regulation of StreetVending Act, 2011 leh The Mizoram Street Vendor Protection of Livelihood & Regulation of Street Vending Rules, 2015 te chu repeal turin min hriattir a. Repeal turin The Mizoram StreetVendor Protection of Livelihood & Regulation of Street Vending, Repeal Bill 2017 hi Pu Speaker, vawiin ni ah hian ka rawn pulut ta a ni.

Central Act, 2014 zul zua rules siam leh street vendor te chungchang leh state hma lak dan te hi India Parliament hnuia Rajya Sabha leh Lok Sabha, House of Sub-ordinate Legislation chuan a enzui reng bakah street vending chungchang hi Supreme Court order zulzuin National Urban Livelihood Mission component pakhat ah an dah nghe nghe a ni. Street vengding chungchang monitor leh report dan tur zawng zawng pawh hi central Act zulzuia siam a nih avangin, central Act chu Act chungnung zawk a nih avangin, kan state Act neihsa chu repeal alo ngai ta a. Hemi avang hian central Act The Street Vendor Protection of Livelihood & Regulation of Street Vending Act, 2014, Act No.7 of 2014 chu hman a lo ni ta a ni.

Repeal Bill hi Assembly-ah member zahawm tak tak ten min pass pui a nih chuan Ministy of Housing & Poverty Alleviation, Govt. of India Mizoram sorkar chuan a hriat tir leh ang a. The Street Vendor Protection of Livelihood & Regulation of Street Vending Acr, 2014, Act No. 7 of 2014 chu hmang chhunzawm in Act zulzuin a rules pawh siam ve zui tur a ni ang a. Chuvang chuan Pu Speaker, vawiina kan Bill repeal tur hi member zahawm tak tak ten min pass pui turin ka rawn sawm in ka rawn ngen a ni e. Ka lawm e.

S P E A K E R : Kan hriat angin India chu Unitary leh Federalism inchawhpawlh ram kan nih avangin India Parliament dan siam leh state sorkar dan siam kha a pahnih khan a ding ve ve theilo a. Chuvangin, Parliament dan siam kha lal zawk fo tur a nih avangin, kan dan neih a lo inthuah avangin kan dan zawk kha repeal a ngai ta tihna a ni mai, Minister sawi dan atang chuan. Chuvangin kan sawi zui lo theilo ang a, amaherawhchu hun duh rei chi a ni lem lo a, minute 4 in pe mai ila, minute 3 chhung ah pawh in sawi zawk mai ka ring a. Tunah sawiho kan tan ang a, minute 5 chhungin sawi zawk tum hram ila a tha ang e. Tunge sawi hmasa ber ang le? Sawi tur an awm lo. Awle, Minister khan House hi pass rawn dil mai sela a tha ang e.

Pu ZODINTLUANGA, MINISTER : Pu Speaker, nichina kan han sawi ang khan Central Act in min rawn siam hnan takah chuan a lal lo theilo a. Tin, Supreme Court hian he Act hi uluk takin a vil zui reng a, chuvang chuan tuna kan Act Mizoram in kan lo siam ve hi repeal a ngai ta a ni. The Mizoram Street Vendor (Protection of Livelihood & Regulation of Street Vending) (Repeal Bill), 2017 hi he House zahawm takin min pass sak turin ka rawn sawm nawn leh a ni e.

S P E A K E R : Awle, tunah Minister zahawm tak Pu Zodintluanga'n The Mizoram Street Vendor (Protection of Livelihood & Regulation of Street Vending) (Repeal) Bill, 2017 chu House pass pui turin a dil a, pass rem ti zawngin 'remti' ti rawh u le (Members : Remti). Rem ti lo kan awm em? Kan awm loh chuan The Mizoram Street Vendor (Protection of Livelihood & Regulation of Street Vending) (Repeal) Bill, 2017 chu he House hian lungrual takin a pass ta a ni e.

Pu ZODINTLUANGA, MINISTER : Pu Speaker, ka lawm e.

S P E A K E R : Tunah chuan Financial Business-ah kan kal thei tawh ang a. Home Minister zahawm tak Pu R. Lalzirliana leh Pu P.C. Lalthanliana te demand kan la

dawn a ni. Tunah hian kan Minister zahawm tak Pu Lalzirliana sawm ila, a demand no. 7-na ,16-na, 31-na, 38-na te he House-ah hian rawn pharh sela, amah ilo sawm ang.

Pu R.LALZIRLIANA, MINISTER : Pu Speaker, on the recommendation of the Governor of Mizoram and with your permission sir, i move the demand nos. 7,16. 31, 38 for ₹ 11,56,33,89,000 only for meeting expenses during 2017- 2018 in respect of the following departments –

Demand No.	Purpose	Amount	Demand For Grants Page No.
1	2	3	4
7	Excise & Narcotics	31,40,01,000	51-54
16	Home (including Prison & Sainik)	5,78,30,09,000	143-179
31	Agriculture	1,82,52,71,000	373-389
38	Rural Development	3,64,11,08,000	442-453
	TOTAL	11,56,33,89,000	

Ka lawm e.

S P E A K E R : Minister dang Pu P.C.Lalthanliana department, demand nos.19, 29, 32 te hi he House-ah rawn submit turin i lo sawm leh ang.

Pu P. C. LALTHANLIANA, MINISTER : Mr Speaker Sir, on the recommendation of the Governor of Mizoram and with your permission Sir, I move the demand nos 19, 29 and 32 for Rupees 257 crore 78 lakhs and Twenty Nine Thousand only for meeting expenses during 2017 – 2018 in respect of the following deparments. Demand no.19 – Local Administration department Rupees 57 crore, 95 lakhs and 72 thousand only. Demand no.29 Social Welfare department – Rupees 127 crore 27 lakhs and thirty nine thousand only. Demand no.32 - Horticulture department Rupees 72 crore, 35 lakhs and eighteen thousand only. Total Rupees 257 crore, 78 lakhs and 29 thousand only. Thankyou Sir.

S P E A K E R : Awle, a pahnih hian kan la kawp leh mai ang a, minute 10 kha kan sawi hun chhung tur a ni tih kha hre reng ila, tunge sawi hmasa ber ang le ? A hnuhnung nih kan inchuh deuh hlek a, a thalo a, Pu K.Sangthuama i lo sawm ang.

Pu K . SANGTHUAMA : Ni e Pu Speaker, sawi theuh kha kan duh leh ang a, hun in min daihlo leh ang a, Pu Speaker, ka lawm e. A hmasa ber ah chuan kan Minister zahawm tak Pu R.Lalzirliana demand no.7-na kha tawite in han sawi ila, minute khat lek lek te a daih tawk vel a ni mai a. Demand no. 7-na Excise and Narcotics hi zu te zawrh alo ni ta a, kan thlah zalen si a, Excise hi tlema indaih deuh hleka a department pawh hi tih theih chu ni sela tuna duhthusama kan control theih loh te pawh hi a hnathawkute pawh hi tam deuh ta sela, hmun tina an kal a, engkim (Speaker : Kan han inthlak lawk aw, please) (Deputy Speaker : Awle, chhunzawm rawh le) Pu Deputy Speaker, awlsam deuh zawka kan hna te pawh kan tih theih nan indaih deuh zawka hei hi ngaihtuah theihna dan kawng te hi chu awm se a tha khawpin ka hria.

Tin, zu control hrim hrim chungchang hi tun ai hian ngunthluk zawkin a changtu te leh kan hotute reng reng hian rilru tak tak ah neih sela, kan thlah zalen rau rau a nih si chuan kan thlah zallen anga a control na tha zawk zu chungchang ah hian neih kan rilru ah hian awm sela a tha in ka'n hria a. Hmanni-ah kan sawi nek tawh a, vawiin ah pawh hian Excise and Narcotic chungchang ah hian sawi leh tho loh theih a ni lova. A control na lamah hian ngaihtuah tha ta ila, kan rilrua kan ngaihtuahna anga kan tih theihna turin helai ah hian ngaihtuahna thar kan Minister zahawm tak hian rawn hmang sela a that ka'n ring a.

Chuti a nih loh chuan a zuartu tam tak kan han nei a. Hmannia a zir chiang tura kan han ruat hmasak te pawh khan an han sawi dan khan zu chungchangah hian a permit te pawh khatia a hmuna dah a, khatiang atanga lo la ve mai mai tawk kha an awm a ti a, a dik viau in ka ring a. Tin, permit tam tak chhungkaw khat in pakhat hming ni lovin kan lo nei thei a. Hetiang hi chu zu kan phalrai tak chungchangah pawh hian a fuh ber lova, hei aia ngunthluk deuha en ni se, tichuan kan zu zawrhna chungchangah pawh hian hetiang kawngah hian control-na tha zawk tur hian rilru thar pu leh turin vawiin ah hian ka'n chah leh duh a.

Tin, tlema la naupang deuh, kum 14 atanga kum 20 inkar hi kan insum theilo ang reng khawp mai a, heng te pawh hi chhungkaw tin kan in zirtir a ngai a. Kan

tu leh kan fate hetiang kawngah hian ninhlei lo deuh hlek tura ngaiantuahna kan hman a ngai a. Chuvangin hemi kan han sawia hi mipui pawhin an lo ngaithla a, an ngaihthlakna atang te pawhin mipuiin kan tu leh fate tlema control tum na deuh kan neih loh chuan a ram pum in buaina zawk leh hun kal lo zel tur atan naupang zawkin zu in chungchang ah hian in control theih lohna a hlular ta viau mai a, helaiah pawh hian ngaiantuahna kan zavaia kan hman a tul hle in ka hria.

Tin, zu kan han thlah zalen deuh hlek atang hian drugs lam pawh nasa takin a hlular e tih sawi a tam hle mai a. Hei hi thudik tak pawh niin a lang a. Chuvangin helaiah pawh hian tan kan lak nasat a ngai hle in ka hria. Excise te leh Police thlengin YMA te NGO dang zawng zawng pawh kan zavaia kan tan khawm hi a ngai hle in ka hria. Chuvangin zu leh drug chungchangah hian a ram pumpui hian tan kan lak a ngai a ni tih vawiin ah hian hre nawn leh ila ka'n duh deuh hlek a ni. Kha kha demand no. 7-na ah kha chuan tawk mai sela.

Pu Deputy Speaker, demand no. 16-na Home chungchangah hian tlem han sawi leh ta ila, zu nen a inkaihnawih na bawk hi han sawi loh theih a ni lova. Police hmunpuia canteen vela zu kan zawrh hi chu kan Minister zahawm tak hian ngaiantuah nawn leh se a tha hle in kan hria a. Hun remchang a tam duh lutuk deuh hlek a. A ba a han in mai theih te alo ni a, hetiang hi tlem chuan Pu Deputy Speaker, kan Minister zahawm tak hian zu chungchangah hian Police hmunpui deuh hleka han zawrh chawpchilh mai ang hi chu a thatna leh that lohna te pawh hi ngun takin ngaiantuah sela a tha in ka'n hria a. Chuvangin ngaiantuah nawn leh a, hemi hmunpui kher ah hi chuan zu zawrhna hi chu dah loh hram hram ni se a tha in ka hria a, ka'n sawi leh duh a ni. Kha kha demand no. 16-naah chuan tawk mai se.

Demand no. 31-na Agriculture-ah hian economic survey han en hian kan mamawh ang tawk buh pawh hi 180000 metric ton niin a rawn sawi a estimate ah, hetah hian kan thar chhuah hi 62089 metric ton, nuaih 62890 qtls a ni a, 34.59 hi kan thar niawmin a lang a, hetilai ah hian kan mamawh lei belh ngai hi 65.41% a la ni a. Chuvangin Agriculture lamah hian tan chu kan lak deuh hlek a ngaiin a lang a.

Tin, kan thar chhuah ve kan han tih metric ton 602089 pawh hi a tak takah chuan a thlen phak hi a rinawm chiah in ka hre lova. A chiah chiah hi thil hriat har tak pawh a nih rual in hei hi chu taima deuh hlek in survey ti tute hian chiang deuh fek fawk

hian ngaihtuahna hmang sela a tha hle in ka hria a. Mahni leh mahni inbumna ang hi a ni thei viau a, hetiang kawng ah hian Pu Deputy Speaker, chuvangin heti zat hi kan thar chhuak chiah em tih hi ngunthluk zawkin ngaihtuahna hmang se a tha in ka ring a. Hetiang zat zat hi kan thar chhuak a nih si chuan a lawmawm viau ang a. Amaherawhchu, kan han survey ah hian hetiang zat zat hi chu a tling lo deuh ang a tih ngaihdan a ram pumpui kan thlir ve dan leh lo neitu leh hnathawktu te, a thar tute atanga kan lo chhut ve dan mai mai in hetiang zat hi kan thar lo ang tih ngaihdan min siamtir deuh hlek a.

Tin, pakhat lehah chuan agriculture lam bawkah khan oil palm hi tun aia uar zawk deuh hlek hian ngaihtuahna hmang leh ta se, oil palm atang hian sum tam tak a lak theih a, hma an la tha thawkhat viau niawmin a lang a. Amaherawhchu tun aia uar leh zawk deuh hleka oil palm chin theihna turin Pu. Deputy Speaker, kan Minister hian tan rawn la leh deuh hlek se a that ka'n ring a.

Tin, a eichhetu erawh hi chu a tam mai a, tum ang hian kan oil palm te pawh hi a eichhetu emaw, rannung lo tichhe tu tam tak a awm a, chungah te chuan harsatna te chu a awm thei ang a. Chuti chungin han tam hrim mai se a thar pawh a tam thei ang tih ka'n sawi duh a ni.

Tin, jhuming atang hian 39% thar a ni a. Tin, 61% hi WRC atanga thar niin kan survey atang hian a lang a. Tin, metric ton 2 hi WRC-ah per hectare-ah a hma khan thar chhuah a ni a. Tunah chuan 2.18 in a pung e an ti a. Hei tlem chuan a pung a, a pun lam hi chu lawmawmah dah ta ila. Hetah pawh hian WRC-ah theihtawp chhuah a, tuna leilet thei lo te pawh hi leh sak a, dozer ten khatiang a theihna kawng kawng kan Minister hian chhuah leh se, WRC atanga kan buh thar hi a tam zawk theih nan, helaiah hian nasa takin hma lak theih a niin ka hria a. Theihtawp chhuah turin helaiah hian ka'n chah leh mawlh mawlh duh a ni.

Tin, rubber plantation hi Agriculture hma nge, tu hma ber nge ka chiang chiah lova. Soil a nih chuan Soil hnenah la sawi ta mai ila a that ka'n ring a. Kha kha Agriculture lamah chuan duhtawk dawn ta mai ila.

Demand no. 38-na Rural Development hi pawisa kan ngah khawp mai a, `3,64,11,08,000 kan nei a ni a. Chuvangin Rural Development hi hetia han ngaihtuah mai

hi chuan engnge an thawh (rural ah hian sum a tam em em mai a), hriat a har angreng khawp mai a. Chutiang khatiang chu thawh a ni e tih helai atang ngawt hi chuan hriat a har thin a. Chuvangin vawiinah pawh hian an rawn sawi kan ngaithla ang a.

Nichinah pawh khan hall lam te pawh Rural Development hian an khawih tel niin a lang a. Chuvangin hei hi thingtlang ah tangkai zawka kan kut hnathawkture hman theih dan kawngte hi a awm em aw? Hall tih ang ngawr ngawr ni lemlo, khatiang ang chi atana hman theihna kawng kha tam tak a awmin ka'n ring a. Sum hi a tam a, vaibelchhe 364 lai tunah pawh hian a awm a ni a, tam tak tih theihna a ni a. Chuvangin Rural Development lamah hian kan Minister pawh hian hnathawhna kalhmang hi enpui deuh hlek sela, ral khat atang mai lova a hmuna an thawh dan te, an hna pek ho te, an thawh dan kalphung hre tlata an tih theihna turin sum tam tak hi hman tangkai dan ngaiantuahna lo ngaiantuah ngun leh se tih hi vawiinah ka'n sawi chhuak leh duh bawk a ni.

Aw le kha kha kan Home Minister zahawm tak hnuia a demand kan sawi theih chu ni mai se.

DEPUTY SPEAKER : I hun i hmangzo a nia.

Pu K. SANGTHUAMA : Minute khat chauh tawi takin, Pu Dy. Speaker, minute khatah chuan ka zawh mai ka ring. Pu P.C.Lalthanliana demand no. 19-na- Local Administration Department hi VC te thuneihna hi tun ai hian ennawn kan tum em aw? Tun aia thuneihna sang hret hi a tih theih lawm ni tih kha ka'n sawi leh duh a. Tin, VC te hlawh hi a tlem tham em em mai tak tak a, sum chu a indaihlo tih Pu Dy. Speaker, kan hria e. Mahse tun aia tlema awmze nei deuh hlekin, (awmzia ti ila), awmzia tak tak nei chuan kan dah thei lo a nih pawhin, tun aia an lawmman hi tihsan ve theih ni se a tha lawm ni? Chu chu vawiinah hian ka'n sawi chhuak leh duh a.

Demand no. 29-na Social Welfare Department-ah hian rualbanlo te tun aiin ngaihsak deuh theihna kawng inhawng se, sum kan dah ah pawh hian rualbanlote tan hian sum tam zawk dah theih ni se a tha awm mang e aw ka ti a. Chu chu ka'n sawi leh duh a.

Pu Deputy Speaker, demand no. 32-na Horticulture Department-ah hian horticulture crop cover estimate hi 3,99,350 hectare a ni a. A production estimate hi a tlem angreng khawp mai a, 1,891.07 metric ton chauh hi 2015-16 atan ni thei tura ngaih

a ni a. Heng hi horticulture hi an tan a ngai hlein ka hria a. Kan ram tana Pu Dy. Speaker, thil thar chhuak thei tam ber ni ah kei chuan ka ngai a, serthlum te, balhla te, lakhuihthei te, limbu kan tih thlengin. Hetiang chi nitina kan eichawp, a hrall na har lemlo ang chi ah hian tan NASA takin la ta ila. Tichuan kut hnathawktute leh keini a lo leitu, thawk ve lemlo in kan lo lei, helaia hrall theih mai ang chi ah hian Horticulture hian hma NASA takin la ta se, tun ai hian thlai ah te, kan nitin ei bar kawngah te pawh hian hma kan sawn theih kan ring a. Chuvangin Pu Dy. Speaker, kha kha kan Minister zahawm tak te pahnih demand-a ka sawi theih tawk chu ni mai se. Ka lawm e.

DEPUTY SPEAKER : Han sawi leh rawh u le. Pu P.C.Zoram Sangliana.

Pu P. C. ZORAM SANGLIANA : Pu Dy. Speaker, vawiinah Minister zahawm tak pahnih Pu R.Lalzirliana leh Pu P.C.Lalthanliana te demand sawina hun tha tak kan nei hi a lawmawm ka ti a. A bikin a hnuhnung zawk hi sawi hmasak ka duh a. LAD kaltlanga thingtlang lam in hmasawnna tam tak, (i ti mai ang), khawchhungah hmuh theiha kan han nei te. Tin, hemi department kaltlanga khawtlang min enkawltu kan VC te, duhsak tak leh training pawh tun hma aia tha a an buatsaih te hi lawmawm ka ti a. He department hi ka hmaa sawitu sawi ang khan, khawtlang enkawltu a nihna ang ngei hian sorkar pawh hian a hre tawh hle chungin hre zual leh se tih hi ka'n sawi belh duh a.

Demand 29 - Social Welfare Department-ah hian mi chhumchhiate tan belh tlak an nihna leh naupang, pai lai atangin ti ang, kum 6 hma lam atanga an lo buatsaihna te, eitur tha zawk anmahni kaltlanga mamawhtu ten an han dawng te, chumai bakah local product ngei mai, heng atan tih nachang an han hre chho te hi a lawmawm ka ti takzet a. He department tel lo hi chuan Mizoram khawi khua mah hi kan nung theilo a nih hi tih turin MUP anmahni kaltlanga sawmna an dawng te, MHIP an ni emaw, YMA, organisation hrang hrang. Tin, kohhran in a enkawl home hrang hrang te thleng hian, kohhran leh NGO ten an enkawl, anmahni tello hi chuan an pen hleitheilo a ni a. He department kaltlanga hmalakna avangin tunhnai lawkah pawh Mizoram Hmeichhe Insuihkhawm Pawl (MHIP) te chuan President of India hnen atangin award ropui tak mai an han dawng hial kha a ni a. Hengte hi Social Welfare Department in anmahni kaltlanga hnathawktute hi khawvel hriatah a pholanna a ni a

Tin, Horticulture department-ah hian sum chang thei thlai, anmahni kaltlanga mipui ten harsatna tawk miah lova an han awm chho ta te hi a lawmawm ka ti a. Anmahni kaltlanga tharchhuah chi hrang hrang in India ram khawpui mai ni lovin, a bikin Anthurium-ah te foreign thlenga mi in an duh bik ni thei khawpa an han ti chhuak te. Tin, mi ramah chauh tha tura kan lo ngaih, sawtah Niawh Tlangah te Strawberry khatiang khawpa tam an han thar chhuak ta te hi a chhuanawm ka ti a. Thawkkhatlai khan serthlum Israel thar chhhuah kha an tihfuh lo deuh chhunzawm loh vat nachang an hria te kha a lawmawm ka ti a. He department hi vawiinah thuam chak an mamawh a ni. Nakinah ka sawi tho dawn a, a bik takin henga hna an thawh thatna turin incentive hi sorkar-in tun aia nasa hian department tin hi pek a tul hle in ka hria tih ka'n sawi duh a.

Demand no. 7,16,38-na changtu kan Home Minister zahawm tak demand no.7-na ah hian heti khawpa NGO-te Excise bik ah a hmang tangkai ta hi kan Minister hi chhuanawm ka ti a. Tun aia hman tangkai dan hi a la awmin ka hria a. VDP te kan ti a, hengah te hian sum leh paia tanpui dan emaw te hi la zawng leh ta se, a zawng mek ni te pawh khan ka'n hre deuh a. Anmahni force tlemte mai, vawiina post ruak an ngah zia te, chuti chunga mihring tlemte, mi zawng zawgin kan beisei department han ni bawk si. Fa sual mai ni lo, tu sual kan nei a ni emaw, harsatna tawk chhungkua reng reng leh NGO thleng te tan pawh rintlak department an ni hi lawmawm ka ti em em a ni.

Chumi bakah member te hian kan lo ngaihtuah ngai reng reng loh a nih ka ring a, UNO ko haw thei department an ni te pawh hi, kan ramah hi chuan 1965/1966 tih vel bawr atanga UNO hi kan benga ri reng, cham reng hi a ni bawk a. Chung mite nena social evils dona tur atan te leh hmasawnna hrang hrang atana ko haw thei department an nihna leh he department hnathawh hi Mizo mipuite tan malsawmna an nihna hi an chhuanawm ka ti a. An harsatna hi sorkar-in a hriatpuin ka hria a. Minister-in theihtawpin heng post ruakte leh, CID (hna ruk) thawktu te hi chu hnawhkhat turin tan han la zel se tih kha ka duhthusam a ni bawk a.

Home Department demand no. 16-na hi a zau khawp mai a. Hemi ah hi chuan a dik takin an mamawh ber ni a ka hriat chu vacancy hnawhkhat hi a ni. International boundary-in chhak lam leh thlang lama min hual tlat kan ni a. Chungah te chuan harsatna pawn lam atangin lo kal ta se, chhunglam chu dah tha ta ila. Heti khawpa NGO tha kan neihna ramah hian, kan thawhpui thiam bawk a, nichinah Excise demand-

ah kan sawi tawh kha. Chumiah chuan chung harsatnate chu lo thleng ta se, tuna kan dinhmun angah hi chuan kan force-te an khawngaihthlak a ni.

Hmanah ka sawi tawh a, han sawi nawn leh ka duh chu, police pakhatin mi hrilh chu, “Kaisanna zawng zawnga kaisan nuam ber chu constable atanga bel hnih kai hi a ni” a ti a. “Engatinge?” ka ti a. “Zan reiah, khawvawt hnuiah, ruahsur hnuiah kan hma ami chiahin min han kai tho va, zing dar 2 velah te, ‘Thianpa, i hun a thleng ta’, an han ti hi, bel hnih kan han bel hi chuan a bo ta ringawt mai thin a. Chuvangin kaisan a zawngah bel hniha kaisan hi a nuam a ni” a ti a. Chutiang deuh hlek chuan, khatiang kha pumpelh emaw an in tih rual hian post ruak an ngah lutuk avang hian bel hnih chu, (hmun thenkhatah phei chuan arsi bel hialte pawhin, constable hna tur anga ngaih kha an thawh a ngai a ni. Chuti chunga Mizoram hi India rama ram ralmuang, ram nuama min siam thei hi kan Minister leh a thawhpui zawng zawngte an fakawm ka ti a.

‘Mahse’ tih ve tur kan nei ka ti a ni. Chu kan tih ve tur chu kan mamawh an ni, hemi kaihhruaina hnuiaia a peng hrang hrang han sawi pawh a chakawm hle mai. A bik takin Home Department (han huap vek mai sela) tello chuan mitthi pawh kan in vui hleithei tawh lo, mo pawh a neih hleihtheih tawh loh. Chuti khawp chuan khawpui chhungah te phei chuan kan ni. Chuvangin heng an indaih lohna nasa lai ber, heng vacancy post hi hnawkhat turin kan Finance Minister zahawm tak pawh khan a budget pharh ni-a a rawn sawiah khan engemaw zat TA/DA- te kha a rawn tarlang bawk a. Heng hi ka sawi duh a ni.

Demand no.38-na ah hian kal ka duh a, Rural Development Department. Kan nghahfak an va ni em aw! ka ti a ni. Thingtlang mite tan phei chuan MLA ai chuan BDO hi an tlawn, (an tlawn ti ila tawngkam dik lo a ni ang a) an mamawh zawk ni in kan hria a ni. A chhan chu village-ah an lo kal a, MLA-ten ‘hei hi a theih em’ kan han tih ang kha anni chuan ‘tah hian ti ang aw’, tiin an kawk kual mai a. Hengah hian ka sawi duh chu a theih hram chuan a concern MLA-te hian an hmalakna tur kan va rawt ve dek dek te an ngaipawimah vek senglo thei a, anmahnin hma lak an tumna te hi MLA-ten kan lo hriat ve hi ti thin se a lawmawm ngawtin ka ring a, chu chu ka’n sawi duh a.

Tin, kan mamawh department an ni a, pawisa pawh a tam reng a ni. Heng pawisa lo thlengte hi tha lehzuala hmang leh tur pawh in ka’n beisei a. Chutih rual chuan, ni 100 inhlawhna chungchangah, tunhma ai chuan vawiina in kalpui dan hi a khawtlang

hian kan chhawr tangkai ta em em a, a lawmawm ka ti a. Minister chak tak leh remhre takin ruahmanna a rawn siam hi thingtlang khua in a bikin he department-ah hian malsawmna kan dawng a. Chunga thawhhona tha tak nena kan kal hi lawmawm ka ti bawk a ni.

Pu Deputy Speaker, ka chen duhna ber chu Agriculture Department, demand no.31-naah hian han chen deuh ka duh a. Buh thar tam, sawngbawl dan thar ruahmanna nen Agriculture Department-in hma an han la ta hi lawmawm ka ti em em mai a. NEDP kaltlanga hma an rawn lakchhohna zawng zawngah te, buh thar tam leh a sawngbawlna awlsam zawk tur ruahmanna kan Minister zahawm takin a'n ti chho hi kan ram, kan hnam tan nghahfak a ni tak meuh meuh a. Hengte hi buh kan thar tam theihna tur atana an hmalakna,leilet nei te tan leilehna leh tractor thlenga thingtlangpa, thalaite hmanrua tur te min han siam sak a. Amaherawhchu, chutianga kan fak mek lai chuan district thenkhat kan hriat ve ang chin, Kolasib, Mamit-ah te kan buh thar ang ang te hi ruahmanna felfai tak Minister hian a siam mekin ka hria a, a ruahmanna chu House pawhin kan hriatpui a. Heng ruahmanna felfai tak hi huaisen tak leh chak taka kan kal pui a pawimawh a. Lo neitu tam takin, a bikin Kolasib district-ah te chuan Aizawl pa hausain kan leilet zawl tha ber berte khu an nei fai deuh vek a ni mai a. Chunga an tharchhuahte chu kan Supply Minister-in remhre taka Mizoram-ah Punjab leh Chandigarh atanga buhfai lakluh tipung chuang silova mipui hnena a rawn tlentir hi a lawmawm ti a kan sawi thin ang in Agriculture Minister zahawm tak pawh hian heta a ruahmanna an kalpui mek hi kaltlang chhohpui sela. Hei hi huaisen takin member-te pawhin theihtawpa kan lo support hi a tha a, a pawimawh a ni tih hi ka sawi duh a.

Buhfai sum leh paia chantir nachang kan hriat thar avangin kan ramchhung leilet-a kan thar zawng zawng 2/3 hi chu hnam dangten min neihsak tlat mai a ni. Tunah erawh chuan keimahni tual zawlah ngei godown-te, a herna tha tak mai han siam a, chuta buhfai dahthatte an han tum ta a. Hmanah kan hotute tirhin... (Deputy Speaker : I hun a tawp) (Pu Deputy Speaker, hemi chauh hi ka'n sawi lawk, khawngaihin) khawchhak lamah kan kal a, Manila khuaah kum 20-100 atan te khian buhfai an dahthatna lian pui pui mai te kan en a. Vawiinah pawh hian kan ram leilet atang leh kan ram atanga kan tharchhuahte hi lei ve ni zawk ta se. Chutiang tur chuan a herna hmun te ruahman ni sela. NEDP hnuiah hma kan sawn dawn ni in a lang a. Tunah hian chuta tana ruahmana an

han siam mek, khawl lian dahna tur nuai 80 an dah ran mai a, chutah Kolasib district chhungah dah an han tum hi chu an ti fuh char char ngawt ang. Lo neitute mai ni lovin buhfai eite tan malsawmna an ni dawn tak tak ta ni in ka hria. A chi zawng zawng pawhin Bagha a pel ang tih hun ang kha a ni ta lova, a tak taka tharchhuah kha tunah chuan tih an han tum ta a, a lawmawm ka ti a. Mizo fate ngei tana ei theih tura ruahmanna keng tel ruahmanna hi ropui ka ti a, chu chu ka'n sawi tel a ni. He Department kaltlanga oil palm hmasawnna hi Pu Deputy Speaker, a ropui ka ti tak zet a. Kum engemaw chhung lek atana an hmasawnna lo kal hi a number sawi diak diak a ngai lovang a, hmasawnna hmuh theiha a lo awm hian min ti lawm a. Kolasib leh Mamit district pawh han sawi tel ta ila, oil palm hmun nei, sum hnar bera hmang chhungkaw tam tak, chhungkaw 800 chuang mah in Bukvannei-a oil palm herna khawla an tharchhuah nen ngei mai chhungkua an han enkawl leh thenawm khaw vengte tan pawh malsawmna an ni ta. Chuta tana pawimawh em em mai chu oil palm rate an hrall ah hian district pahnihte lakluh zat hi vaibelchhe 7 a tling thelh a ni, vaibelchhe 6.9 lai distict pahnihte atang chauh hian oil palm atangin an lachhuak tawh a. A ram puma vaibelchhe 7 vel chauh a nih lai khan, he kan district pahnih malsawmna hian kan ram ah hian malsawmna min thlen tak zet a ni tih hi ka sawilang duh a.

Pakhat lehah chuan tlawnm zawka Pu Deputy Speaker, tractor leh leilehna hmanrua hman theiha an buatsaih hi ropui ka ti em em mai a. A bik takin ka bialah phei chuan, zau tam taka hlawhtlinna kan hmuh rual chuan Dumluu zau, Kolasib-te phei khu chuan kum tin mai hian, he ruahmanna thar Minister leh Department-te'n remhre taka an tihna avang hian, kar tin an thlai thar leh tlai tin an feh haw leh an kal lam hi, (zing lam nen), he tractor hmang hian an feh in an thlai tharte hi an phur haw ta a ni. Infrastructure lama hmasawnna te hi hmuh theihin a awm a, technology lama an hmasawnna te, ram danga an thil chawk luh, kan district chhung ngeia experimental-a an buatsaih mek te khu a nghahhlelh awm in ka hria a. A tak ram thleng turin kan sokarin mipuite hnena a intiamna ang ngeia thalaite khawvel thar a din na mekah hian, Agriculture Department kaltlanga thalaite tana hnathawh tur siamsak tam tak hmutu han nih hi a lawmawm ka ti a. Hei hi vawiinah hian sawi loh theih loh a ni.

Chutih rual chuan department dang zawng zawng kan sawite ang bawkin harsatna an tawk a ni. Tunah hian kan policy thar NEDP bakah hian scheme dang 11 lai

mai Agriculture hian enkawl an nei a. Vawiinah hian NLUP atanga Gypsy pakhat hi district ah te hian an nei a ni mai a. Kan farmer-te hian kan officer an hmuh hnaih ber hi, 'kan huan ah, kan zau ah min kalpui rawh', an ti reng mai a. Chuvangin lirthei hi ngaihtuah sak theih ni se a lawmawm hle ang.

Chumi bakah chuan Field Officer leh staff-te post ruak hnawhkhah hi, department kan sawi zawng zawng, Minister zahawm tak pahnih demand ah hian kan pek belh an ngai a ni. Agriculture Department chu ka sawi ang khan khatiang kha an ni a, department dang te pawh hetah hian ka sawi nghal vek a ni. Field officer-te tana a pawimawhna hi kan hriatthiam a pawimawh a. Pu Deputy Speaker, hun min pek belh a ka lawm hle a. Minister zahawm tak pahnih Pu R. Lalzirliana leh Pu PC Lalthanliana te'n an demand rawn pharh hi House hian lungrual takin pass ila, midang tan leh chhungkaw tin tan leh, a te ber atanga a lian ber thlenga malsawmna department an ni a. Chuvangin anni demand hi pass ang u tiin ka thlawp thu ka rawn sawi a ni e. Ka lawm e.

DEPUTY SPEAKER : Dr. K. Beichhua leh Pi Vanlalawmpuii an phar rual a, Dr. K. Beichhua i lo sawm hmasa ang.

Dr. K. BEICHHUA : Pu Deputy Speaker, ka lawm e. Demand no. 7-na Excise & Narcotics sawi hmasa ila. Kan hriat angin kan ram ah sualna nasa takin a pung a, kan thalaite, a bik takin, ruihhlo lakah hian nasa takin an tlu lut a, sualna ah nasa takin an inhnim tih kan hria a. Chung zinga pawimawh deuh nia ka hriatte chu, vawiin kan dinhmun angah hi chuan zu kan ti leh lo thei lova. Zu in a thlen chu insum theih lohna, insum theih lohna in a thlen chu hmeichhiat mipatnaa fimkhur lohna, chumi in a thlen chu HIV/AIDS a ni tih kha ka sawi leh duh a ni. Chutiang chuan tuna kan ram dinhmun ah chuan India ram pumpuia HIV/AIDS hluarna ber state pahnihna ah kan awm a, a veiawm ka ti hle a. Chu lovah pawh drugs-a inchiu leh drugs avanga inkaichhawn te leh thil dang, thil tha lo tam tak te pawh kan ramah hian nasa takin hmuh tur a awm a ni. Chung avang chuan Excise force hi tihchak a ngai in ka hria a. Kan Minister chak tak hian theihpatawp han chhuah se, tun aia chak zawka kan Excise force hi kan tihchak a, kan thuam hi a pawimawh hle in ka hria a ni. Tuna kan ram dinhmun ngaihtuah hian, Excise ang ngawt hi ni ta ila, kan YMA-te, kan NGO-te hian theihpatawp in hma min lakpui lo ta se, kan ram dinhmun hi a va chhe dawn em tih hi ka ngaihtuah thin a ni.

Chuvangin Excise force-ah hian tun aia chak zawka hma lak hi a tul hle in ka hria a, chu chu ka sawi duh a ni .

Demand no. 16-na, (sawi zung zung mai ila, hun a chep a), Home (including Prison & Sainik) tih kha a ni a. Kan budget-ah pawh pawisa tam tham tak Home-ah hian a rawn awm a. Chutih lai chuan, vawiina kan ram dinhmun police post ruak 2000 deuhthaw kan nei te leh infrastructure leh thil dang neuh neuhte pawh hi, kan police-te hi police tha tak tak vek an ni a. Han thuam deuh hlek a, an hmakhua tlemin han ngaihsak deuh hlek ta ila chuan, India ramah pawh hian police tha ber ber an nih theih ka ring a. Chuvang chuan, hemi kawngah hian kan Minister hian tun aia chak zawk hian hma min lak sak se a tha hle in ka hria . Chu lovah lawmthu sawina tur a awmin ka hria a, Siaha Police Station kha kan siamthat sak dawn tih hmanni ah kan Minister zahawm tak hnen atangin kan hria a, lawmthu ka sawi a.

Chu bak ah kan quarter-te leh, (ka sawi fo tawh thin angin), kan District Jail-te phei khi chu tunlai khawvel jail atan chuan a ti lutuk lo maw aw tih tur dinhmunah kan awm tawh a. Kan sawi tawh ang khan, kan mitangte khi an fel hlauh a, an tlan chhuak lo a ni mai a. Tang sual deuhte phei chu nei ila tlanchhuah theihna tur dinhmun ah kan jail dinhmun khi a awm a ni. Tin, fur a ni chho leh dawn a, a thawktu staff, an office-te leh an quarter-te khi fur khawchhiat ah chuan awmna tlak alawi a ni thin lova. Chuvangin, kan Minister zahawm tak hian hei hi khawngaihtakin min hriat sak se, theihpatawp min chhuah sak a, hma min lak chhoh sak zel turin ka ngen duh bawk a.

Demand no. 31-na kha han sawi leh ta ila, Agriculture. Mizoram population 60% chuang hi agriculture sector-ah hian kan innghat a ni. Chutih lai chuan buh kan tharchhuah hi, keimahni eikhawp kan tharchhuak lo tih a hre tlangtu vek kan ni a. Vawiina kan buhfai mamawh hi metric tonne 1,80,000 vel a nih laiin, keimahni hian metric tonne 62,089 vel kan tharchhuak a. Kan mamawh zat tharchhuak tur chuan metric tonne 1,18,011 tharchhuah a ngai a ni. Chuvangin, vawiinah hian Centrally Sponsored Scheme ang te, thil dang dang, NLUP ang te pawh, kan hmalakna tur sum leh pai, kawng hrang hrang atanga kan dawn atangte pawhin kan zavai hian tun aia kan hmalakna ah chak lehzual in ke pen ta ila, Ministry kan ni emaw, official kan ni emaw, mipui lam kan ni emaw. Chutiang chuan kan ram kan intodelhna kawngah hian hmasawn a ngai hle a ni tih hi ka lo ngaantuah thin a. Agriculture-in a tum chu chaw a kan intodelh te, oil thar

chhuah a, mahnia oil production rin tlaka ke pen te leh kan ram leilung chhe mek te venhim a, tha taka enkawl hi kan tum tur leh Agriculture Department in a bik taka a tum tur a ni tih ka sawi duh a. Heng ti hlawhtling tur hian sorkar chauh ni lovin mipui lam pawhin awareness kan neih a tul in ka hria a. Hemi awareness tur hian department lam pawh hian theihtawpa hma kan lak chhoh zel a ngai in ka hria a ni.

Demand no. 38-na kan sawi zui mai ang a, (hun a tlem avangin Pu Deputy Speaker). Rural Development in a tum chu thingtlang lama Socio- Economic dinhmun ti hmasawn tur leh BPL te dawmkan a ni. Chutiang tum ran chuan RD department hian hma a la mek a ni . Chutiang tur chuan central lam atang pawhin scheme leh programme hrang hrang nen thingtlang lam ah pawh kan thawk a, chung zinga lar zual deuh te chu MGNREGA, SGSY, IWDP, IAY leh BADP kan tih ang chi te hi thingtlang lamin kan innghahna ber an ni ti ila ka sawi sual ka ring lova. Chutih lai chuan vawiina MGNREGA kan tih hian kumin chhunga 2015 – 16 ah ni 100 inhlawhna ah hian ni 21 chauh kan inhlawh mai hi engatinge tih hi kan Minister zahawm tak hian min react bawk se ka duh a. Hei hi India ram in an introduced hnu hi chuan thingtlang lama MGNREGA-a innghat hi kan tam em em a. Chuvangin, he lai hi tha leh zual leh enge a dik lo lai te min enfiah sak a, a diklo lai te siam that dan kawng a awm chuan hma lak a tul hle in ka hria.

Tin, kan hnathawh hrim hrim hi RD chauh ni lovin, programme dang dang kan implement-ah hian thil pawimawh deuha ka hriat chu, monitoring leh evaluation tha hi a niin ka hria a. RD department bika kan hma lakna ah te pawh hian monitoring hi duh ang in a chakin kei chuan ka hmu lo va. Chuvangin a monitoring lamah hian tun aia chak zawka hma kan lak hi a tul hle in ka hria a ni.

Demand no. 19- Local Administrative Department, hei hi mihring khawsak kan thang chho zel a, hma kan sawn zel a. Chutah chuan recreational activity mamawh chho zel tur kan la ni dawn a ni. Hna nasa tak in kan thawk ang, recreation pawh kan la uar zel ang, chungte avang chuan recreational activity kan neih ang te, Park leh Picnic Spot kan neih ang chi te tichangtlun a, chumi piah lama Rules & Regulation mumal tak neia kan kal hi hun tawh viau in ka hria. Hma kan lak chhoh turah hian Rules leh Regulation mumal tak nen kal chho thei ila tih kha Pu Deputy Speaker, ka sawi duh a.

Demand no. 29- Social Welfare department hi sawi leh ta ila. Social Welfare hian naupang, hmeichhia, senior citizens leh rual banlo chawikan kawngah hma an la mek zel a. Chutihlai chuan, tun dinhmunah rualbanlote tana hamthatna kan neih ang te te kha a harsa deuh ta nge ni, kan neih theihloh ang chi te te te pawh hi a awm nualin ka hria a, Pu Deputy Speaker, kan bial thingtlang kilkhawrah beng thalo bengdar mamawh em em te leh zeng, kal hleitheilo, stretcher mamawh tam tak kan nei a. Chungah te pawh chuan kan Minister zahawm tak hian hma nasa takin min lak sak ta sa sa, tun-aia chak zawk hian min lak sak se. Bengdar te leh thil dang dang rualbanlo te'n an mamawh ang chi kan inpek thin te pawh kha min pe leh thei se mipuiin kan hlawkpui viauin ka ring a ni.

Tin, Social Welfare hian kan hamthatna tur tam tak a thawk a, kan sawi seng lo vang a, chung zinga pawimawh deuha ka hriat chu nutrition supplement kan inpek hi ICDS through hian kan inpe in ka hria a, hei hi theih chu ni se Health department nen in convergence hian kal ta sela, ICDS lam hian food supplement tha tak tak an sem a, monitor awm tak tak thei si lovin, manpower indaihlo ta na na chu thingtlang lama raipuar kan pek ang chi calcium leh Iron Folic Acid ang chi te pawh hi, Social Welfare atang pawh hian pek ve vek a ni in ka hria a, hengte pwh hi kan inpek thuah chang te pawh hi a awm ang em aw tih ka ngaihtuah a. Chuvangin Health department nen hian tun aia thawh ho na tha zawk neiin hma lak ni se a tangkai awm mang e aw tih te min ngaihtuah tir a ni.

Pu Deputy Speaker, demand no. 32-na Horticulture department hi Pu Deputy Speaker, kan ram tan chuan kan din khawchhuahna tur leh nakin zela hma kan sawnna tur ngaihtuah hian scope kan neihna tur ber department a niin ka hria a. Tuna kan kal chin angah te hian ngaihtuah ta ila, Centrally Sponsored Scheme leh NLUP atang te pawh hian sorkar-in theihtawp in hma a la chho a, chumi piah lamah chuan MIDH kan tih ang chi leh thil dang tam tak hmalakna kal mek pawh a awm a ni. Tun hma ngaihtuah chuan kan zia chho ve viau tawh a, mahse vawiina kan zia kan tih hi duh tawk mai lova, hma la chho zel tur kan nihna hi kan rilru ah awm sela. Economic Survey report atang hian han en ta ila achievement chu a tha thawkhat viau a. Chutih rual chuan Subject Committee anga kan han enkual te leh kan han bih chian hian kan report ang chiah hi a ni thin em tih te pawh hi zawhna a awm in ka hria. Chuvangin helai pawh hi a pawimawh

bera ka hriat chu, monitoring leh evaluation hi chak zawkin kal ta ila a tha awm mang e aw tih hi ka hmuh dan leh ti ila tia rawtna ka rawn siam a ni e. Pu Deputy Speaker, ka lawm e.

DEPUTY SPEAKER : Pi Vanlalawmpuii Chawngthu.

Pi VANLALAWMPUII CHAWNGTHU : Pu Deputy Speaker, vawiinah kan Minister zahawm tak takte demand kan sawiho dawn a. Rawn sawi ve ka duh chu demand no.7 Excise & Narcotics-ah khan kan member zahawm tak Pu K. Sangthuama khan a rawn sawi a. Hei, zu kan zuar a, zu zawrh control-na hi chak leh zuala kalpui ni thei se tih kha ka rawn rawt ve duh a.

Tin, demand no.16-na, hmanni deuh mai ah khan Home Department hmalakna in Sainik School te kan han tlawh a, a ropui em em a ni, a hmuna kal phei chuan. Excursion neihna tham a ni. Nilenga kal khan kan fang seng lova, hetianga Sainik School Mizoram chhungah ngei, kan Chief Minister leh kan Home Minister chak tak te hmalaknaa kan han nei ve thei tur hi a ropui a, chu mai ni loin India ram puma la awm ngai lo hmeichhe luh ve theihna tura hma lak mek a ni te hi a lawmawm ka ti a. Home Department-a khimi hmun enkawltute an fakawm hle a. An tui chilh a ni tih kha a hriat a, an hnathawhnaah an fakawm em em a. A han tlawh pawh kha a manhla em em a ni. School naupang angte pawh hian excursion neia han kalna hial tur khawpa ropui a ni a. Tunah la peih fel loh deuh ni mah sela peih fel chinah pawh hian ni khat thil thua fan sen loh thil a awm tawh. Chutiang ang development ropui chu he kan ram chhung ngeiah kan han hmu ve hi a lawmawm ka ti a ni.

Tin, Home Department hna thawh hi a ropui ka ti a. Heroin man chungchangah te theihtawpin tan an la a. An man thu hi kan hre reng a ni. A thawktute an fakawm em em a, rangkachak, fake currency-te, pawisa lem man chungchangah te. An hnathawhna hi a fakawm in fak an phuin ka hria a, ka rawn tarlang ve duh a. Hei hi a chhan chu kan Police kut phuar ve loh vang a ni. Tin, hmeichhe police chungchang kha hmannah ka sawi tawh a. Kan Home Minister zahawm tak kha hmeichhiate min duhsaktu sorkar kan nei ta sa sa, tun budget tharah hi chuan hmeichhe police min laksak tur khan kan rawn ngen nawn ve leh a. Tin, motor enkawlna chungchangte, uniform chungchangah te he budget hi a tha tawk in a lawmawm hle a ni.

Tin, kan Home Minister kaihruaina hnuiah hian Mizoram hi a ralmuang a ni tih hi hriat thar leh tulin ka hria a. Kan Home Minister chak takin he Department a kaihruai hma kha chuan Mizoram chhung mai ni lo, Aizawl khawpuiah leh Aizawlah kher lote pawh hmarchhak hel hrang hrangten bu an khuar kha ni maiin a hriat a. Tin, Tuikuk (Bru) helten vawi duai lo Mizo mipuite min rikrap a nih kha. Mahse kan Minister chak takin a kaihruai hnu ah Tuikuk (Bru) helte pawhin Mizote ngei min kidnap a, kan police-te pawh an lambun a. Mahse, tlanna sum pe lovin police tha chakna hmangin heng helte pawh hi tukdaih an ni zelte hi a ropui ka ti a. Kan Home Minister hian tlanna sum, hel hnena kidnap-te tlanna sum pek chungchang pawh sawi tur a nei teuhin ka ring a, hetiang anga sum pe lova kidnap-te chhanchhuah an han ni hi a ropui em em a, ka rawn sawi lang ve duh a ni.

Tin, Congress kaihruaina hnuiah hian he Department hi a kal zawt zawt a ni mai a, rawrlala che thinte lakah nasa takin hma a la a. Ram dang, state dangte hual kan ni chungin kan Police-ten Home Minister chak tak kaihruaina hnuiah hmingthatna nen hel pawlte an tudai zel a ni tih pawh kha lo hre thar leh ta ila. Naktuk hi nikum hmasaa HPC (D), kan Zo hnahthlak puite ngei Manipur-a hel pawl awmten min lo lambun cham kha a lo ni leh tawh a. Vawiinah hian rilruah hian a thar hlein ka hria a. Hemi chungchangah pawh hian kan Home Minister leh kan Chief Minister zahawm tak ten an Mizo mipuite thlavang hauhnaah leh hetiang anga helten mahni Mizo puite chunga an thil tih duh lovin ‘ha aiah ha’ tih duh changte pawh an nei vein ka ring a. Mahse Mizo leh Mizo vek kan ni a, inremna remna leh muanna a awm theih nan tiin tunah hian theiawp an chhuah a. A zawng zawngin lungawi kim a har a. Amaherawhchu he Mizoram leh Mizo hnamten remna leh muanna kan neih theihna turin tlawm a tul hunah pawh tlawm ngam Chief Minister kan neite hi a ropui a. Vawiinah pawh he inbiakna te hi hlawhtling taka kalpui zel a nih ka beisei a. Naktuk mai kha inkahna cham a lo nih leh takah chuan rilruah a thar a, kan thisen zawmpui kan Mizo ngeite nena inrem hi kan tan a pawimawh em em a ni tih lai te hi ka rawn sawi kai ve duh a ni.

Tin, a dawt lehah chuan demand no 31-na, Agriculture chungchang, hmanniah khan kan sawi tawh a. Link road-hi thenkhat chuan kan han sawi hnawm deuh thin a. Amaherawhchu link road pawimawhzia hi a hminga thingtlang bialtu nih chuan

kan hria a. Henga Department-in hmalakna chak taka a kalpui zelte leh NEDP-a heng link road laihna sum dah a ni te hi a ropui ka ti a. Ka hmaa sawi member zahawm tak Pu PC Zoram Sangliana khan a rawn sawi tawh a, heng kan lo neihna leh kan eizawnna kawnga hma kan sawn leh zel theihna tur chuan vawiinah pawh tractor tihte kan inchuh nasa a ni. Hengte hi tam lehzuala loneimiten tangkaia kan hman thin hi he department hian subsidy-in rawn ti leh thei se tih ka rawn sawi ve leh a ni.

Demand no. 38-na Rural Development chungchang hi, Rural Development-in a huam bial tan hi chuan a lawmawm em em a ni. School thate kan neih ve theih phah a, School building tha te, Hall- etc, sawi tur a tam lutuk a ni. Hetiang department-in hna ropui tak an thawk thinte hi a lawmawm ka ti a. Tin, BDO te an fakawm ka ti a. Thangthar zawkte hi an dik em emin ka hria, ka hmuh ve chinah hian. BDO fel tak tak ten he an hnathawhna huam chhunga an thawk thinte leh hna te pawh an duh tha te hi an fakawm em em a ni. Tun hma ami te ka sawi chhiatna ni lo se, tunlai thangthar BDO te hi hna ah te hian an fair em em a ni tih kha kan sawi lang ve a. He department enkawltute leh official-a an hotute thawh rah a ni takzet a ni .

Tin, LAD Department-ah hian NEDP-ah hna engemaw zat bial tinah kan han nei a. Heng NEDP kaltlanga LAD-a hna kan han thawk turte hi a ropui em em a. Hetiang anga LAD-in hna an han thawh hi han highlight ve ka duh a ni.

A dawt lehah chuan demand no. 29-na Social Welfare chungchang kha sawi leh ila. Social Welfare hi keini Women Commission min enkawltute an ni a. A hmasain Women Commission-ah hian sum dah hi a tlem em em a. Hei aia chak zawka Commission hi thuam a nih theihna turin hma lak ni thei se tih ka rawn rawt a. Proposal te pawh kan han thehlut ve thin a, tun thlengin a la hlawhtling thei lova. Helai hi chu Minister zahawm tak hian min hriatpui sela. Tin, office building hi hei aia pangngai deuh zawk min ngaiantuahpui tur khan ka ngen a. Social Welfare Department hi mi mangangte, tar chak lo leh pianphunga rual ban lote tluk luhna a nih avangin sum hi duhthusamin a tam lo ka ti ve a. Tin, Home hrang hrang enkawl an neihte hi kan lo hriat tlan ve atan, Old Age Home te, Handicapped Training Centre te (mipa leh hmeichhe tan), Residential Institute and Training Centre te, Protective Home te hi state sorkar enkawlna hnuiah a ni a. Hengah te hian an mess hi duhthusamin a tha tawk lova. Hemi atante hian sum tam zawka dah theih ni se tih ka rawn rawt duh a.

A dawt lehah chuan Women Welfare hnuiah hian sum dah hi a tlem em em bawk a ni. Hmeichhiate hmasawnna tura thawktu ber department a nih avangin Women Welfare-ah pawh hian hei aia tam hi sum dah ni thei se. Ka sawi tawh ang khan engkimah mi chhumchhia leh harsate tluk luhna, mi mangangte tlanluhnna an nih avangin ka hma ami MLA zahawm tak Pu K. Beichhua'n a rawn sawi ang deuh khan wheelchair te, bengdar han tih ang chi te pawh kha nei thei leh sela a lawmawm ngawtin ka ring a. Tin, he department-ah hian hlawh hi a awm tha a, amaherawhchu hna thawhna tur sum hi a tam lo em em mai te hi a manganthlak a. Tin, Women and Child Department thar siam tumna a awm tih te hi kan lo hria a. Hengte hi chak zawka hma lak ni thei se, Department hrang neih chuan hmeichhiate leh naupangte tana hmathatna leh mahni pawh lo in develop theihna tur kawngtha zawk a ni a. Chuvang chuan hemi ah pawh hian eng chen nge kan thlen tawh a, theihtawpa hma min laksak zui tur khan Minister ka ngen ve leh duh bawk a ni.

Tin, Horticulture Department, demand no.32-ah khan tui dakhawlina tih ang chi te hi thingtlang ah chuan a tangkai em em a, kan lawm a ni. Chuvang chuan hemi kawngah pawh hian theihtawpa hmalak chhunzawm zel ni se a duhawm ngawtin ka ring a.

Tin, kan bial Keitum-ah pawh tunah lakhuihthei-a eizawng tam tak kan awm a ni. Chutah chuan lakhuihthei han stock-na tur ang chi kudam te kan neih loh avangin kan Minister hnenah kan dil a, anin kan harsatna te hria in vawiinah pawh hemi stock-na tur kudam te min sak sak dawn a, a chungah lawmthu ka sawi a.

Chutiangin N.Vanlaiphai-ah pawh staff quarters te min sak sak dawn a ni tih te kan hria a, bial hmingin lawmthu ka sawi a. Horticulture hmanga thingtlang loneitute, kuthnathawktute eizawnna, hmasawnna tam tak sawisen a ni lo ang a. He department hi a pawimawh em em a, a fakawm a. Sum hi tuna budget-ah hian duhangin a tam tawk lo ka ti a, ka rawn sawi lang a ni.

Pu Deputy Speaker, kan Minister zahawm tak tak pahnih te demand hi ka rawn thlawp ve a ni e. Ka lawm e.

DEPUTY SPEAKER : Chawhma hun minute 5 vel chiah a awm tawh a. Aw, Pu Nihar-a.

Pu NIHAR KANTI CHAKMA : Pu Deputy Speaker, ka lawm e. Thu tam tak sawi tur erawh chu ka nei lemlo a. Ka ngaihmawh zual te tawite hi ka lo sawi lawk ang e.

Vawiin chu senior Minister pahnih(2) demand kan sawiho mek a, a lawmawm a. Anni pahnih hi an chak em em mai a, an fakawm bawk a, an chungah pawh lawmthu ka sawi a ni. Chumai bakah an departmental staff te an fel em em a, an chungah pawh lawmthu ka sawi a ni. Pu Deputy Speaker, a bikin ka'n sawi duh chu Rural Development demand no.38 chungchang a ni a. Rural Development hi thingtlang chawikanna department a ni a, ka bial example atan sawi ta ila, kawng hrang hrangah hian hma a sawn mek a. Mahse harsatna pakhat an neih chu ka bial chhungah hian RD Block hi kan neilo a, chuvangin mipuiten harsatna hrang hrang an tawk nasa a.

Thil pakhat lawmawm chu tunah Tlabung-ah RD Block dah thei turin official verification report i phalnain an mamawh nachhan ka lo chhiarchhuak ang e. Pu Deputy Speaker, i phalnain 'People living in the side of the river are economically, mentally and physically backward. In order to parallel with the mainstream, certain radical changes have to be introduced and one of the most important missionary in uplifting the region would be creation of additional RD Block with Tlabung as its station. This may help to minimalist difficulty faced by the public towards transportation cost in food and lodging with considerable time consuming vice versa, optimize the government activities in various govt. scheme and private sector.'

Therefore, it would be highly appreciated if new RD Block is created in this century old Tlabung town in order to improve the living standard of the entire region.'

Pu Deputy Speaker, hemi ka chhiar nachhan chu ka bial pumpui hi RD Block pahnihah kan then a ni. Thenkhat chu Bunghmun RD Block hnuiah an awm a. Thenkhat hi Lungsen RD Block hnuiah an awm bawk a. Tunah sorkar ang zawngin hamthatna hrang hrang entirnan NREGS te, PMAY te a lawmawm rualin Tlabung atangin a draw tura an lo kal erawh chuan pawisa hi a chanve vel hi an ei zo thin a ni. Chuvangin hei aia ka bial hi hma a sawn theih nan RD Block hi dah thei se ka lawm khawp ang. Kha kha mipui duhdan a ni a. Chubakah border area a lo ni bawk a, Minister-in khawngaihtakin hei hi min chhinchhiahsak thei se ka lawm khawp ang.

Chubakah Pu Deputy Speaker, Home Department chungchang kha, Tlabung-ah ropui deuhin Thana te an sa zo tawh a, electrification te pawh an ti mek a, an la hawng lo deuh a. Chuvangin Minister zahawm tak hian hawng thei se ka lawm khawp ang.

Demand no.31 Agriculture hi ka bial ah department te, official te pawh an fel khawp mai. Kawng hrang hrangah hma an la mek a. A chhan chu agriculture potential area a ni a. Hemiah hian hma la thei se a lawmawm zual ang.

DEPUTY SPEAKER : Ngawi rawh aw, hei dar 1 a lo ri ta a, kan chawlha hun a. Sentence hniih khat in i zo thei tawh mai em?

Pu NIHAR KANTI CHAKMA : Zo mai ang, reilote a ni e, Pu Deputy Speaker. A dang custom hiring center ka bial chhungah min dah thei se ka lawm khawp ang.

Point hniih chiah kan sawi duh chu Social Welfare Department chungchangah a ni a. Pu Deputy Speaker, kan Minister hi a fakawm a, kawng hrang hrang ah ka bial chhungah an Department hnuaiah hma a sawn zel a. Ka hriat sual loh chuan under Article 271, tribal te hamthatna hi hmun hrang hrangah model residential school hi an sa mek a. Kan bial hi sawi ta ila, sub division ang zawng pawhin sawi ta ila education-ah kan backward nasa a. Chuvangin ka bial chhungah ngei hian hetiang model residential school hi dah theih dan a awmlo maw? Hei hi min sanction theih chuan ka lawm khawp ang. Min dahsak theih chuan educationally pawhin hma a sawn theih dawn a ni.

Hmanniah LAD zawhna leh chhanna te kan sawi nual a, ka ngaipawimawh lutuk Pu Deputy Speaker, a bikin public toilet leh zunin, department hrang hrangin an sa ve thin a, mahse enkawl zui ngai loh a ni a, a rimchhe lutuk a. Kha kha engemaw tih dan, kum khatah engemaw zat token ang deuh in maintenance dah theih dan a awm lo maw?

Hemi vang hian Mizoram hmel te pawh a chhe thei a ni, unhygienic ang zawngin an ngai thei a. Entirnan, LAD hnuaiah te pawh hmun hrang hrang ah zunin leh public toilet hi an sa a, mahse a hman tlak loh a ni, a rimchhe lutuk. Chuvangin Pu Deputy Speaker, Minister zahawm tak hian hei hi min chhinchhiah sak se ka lawm khawp ang.

A tawp berah sentence khat chiah Pu Deputy Speaker. Problem ka neih chu LAD hnuaiah ka bial a awm si . Amaherawhchu Lunrang Village Council hnuai a lo ni

leh si a, a buaithlak a ni. A chhan chu VCP te chu official in a executive agency-a kan ngaih a ni a. Ka bial ah awm bawk si, mahse Pu Dinga bial VC hnuaiah an awm ve thin a. Khami kha VC hranga min dah theih dan a awmlo maw tih kha kan zawt a ni, nangmah kaltlangin Pu Deputy Speaker. Chu zawng chu ka sawi theih ni se, ka lawm e.

DEPUTY SPEAKER : Awle, kan chawl h a hun e. Kan chawl rih ang a, dar 2-ah kan thukhawm leh dawn nia.

SPEAKER : Awle, demand sawihona kha kan chhunzawm ang a, mi panga in chawhma khan an sawi tawh a, paruk na atan tunge sawi ang le? Pu Rinawma.

Er. LALRINAWMA : Pu Speaker, ka lawm e. Vawiin ah demand hrang hrang te kan sawiho leh thei a, a lawmawm khawpin ka hria a. A hmasa in demand no.31 Agriculture hi sawi ka duh a.

Kan ram hi lo neih lama eizawng tam ber kan ni a, a pawimawh em em a. Tlema zawng han tih rik ve ka duh chu, Agriculture tana pawimawh em em mai link road chungchang han sawi ka duh a. Ka bial ah pawh tun tum khan 7 lai a chhuak a, scheme dang nen 8 zawk a nih chu, a lawmawm hle in ka hria a. Amaherawhchu heng link road kan laih hian 1 km ah ‘5 lakh an dah a. Helai ah hian thil buaithlak deuh mai a thleng in ka hria a. Kan bial khaw pakhatah hian link road an lai dawn a, km 1 ah cheng 5 lakh an ti a, an laih dawn khan a lo lung em em mai a, contractor khan ‘lung chu ka laih tur a ni hlei nem maw le’, a ti a. Tichuan, a dangah an han sawn leh a, chu pawh chu a lo lung leh zel si a, a tawpah phei chuan khaw kar kawng hlui kha an hai fai ta ringawt mai a. Khatiang kha thil thleng thei a nih avangin he laia link road laih chungchang kan kalpui dan hrim hrim hi ennawn a tha awm mang e ka ti a. Thil tha tak kan va ti a, ruahmannna kan va siam lai khan, lung a lo awm a, entirnan PWD te chuan soil class an lo then ta a, buaina awm lutuk lo in a kalpui theih ta a. Agriculture leh Horticulture te chuan khatiang kha a lo nih ve loh avangin, contractor ten lung an han sut khan, ‘lung chu ka chan a ni hlei nem’, an tih chuan chhan hi a har nak tawh mai a. Chuvangin he lai harsatna hi, link road laih kan tum tan chho bawk a, khatiang khan ruahmannna kan siam kha a tha awm mang e aw ka ti deuh a.

Demand no.16 Home chungchangah hian lawmthu sawina tur ka nei a. Kan bial chhungah khian District Jail Chhiahtlang khua in an lo nei ta te hi a lawmawm hle in

ka hria a. Tin, Sainik te pawh hawn chhoh a lo ni zel a, an kal chhoh zelna ah te pawh lawmthu ka sawi duh a. Amaherawhchu Home chungchangah hian tun thlenga sawi ka duh lai chu, titi ah te, thil lo chhui chiang se kan Minister zahawm tak pawhin, hotu sang lam atanga mimal thila police rawih sawi la bang thei lo lai erawh hi chu Pu Speaker, ngaihthlak te pawh a hahthlak ve a, kan len vel na ah te pawh. Heng hi chu lo enchiang se tih kha ka sawi duh a ni.

Demand no.38 RD chungchang ah hian, thinglang lama awm tan phei chuan department pawimawh tak te a lo ni a. IAY thlan dan hi ngaituah tham a awm deuh em aw, ka ti a. Kan bial chhungah pawh khian IAY in kal thelh, entirnan, Gram Sabha an lo inthlang ta a, wait list an siam ta a ni. Khami wait list-ah khan kan tih tawh rau rau chuan mi ten 1,2,3,4 ka ni, an han ti a. In kal thelh zeuh zeuh te hi a awm leh thin a, heng hi a hrehawm khawp mai a, kan bial chhungah pawh hmun hnih ngawt ah complaint a rawn lut a, thil hrehawm tak a ni. Hei hi mirethei chanpual a ni a, IAY guidelines-ah chiang takin a inziak a, Section 4.4-ah ti hian a inziak a ni Pu Speaker. Finalization of annual select list of beneficiaries: - “In order to finalize the annual select list of beneficiaries, it would be expedient to compete the process mentioned in para 4.3 and place the 5 year priority list before the Gram Sabha and draw the annual select list based on the target assigned for the habitations and for scattered household’ a ti a, draw tur kha niawm tak a ni a, Pu Speaker. Chuvangchuan a hmu tur a indawta an lo tar tawh ang kha chu in kal thelh lo a, a nih tur indawt anga kan pek ngam hi chu a tha mang e aw tih kha ka sawi duh a ni. Hei hi guideline-ah fel takin a in ziak a, a kal kan te tan khan a na lutuk a ni. Anmahni hun a lo thleng ve dawn emaw tih lai kar a, a in kal thelh a in kal thelh chuan a fel lo a ni. A phu ngei leh a dawng ngei turin dawng mai se, a nih dan tur a ni ta lo kha a tuartute tan a nat avangin kan Minister zahawm tak khan min lo hriat sak se ka duh a.

Tin, Exice & Narcotics chungchangah hian, nimin lawk khan kan sawi tawh a, kan zu hrall dan hi strict deuh hlek hi chu a tha mang e aw, tih kha rilru ah a awm deuh a. Kan hriat theuh angin 2016-2017 khan Excise duty-ah khan cheng 53 crore kan hmu a, tam tak mai a ni a. Tunah zu in theihna permit nei hi mi singsarih vel bawr kan lo nih a, mi singsarih in chhiah atan ringawta nuai sangthum chuang an in chhuak thei kha chu, kan in hnem viau nge ni ang a, a kal fel lo tih hi ngaihtuah tham tak a tling

ve a ni. A man tak phei chuan nuai singkhat sang nga chuang vel daih mai kha a ngai dawn a ni. Chuvang chuan he laia thil fel lo awm ni a lang laia hi, kan enhian deuh chu a ngai dawn a ni. Kan zuar ta rau rau a nih chuan control lam uar ta ila tih kha ka'n sawi duh a. Engpawhnise kha kha kan Minister zahawm tak Pu Zira chan lama ka sawi theih ni ta sela.

Minister zahawm tak Pu Thanliana chan lam hi sawi ve leh ta ila. Local Administration Department lam hi sawi ka'n duh deuh a. Kan hriat angin Finance lam atangin lehkha kan lo dawng a, Mizoram Finance Commission report pakhatna anga VC hrang hrang hnena sum pek tur kha kan lo hmu vek in ka ring a. Tah chuan, hemi khaw hrang hrang population hi a chianglo riaua hriatna ka nei a, hei hi chu kan Minister changtu khan min lo enfiah sak se ka duh khawp mai. Entirnan, Chhanchhuahna Khawpui-ah hian mihring hi 135 an awm a ti a, chu chu census 2011 based in a la kalpui si a. Chutihlaiin Baktawng-ah hian a vengpui lamah mihring 1,140 a rawn ziak ta a ni, Serchhip District-a serial no.1-ah hian. Anni hian baseline survey tlawhchhan a rawn ti si a, chutah chuan mi 1,700 vel kan ni e, an rawn ti a. Chutiang zelin Lamchhip lamah pawh hian mi 900 vel bawr angin an lang a, he lehkhabu ah chuan, 2011 census ah chuan mi 700 vel awm ang an ni. Eng ber hi nge kan rin ang tih lai kha min hrilh chiang ula tha in kan ring a. Chutilo chuan pawisa kha an han sem dawn ang a, kan vui viau mai dawn in a lang a ni. Hei hi Mizoram Finance Commission report pakhatna in tehkhawnga a hman, phek 178-na, Mizoram Finance Commission report pakhatna lamah pawh a en theih tho ang a. Tehkhawng hrang hrang ah hian mihring zat hian za a 40 lai kha a chang a. Mihring tam leh tam loh kha he First Finance Commission report hian a dah pawimawh si a, khang mihringte kan dah mil lo chuan, reilo te ah khaw hrang hrang atangin complaint kan dawn mai rin a ni. Chuvangin Pu Speaker, min lo ennawn sak leh se ka duh a. Base line survey population an hmang niin a sawi si a. Hmanni census 2011 nen hian kan kaih-pawlh palh nge ni, a tuartu khua tan chuan thil hrehawm tak a ni dawn a, chuvang chuan min lo hriat sak se.

SPEAKER : I hun i hmang zo.

Er. LALRINAWMA : Pu Speaker, tlemte ka sawi belh leh theih chuan a lawmawm khawp in ka ring a, minute hniih khat lek.

Social Welfare Department lama ka sawi leh duh chu, disability chungchang hi, disability camp hi a hlu khawp mai a, thla hmasa lawk khan ka bial lamah te an rawn nei a, Chhingchhip-ah, a ropui khawpin ka hria a, mi 70 chuang hnenah khatiang disability cash rate te kha pek chhuah a ni a, disability certificate neih loh chuan sorkar atangin hamthatna dawn theih a nih bawk si loh avangin a lawmawm em em a ni. A lehlam ah pianphunga rualbanlo khuaah te kan lo nei a, in ah te kan lo kawl a , rit tak tak, hruai harsa tak te an lo ni a, doctor hnen pan pui zel tur chuan anmahni pawh hruai buaithlak te an lo ni a, khatilai karah khan a hmuna kan neih zel theih kha chuan thil hlu tak mai a lo ni a.

Chulai karah chuan an lo neih tawh thinna ah lawmthu sawi chungin Doctor te nen pawh hian thawhhona tha zawk an lo neih zel nan te, tun aia neih zin theih dante a awm em tih lai hi enchian a tha in ka hre deuh a. Chuti a nih loh chuan pianphunga rualbanlo, sorkar atanga facilities dawng tur ngawih ngawih, mahse disability certificate an neih loh avanga dawng theilo kha thil awm thei a nih avangin khalai kha ka'n sawi duh a.

Tin, Horticulture Department hi tawngkam hnih khat lekin, kan Minister zahawm tak hian kan bial chhungah Baktawng Tlangnuam lamah khian link road tha deuh mai min rawn laih sak a, MLA fund in kan laih bak kha min rawn chhunzawm sak a. Hengte hi a lawmawm kan ti a, helai min rawn chhunzawm sak nan hian 1 km lai min rawn pe a, an lai tha khawp lehnghal a, heng ang chi te hi a manhla em em a, kut hnathawktute awmnaah phei chuan, min rawn duhsak leh zel thei se tih kha ka han ngen nghal bawk a.

Tin, a tawpna tak tak atan chuan sawhthing chungchang hi tlem han tih rik ka duh a.Sawhthing hi Pu Speaker, kan ram tan chuan kan innghahna ber pakhat a ni a, chutiang ni si chu kan buaipui dan hi kan buaipui tawk em aw tih lai hi rilruah a awm deuh a. A chhan chu sawhthing hi a hralthna lama hma lak hi a harsa viau a nih ka ring a. Kan lo nghak ve tawp mai a ni a thingtlang lamah chuan. A la tu tur ten rate an rawn siam hma loh chu kan lo nghak a, kan lo sakuh ser nghah ve tawp mai a. Helai hi a zawng zawng kan theilo a nih pawhin sorkar in mipui te nen tangtlangin tun aia ruahmanna fel zawk hi zawng se a tha khawpin ka hria a. Kan bansan tak tak thei dawn chuang lova. Hmanni lawk khan sorkar committee-in kan zuk kal kual a Karimganj

lamah te. Karimganj pawh khuan khulaia an Chamber of Commerce kan han kawm naah kha chuan direct-a Mizoram atanga lak kha an lo chak ve khawp mai a, sumdawnna kawng ah kan lo la hniam mang e aw tih te pawh kha rilruah a lang deuh a. Engpawhnise hei hi chu ruahmanna tha zawk awm thei se a tha mang e aw ka ti. Kum tin market awm a ni a, Bangladesh-ah te pawh kan zuk kal a, amaherawhchu a hrallh tha tu nih kha a har ve em em mai a, ruahmanna fel a awm loh chuan. Ruahmanna fel tak kha a siam theih ang tih hi kei chuan ka ring tlat a. Tuna hetia a rate nghak tawp lo deuha han in hrilh lawk dan te pawh kha a awm theih chuan ngaihtuahna seng tlang ta ila a tha leh zual awm mang e aw tih kha Pu Speaker, ka'n sawi duh a ni e. Ka lawm e.

S P E A K E R : Pu R.L.Pianmawia.

Pu R.L. PIANMAWIA : Pu Speaker kan Minister te pahnih demand sawi theihna hun min pek avangin lawmthu ka sawi e. A hmasa berah chuan demand no. 7-na Excise & Narcotics-ah hian a lawmawm hlein ka hria a, hetiang-a NGO te nena thawh hona tha kan department changtu Minister-in ruahmanna thui tak neia a kalpui thei hi lawmawm ka ti a. Hei bakah hian tan lakna tura ka'n duh erawh chu a thawktu lam hi an indaihlo hle mai a, thawktu an lak lai kha chuan a indaih thei mai in a lang a. Tunah chuan district hrang hrangah te mamawhna a lo san tawh avangin, heng hre reng chung hian lak belh dan awm sela tih ka'n ngen duh a.

Demand no. 16 Home Department-ah pawh hian lawmthu sawina tur kan nghah hle a, ka bial chhungah quarter mamawh hrang hrang te kan ngen tawhna thin sawi nawn ngai lovin min hma chhoh sak a, a lawmawm hlein ka hria a, hetianga duhsakna min hlan avang hian kan Minister chungah lawmthu ka sawi a. Thil pakhat erawh chu ngen ka la duh chu kan Out Post ho motor hi MZ-01C a la ni vek mai a, a hlui tawh khawp mai a, private ah pawh C hi chu a tlan tam tawhlo khawpin ka hria a, chuvang chuan heng hi C aia tharlam deuh hian min thlak sak thei sela tih ka'n sawi duh a.

Tin, demand no. 31 Agriculture-ah pawh hian lawmthu sawi tur tam tak kan nei; link road te, godown te min ruahman sak a. Amaherawhchu kan link road neih te hi a tluana laih loh chuan a chhawrtu tan a la famkim tawklo em em mai a. Chuvang chuan laih bak la awm te hi khwngaih taka laih zawh dan tur min ngaihtuah sak turin ka ngen duh a. Tin, NLUP-a kan kut hnathawktute a bik takin fu huan neitute kan sawi sak

duh a, hengho tan hian fu herna khawl subsidy-a tih pawh nei zolo hi an la tam khawp mai a, taima taka fu huan nei si fu herna khawl nei theilo hi an la tam a. Chuvang chuan a thlawna pek dan tanpuina NEDP sum atang hian fu her khawl pek theih dan a awm lawm ni tih ka rawt duh a.

Tin, demand no. 38-na Rural Development-ah hian kan tlahniam ta riau mai a, chuvang chuan tan han lak leh theih ni se a thain ka hria a. Rural Development atang hian social education atang leh housing for project staff atang hian thawh tur pawisa ruahman sa thlap a awm a. Social Education-ah hian Kepran Community Hall chei thatna tur ` 68000/- a awm a, chu chu department dangin an lo puk ni ngei tur a ni, tun thleng hian kan la ti thei lova. Tin, housing for project staff-ah hian Darlawn BDO Office sakna tur nuai 15 pawh tun thlengin kan la sa lova, hei hi khawngaih takin a lo hawhbo tute an awm a nih pawhin min koh haw sak leh sela, min han tihsak leh sela tih ka ngen duh a. Tin, convergent uar tur tih a ni ta bawk a, convergent atangin R.D-in kawng a lo enkawl Zokhwthiang kawng te, N.Khawdungsei kawng te, Sunhluchhip, Chhanchhuahna Khawpui kawng leh Upper Sakawrdai kawng kan tih te hi ni 100 inhlawhna atanga PWD nena inkawpa tih dan tur, black top a theih em loh pawhin cement concrete-a min siamsak turin ka ngen duh a. PWD atang pawhin RD-a Project Director-ah lehkha ziak a awm tawh a, chungte pawh chu min lo enzui sakin kawng min dap sak thei se tih ka sawi duh a.

Tin, Social Education atang bawk khan Community Hall sanction min pe a, a lailakah min tawp san ta a, chuvang chuan a mangang thlak hle mai. A bung a sak ngawt kha a luah mai theih si loh a, chuvang chuan sak zawh theihna tur min ngaihtuah sak hram loh chuan BADP ten min cover ve bawk si lova, kan tawp chuan kan tawp fel hmak a ni mai si a, khawngaih takin heng kawngah hian hma min laksak theih dan a awm lawm ni tih kan ngen a ni.

Tin, demand no. 19 LAD-ah hian kan pakai ang a, LAD-ah pawh hian lawmthu sawina tur tam tak kan nei a. Keini bial tan phei chuan EWS te kan hmang tangkai em em a. Tunah step te, zunin te khaw hrang hrangah min hma sak a, hei hi a duhawmin a lawmawm em em chungin tawp san tlak kan la ni lo tih erawh chu ka sawi duh a, tun aia thahnem zawka min tihsak kan duh a. Tin, Anganwadi building

convergent-in RD nen min tihsak chho mek a, hei hi chak zawka tih theih dan awm sela, pakhat sa tura an thawh ve ve tur an in tum tawm tur an han chinfel chhung hi a rei duh khawp mai a. Chuvang chuan hengte pawh hi tih ran theih ni se Pu Speaker tlem, khawngaihin tunah hian kan V/C te hian 13th Finance Commission atang khan engmah pawisa an hmu tawh si lova, an khawngaihthlak em em a, department leh khawtlang thil pawimawh ah engkimah kan tibuaiin kan hmang tangkai em em mai si a, an pawisa hmuhna tur hi a ranglama ngaiantuah theih dan a awm ang em tih ka'n zaws duh a. Tin, chu mai bakah chuan V/C inthlan hun pangngai ah khan inthlang ve lo te an awm a, khang ho tan khan stationery an lo tih kep ve hauh lo mai a, stationery pakhatmah lak tur an lo nei ve lo a, chuvang chuan hei hi chu a ngaiantuahsak leh dan hram a awm lawm ni tih ka sawi duh a. Tin, VC House-te hi tunhma khan kan sawi kan sawi a, tunah hian a tak ram hmuh tura la awm si lova, hengte hi ngaiantuah chhunzawm dan te a awm em? Hmalak mek te a awm em tih ka hre duh bawk a. Tin, Article 275 hi kan sawi lar viau mai a, keini bialah hian kan hre ve lo khawp mai a, hetiang hi a lo awm a ni tih kan bial hi min rawn hriattir ve theih ni sela chuan a lawmawm hlein ka ring a, heng hmanna te hi kan bialah hian a awm ve dawn lawm ni? Min lo hriattir ve theih chuan a lawmawm hle in ka ring a.

Tin, Social Welfare demand no. 29-ah hian tunhmaa an hming an put zawh teh reng nen Social Welfare hian wheel chair leh bengdar lah an nei thei tawh si lova. Tin, NGO-a thil pek lah a awm tawh si lova, Social Welfare Department hian heng hi tih leh dan hram a awm lawm ni ? Tih leh theih dan a awm chuan a lawmawm hle in ka ring a. Tin, Social Welfare atang bawk hian lawmthu sawi duh kan nei a, anni kaltlang hian Health Worker ka bial chhung Lungsum te, Damdiai te, North Khawdungsei leh Upper Sakawrdai-ah te Health Department-in min rawn pe a, an chungah kan lawm hle a ni tih ka sawi duh bawk a.

Tin, 32-na Horticulture Department-ah hian anni hi kan hriat lar loh tak thin an ni a, amaherawhchu, tunah chuan vung an rawn chhuah tan ve a, kan lawm hle a. Bial pawhin kan chhawr nasain, an hnaah hian an tuiin ka hria a, NLUP beneficiary ho tanpuina pek tur chungchangah pawh hian department hrang hrang ai hian an peih hmasa zat zat thei a, hei hi an fakawm hlein ka hria a, NLUP

buaipuinaah hian kan sorkar an thlawp tha hle a ni tih hi ka sawi duh a, midang tan pawh entawn tlak an ni tih ka sawi tel duh bawk a. Tin, Pu Rinawma khan Horticulture atanga link road laih te kha a sawi a, keini zawkin kan van hmelhriat ve lo ve! Opposition a nih vangin an lo tlawn deuh emaw ni Horticulture department hian tih ka ngaiantuah a. Keini bial pawhin rang taka Horticulture department kaltlanga link road neih ve hlan kan nghakhlel hle a. Tin, tuizem engemaw zat min siamsak tawh a, a bak pawh hi kan la mamawh viau a ni tih kha Minister hian min hriatsak bawk sela. Chutichuan kan Minister pahnih te demand hi ka thlawp in pass ngei ka ngenpui a ni e. Ka lawm e.

SPEAKER : Pu T.T. Zothansanga ilo sawm ang.

Pu T.T. ZOTHANSANGA : Pu Speaker ka lawm e.

Demand no.3-na Agriculture kha Pu Speaker, ka'n sawi hmasa ang a. Kolasib lamah khan kha khawl lian deuh bik buh herna bik kha an lei dawn bik a lo ni reng mai a. A buh thar tamna ber bial Champhai-ah kan lo nei ve hauh lo mai a, kha kha min lo chhinchhiah hmasak sela.

Tin, member zahawm tak Pu P.C. Zoram Sangliana'n a rawn sawi tawh ang khan Mizorama kan buh thar tam zawk hi vairam lamah a chhuk e, hmun thum a thena hmun khat a chhuk a ti a. Hei hi kan Minister-in min hriatpui kan duh chu khawchhak bial ami te chu pakhat mah vairamah a chhuk ve ngai lo a ni. Chuvangin power tiller te, tractor tiller te kha sem leh a awm a nih chuan khilam ami, mahni lo ngei neitute kha min duhsak thei hram la chuan ka duh khawp mai. Tin, zep thu a awm lem lo, nikum hmasa lamah khan kan ran an thi nasa a, khilaiah Ngur atanga Vapar, Hnahlan, Tualcheng area velah kan ran chhawr thin ran puitling 400 chuang a thi a. Chumi avang chuan kan lo hian ngai a awh hleithei lova, power tiller te, tractor te kha kum dang zawng aiin kan mamawhna hi a zual a ni.

Chuvangin sem leh thei dinhmua kan ding a nih chuan khawngaihin min rawn hria se kan duh a. Tin, Mizoram buh thar metric ton 62089 kan tih hi a buhhum in nge kan chhut a, tin 1 ah kg 5 thar thin angin nge, buhfai kan chhut thin tih lai tak kha hriat ka chak khawp mai a. A buhhum atanga kan chhut a nih chuan a buhfai kha a tam lutuk lo a ni tih kha ka'n sawi tel duh a ni.

Tin, Agriculture link road kha an rawn sawi a, Pu Rinawma kha vannei ka ti hle mai, thlei bik nei lo Minister lakah pasarih (7) zet mai an han nei thei a. Agriculture link road te hi kum 2/3 te chu han tha mahsela maintain hi a ngai ve tawh thin a, chuvangin an maintenance tur hi ` 50,000 /1,00,000/- tih ang reng vel hi chu telh zauh zauh chu tha in ka hria a, hei hi kan Minister zahawm takin min hriatpui se ka duh a. Tin, chutih ruala ka sawi duh chu link road kan tih dawn hian a bialtu te hian rawtna hi thlen thei ila kan duh khawp mai. Tunah chuan kan officer-te hian an thlen a, ka bial chhung bikah hi chuan Agriculture link road a ni emaw, Horticulture link road a ni emaw officer hian kei aiin an hre lo hrim hrim. Chuvangin a MLA te hian kan lo hriat ve kha tha in ka hria a, tun tumah pawh department kan han ring deuh mai a, kan ngaih pawimawh lo zawk hi a rawn chhuak a rawn chhuak mai a. Chuvangin a theih hram chuan a bialtu te hian hriatna remchang lo nei ila; tin lo inrawlh thiam dan pawh neih kan tum turah ngai ila a tha awm e, kha kha Agriculture chungchang bikah ni sela.

Pu Speaker, R.D. demand no. 38 bikah khan ka sawi duh chu ka bial khi BDO 3 in min awp a, BDO 1 awp Selam Ngopa BDO in min awp khi Champhai BDO lamah min sawn sak thei sela, khi chauh khi. PMGSY te leh engkim mai khi Champhai lam a ni si a, Ngopa BDO lamah a va awm hi a laklawh lutuk a, helai te hi min siam rem sak theih chuan ka duh khawp mai. Tin, IAY a list serial lovin a ti a, Er. Rinawma member zahawm takin a rawn sawi kha a hre sual ve in ka ring a, keipawh amah ang tho khan kan lungawi lo lek lek thin a . Amaherawhchu central atanga survey a hranaa lo kalin a bial neitute emaw, VC te emaw, khing lai thuneitute min rawn miah lova an lo survey, tunhnai atanga an hman atang khan harsatna keini pawhin kan tawk a ni. Kha kha a survey tute central an ni si a, engkim an lo hrechiang si lova, khalai kha tlema siam rem dan chu awm sela, nichina a rawn rawt ang khan han tih theih dan te pawh a awm dawn vei nen tih kha ka'n sawi a.

Pu Speaker, demand no. 7-na Excise and Narcotics tih ah khan tun hnaiah NGO te leh kan Minister ten thawh hona tha tak an nei hi a lawmawm ka ti a. Ka hriatsual loh chuan tunhnaiah kan Minister zahawm tak hian Excise

deparmtent-in hetiang an buaipui nan hian nuai 30 pein Central YMA pawh nuai 30 a pe dawn niin ka hria a, nuai 60 zet mai thehchhuak turin a then a thehchhuak tawh a, a then a thehchhuak lo niin ka hria a, kha kha nakinah min rawn sawi chian sak theih chuan a lawmawm khawpin ka hria. Police ho te nen kan thawhhona te, Excise te nen kan thawhhonate a tha a ni tih ka'n sawi duh a. Tin, post han siam belh tih te kha chu nichina an sawi kha duhtawk deuh mai ila.

Demand no 16-na Home department chungchangah Champhaiah khian kan Jail hi a tawt nasa tawh khawp mai a. Kan Minister zahawm tak pawh hi amah a lokal tawh a. Champhai Zote hmunah leh Hmunhmeltha hmunah hian in duh zawk thlang rawh u tiin kan khawtlang hruaituten ram an pe ve ve a, kha kha engtikah nge an rawn tuam pum ang? Min rawn sak theih hun tur hi kan nghakhlel em em a, kan nghakhlelhna chhan chu misual kan ngah vang ni hauh lovin kan jail hi a tawt lutuk ve tawh a, a te tawh a, sak that hi a hun tawh a. Tin, a awmna hmunte a lo remlo nen, hmun rem zawkah min sawn theih hun hi dingdihlipin kan thlir mek a ni tih ka sawi duh a ni. Tin, Pu Speaker, Champhaia kan office te zingah kan police office te hi an upa tawh hlawm khawp mai a, 1957/58 vela sak kha kan la ring thluah mai a, khilaia kan OC awmna chhak ami te khi tuai thar theih hi ka chak khawp mai a, engatinge tunhma khan modernization scheme atang khan an lo tuam mawi mai tawh lo aw tih te ka ngaiantuah a, khilai te khi kan ngaipawimawh viau a ni tih kha in lo hriat ah ka duh a ni.

Tuna kan sorkar-ah hian lawmawm ka tih deuh mai chu mi kan zalen a, hun a ral muang a, tualchara thihna te, kidnap te, silai tawlh ruk tih te, license han in pek em em ang chi te kha a awm lova. Kan Minister hnuaih hian kan thla a muang ho niin ka hria a, ka lawm hle a ni tih kha ka'n sawi duh a. Tin, police kan indaihlohna lai tak hi ka han sawi duh a. Champhai-ah khian VIP te pawh an lo kal thin a, a staff-te in daih lohna chu a common a, sawi thui lo ila. Khawi emaw kal dawn nikhua te khian petrol leh motor te khi an nei lo deuh tlat mai a, hei hi police thuam thatna leh hamthatna ang chi te kha a awm tawh lo ni chuan ka'n hre na a, priority pek theih hi a tha dawn in ka hria a. Khilai khi international boundary-ah te kan awm a, kan VIP-te han hruai te hi a ngai thin a, khatiang nikhuua ramri depa kan police te an indaihlo hi a buaithlak ve thin a ni tih kha ka'n sawi tel duh bawk a ni.

Pu Speaker, demand no.32-na Horticulture-ah khan nichin khan link roads kha ka rawn sawi a. Kan Minister zahawm tak Pu Mathana kaihhruaina hnuiah hian link road tam tak kan ti dawn in ka hria a, khatiang khan MLA te nena tih ho kha a tha in ka hria a. Tin, Green House hi kan duh khawp mai a, Champhai lam khian subsidy pawhin ni se tam thei deuh hlek min rawn pek kha kan duh a ni, kut hnathawk kan thahnem a, hnathawk mi kan ni a, tui dah na kha a hlu hle a ni tih kha ka'n sawi duh a ni. Tunhma khan lei tha te, chinai thi te pawh kha kan sem thin a, khatiang kha a vang ta riau mai a, sem leh theih a ni ang em tih te kha ka'n sawi duh a. Chutih rual in Champhai-a kan harsatna em em mai Hnahlan grape chungchang ah hma nasa takin min laksak a, tunah pawh hian engemawchen chu kan tuam pum dawn niin ka hria, chuvang chuan a chungah pawh kan lawm em em a ni.

Pu Speaker, demand no.19-na LAD-ah khan nichina ka hma ami ten an rawn sawi ang khan kan V/C te hi 13th -14th Finance Commission-ah khan an tlachhe tawh khawp mai a, thingtlang lamah hian works tih tam hi tha ka ti. Zoram mipui tam zawk thingtlang ah kan la awm bawk a, kan kawtkai a chhia a, siam rem tur hi a tam em em mai a. Chuvangin LAD kaltlang hian kan V/C ten emaw an kawtkai han siamthat te, zunin te, Hall te han siamthat sak na turin LAD hian tan la leh zual ila kan lawm tlang awm mang e ka'n ti a ni. Champhai-a DLAO office te kha min sak sak dawn ni te pawh khan kan lo hria a, khang te pawh kha eng chen nge a thlen tawh tih te kha nakinah min rawn reflect sak turin ka'n ngen duh a. Tin, ka bial chhung ami Ngaizawl-ah nikum khan kan V/C Treasurer in kha a kang a, kan V/C bungrua zawng zawng kha a kang tel vek mai a, khatiang almirah ang chi te kha a special a in pek leh theih a ni em tih kha min lo reflect sak theih chuan ka duh bawk a.

Tin, Pu Speaker, Social Welfare Department hnuiah District level office min pek avangin kan lawm hle a ni. Tunhmaa Social Welfare nihna kan hriat na ber thil chi hrang hrang kan sem thin dekchi te, silpouline te, bengdar te leh wheel chair ang te pawh kha han dawn leh hi a chakawm riau tawh mai a. Kan NEDP atang te hian tih theih dan te hi a awm leh ang em tih kha ka'n sawi tel duh bawk a ni.

Pu Speaker, demand no.31-ah khan ka'n kir leh lawk ang a Agriculture-ah khan, Hnahlan khian tunhma khan grape kan uar em avangin Laili phai-a hmalakna tur kha kan lo uk-sak vak lova. Amaherawhchu, grape-ah hma kan sawn vak loh avang

khian Laili phaiah kir nasat kan tum khawp mai a. Khilaiah khian Agriculture atang hian land development min rawn tih sak thei hram se kan duh a. Hmanni ah pawh kan DAO te, MI Agri te leh kan officer rual te nen khulaiah motor kal phakna atanga 2 km -ah ke in kan zuk kal a ni. Ram siam tur hlir mai khi Tiau kam ah khian a tam a, kan Minister zahawm tak hian land development a tih leh theih chuan min chhinchhiah sak thei sela kan ti a. Tichuan kan demand sawi zawng zawng te lawm takin ka rawn support e.

S P E A K E R : Awle, Dr. Ngurdingliana.

Dr. NGURDINGLIANA : Pu Speaker, ka lawm e. Tun tum ka ban phar chu a vawikhat naah min rawn hmu nghal chat a, a lawmawm khawp mai. Kan Minister zahawm tak Pu R. Lalzirliana demand atang hian tan ka duh a. Excise hi an sawi nasa tawh bawk a, ka'n tlip ve duh chu kan mamawh ber staff tih pun kha a ni a, kan indaihlo em em tih kha a chiang a, chu chu ka rawn thlawp a.

Demand no.16-na Home-ah hian ka'n lut duh a, Home Department-in kan tlakchham zawng zawng te kan Finance Minister in duhsak takin leiba rulhna tur te, T.A/D.A te a rawn pek belh hi lawmawm ka ti a. A chhan chu thla hmasa lawk khan ka bial ah incident pakhat a awm a, tlangval pakhat pawi khawih, Company-a hnathawk te lo vau ching kha man turin kan VC te nen kan ti a, Saitual-ah kan zuk phone a, Saitual police te khan petrol leina tur kha an lo nei lova. Vantlang leh mimal pawi khawih te kan police te kut ah an awm vat loh hi chuan a buaithlak thin a. Tin, lengkir-ah an tla hlum duh khawp mai a. Heng zawng zawng hriaa Finance Minister-in tun tuma sum a rawn dah hi a lawmawm a, Department pawh ka lawmpui bawk a.

Tin, tuna inbiakna kan neih mek (keini demand area pathum Tuivawl, Tuirial, Chalfilh te) kawnga kan Home Minister leh a Department te hmalakna leh an hma thlir a thui em em a, a hmawr kan bawk tawh dawn ni in a lang a, khang an hmalakna ah te pawh khan lawmthu ka sawi mawlh mawlh a ni.

Demand dang leh Prison-ah hian ka lut leh lawk duh a, Prison hi ka lo la luh chilh ngai lova, kan Department changtu te leh kan Minister zahawm tak ten hma an lo la tih ka han hriat hian a thlamuan thlak a. Jail hi duh vang renga lut kan awm lova, insiamthatna leh khua leh tui thaa an chhuah theihna tura Jail-in hmasawnna hrang hrang, distance studies IGNOU-in a rawn pek te; tin, an lo chhuah hnu a an inhlawh nan weaving industries tih te, tailoring te, agarbati siam te, heng zawng zawng in lo tih bakah

ka hriat sual loh chuan tunah hmeichhe tan bik a hranpa in NCLPR fund nge, a fund hming chiah kha ka hre ta lova, nuai 470.50-a sak mek a ni te hi lawmawm ka ti a. Prison Department changtu leh an officer te leh Department hotute hnenah lawmthu ka sawi rual in Central Jail-a kan tih dan ang hi District Jail-ah hian kan ti ve em ka hre lova, an lo ti a nih phei chuan a lawmawm em em a, an lo la ti fel fai lo a nih pawhin hetiang zawng hian hma lak theih se a lawmawm khawp ang.

Tin, Agriculture-ah ka'n lut leh lawk duh a, Agriculture-ah link road te, NLUP atanga hma kan lakna zawng zawng te kan sawi chhuak tawh a, kan hre vek a. Nikum ruah sur nasat laia land slip repair-na tur an han sem den den te kha thingtlang bial te chuan kan chhawr tangkai em em mai a, a pawisa tam lo mahse kan thlai thar lak chhuah na tura repair na min han pek ah te khan lawmthu ka sawi a. Thil pakhat ka zawt duh a, nakinah kan Minister-in a wind up huna a rawn sawi chhuah theih nan Mission organic value and chain development for North East tih hi Ministry of Agriculture atanga project thar a rawn ni a, hei hian a tum chu Zo hmarcha kan han chin ang te organic zawnga kalpui, a plan pawh kum thum chhunga ram sawn lova terrace ang zawnga kalpui tur tih a ni a. Hei hian nakin zel ah pawh eizawnna tham hmarcha ah hian min siam dawn tihna a ni a. Amaherawhchu, farmer te hnenah zirtirna kan pe tha vak lo nge, entirnan kan bial ah pawh 500 vel an thlang a, tehfung kha a keng tam lutuk a, ram khatah kum thum chhung thlai dang ching miah lova kalpui dan tur te kha inzirtirna a lo awm a. Tin, hemi piah lamah pawh hian a fund flow te pawh tha deuh maia ruahman a ni a. Kha kha wind-up hunah min rawn hrilhfaiah thei se a lawmawm khawp ang.

Rural Development demand 38-ah hian ka'n lut leh duh a. Rural Development tangkai zia kan hria a, zokhaw hmasawnna te, BPL hmasawnna te, tin, zokhua ten ruhrel, kawngah a ni emaw, tui kawngah a ni emaw thil chi hrang hrangah infrastructure pek a tum a. Hemi kawngah pawh central atangin, CSS atangin ni za inhlawhna kan tih te, PMAY kan tih te, Rural Housing Scheme kan tih te, BADP, IWMP tih te leh a hrang hrang, hengah hian ka'n sawi duh chu Rural Development hnuiai kan BDO te hi ka fak duh a. Kan bialah BDO pathumin min enkawl a. Heng project reng rengah hian fel fai deuhin, Buhban-a hma an lak dawn chuan Buhban-a IWMP an sanction zat a hma fein min rawn

pe a. Khatiang khan buaina awm miah lovin kei a bialtu MLA pawh ka inrawlh lutuk lova, kan officer te an fel in an efficient em a, annin bial an chiang bawk a hemi kawngah. Tin, chumi tanpui tur chuan kum khatah kan MP hovin meeting vawi hniih kan nei a. Chutah pawh engkim heng Rural Development hmalaknate fel fai taka kan han sawihova kan han chai te hian Rural Development Department hi keini thingtlang khaw tan chuan kan hlawkpui a, an rinngam bawk a. Sawi tur tam tak a awm a ni hemi chungchangah pawh.

Tunah chuan Minister zahawm tak Pu P.C. Lalthaniana demand-ah ka'n lut duh a. A hmasa berin demand no 19, LAD-ah. LAD hian tunah hian Village Council 536 (Autonomous District tiam lovin) a enkawl a. Mamawh hrang hrang an nei a, an lawmmante bakah Park siamthat te, solar (street light) pek te leh emergency engemaw hi tam tak a awm a. Kei chu LAD-a sum kan dah hi a beitham ka ti a, a pawimawh si a. Kan bulthut a ni a, kan V/C khawtlang hmasawnna tur enkawltute enkawl chhawng leh tu an nih avang hian LAD atan hian sum hi kan mamawh ber chu a ni, pek belh theih ni se tiin ka rawn ngen pui a ni.

Demand no. 29-na Social Welfare. Kan hria a Social Welfare-in a enkawl chu naupang, upa, piangsual te, kum lama tar tawh upa chaklo te, khang zawng zawng mamawh hlir enkawltu department a ni a. Nichina kan ngaihthlak ang khan Pu Speaker, tun hma chuan eng engemaw min sem thin, sem pawh tunah hian min duh. Amaherawhchu, an fund hi a limit em a, kal ngaihna an hrelo a ni. Mahse mit ngeia hmutu tan chuan kan bialah pawh pawisa tlemte an hmuu chhun chhun pawh dik takin an hmang a, an compound te pawh uluk takin an vil a. Nutrition pek chungchangah pawh a hun takah an pe a. Heti taka vantlang leh mi hnuaihnung zawk leh mi chaklo zawkte enkawltu department an nih avangin fund hi ka'n dil belh pui duh a. Tuna Bal Bhavan an han kalpui te; tin, a hmunpui atan tunah Aizawl-ah a vawi khat nan ITI Local Council-in a thlawna an lo pekte hi lawmpuiawm hi ka ti em em a. Hma an sawn zel theih nan fund hi ka rawn dil pui a ni.

Tin, Pu Speaker, demand no. 32-na Horticulture. Horticulture hi tunah vung a rawn chhuah dawn chauh e an ti a. Kei chu a chhuah tawhin ka

hria a, tunah kan bialah Pu Speaker, Horticulture hi pilot project no.1-ah kan nei dawn a, kan nei sa a ni. Chumi atan chuan Sapthei tamna bial kan ni a, Hmarcha tamna bial kan ni a, Sawhthing tamna bial kan ni a. Chutah chuan a zavaiin vawi leh khata hma la lovin pakhatah hian i insawrbing hrih teh ang u kan ti a, chu chu Hmarcha a ni. Tin, Sapthei hi kan zir chiang a, nikum lawkah Sapthei Kut Suangpuilawn-ah kan nei a. Khanga kan Sapthei thar te kha phaiah ka zinin tam tawk ka keng a. Khulaiah Spiece Board te leh a hrang hrang consultancy board-ah te kan han pe a, an han test chuan ‘In Sapthei tui tuna in siam ang hi chu national level-ah chuan market margin pawh a pha lo, a tui si lova, a thur bawk si a. Tun hmaa in chin Mizo Sapthei kan tih a uk te ang hi ti leh zawk ula, market pawh tun aia nasa zawkin kan buaipui thei ang che u” tiin min lo hrilh a. Chuvangin, tunah hian Hmarcha-ah kan insawrbing dawn a, hemi kawngah hian Horticulture department pawh kan finnate a thui lova, engkimah kan rawn pur dawn che u a ni tih hi ka’n sawi duh a ni.

Sawi tur chu a tam a, mahse khang kha chu kan duh tawk mai ang a. Kan department a bik takin Social Welfare, Horticulture leh LAD te kha an hmalakna mihring nun khawih hial thei department an nih avangin engemaw NEDP atanga pawisa awm thei te ngaihtuahsak theih a nih chuan ka lawm ngawt ang.

Vawiinah kan Minister zahawm tak te demand hi ka thlawp thu ka rawn dinpui ve a ni e, ka lawm e.

SPEAKER : Awle, Pu John Siamkunga a phar hmasa.

Pu JOHN SIAMKUNGA : Pu Speaker, ka lawm e. Tlem azawng han sawi ve ka duh a. A hmasain Minister zahawm tak Pu R. Lalzirliana chan Agriculture hi sawi lawk ka duh a. Kan ram hi a chhengchhe hle a, zawl hi ka zawng thin a, a vang a ni, khawte khelmual ang pawh hi zawn hmuh a har khawp mai. Chutiang rama awm chu kan ni a, chuti chung chuan nasa takin hna an lo thawk a. Tin, a bikin tlang ram lo neih a ni emaw, tlang pangah lo kan han nei a, kum khat kan han nei a, a lei tha zawng zawng kha ruahin a tleng thla a. A kum leha neih theih loh a lo ni leh a. Chutiang a nih avang chuan department tan pawh harsatna tam tak an tawng thin, duh ang hian an hmalaknaah pawh hian

hlawhtlinna an hmu em em lo a lo nih pawhin heng hi chu awm ve viauvin ka hria a. Mi ram tlang ram tihah te hi chuan kan han kal a, tlang ramah te han tlan han tlan thin mah ila reiloteah zawl nuam leh rai deuhah te kan tlan luh chang te a lo awm a. Mizoramah erawh chuan tlangah kan tlan char char a, tlangah vek kan tawp leh thin a. Kan ram bakbahai zia ngaihtuah hi chuan hna hi kan thawk nasa hlein ka hria a ni.

Tin, NLUP kan han tih hnu ah hian buh pawh hi quintal 68120 laiin kan thar pung tawh tih economic survey atang hian a lo lang a. Chuvangin, NLUP kan tih hnu ah hian nasa takin hma kan sawn a ni tih te a lo lang a. Tin, heng fruits and vegetables lamah economic survey-a a lan dan hian a bikin carrot te, Bawrhsaiabe tih te a lo lang a. Amaherawhchu, kan thar zat statistic hi ka'n zawng a, ka hmu lova. Hengte hi statistic fel tak awm thei sela. Zikhlum hi kum khatah kan ramin engzat nge a mamawh? Bawrhsaiabe a ni emaw, Carrot a ni emaw, cauliflower a ni emaw nitina mipui tam zawkin kan mamawh, a lova kan awm theih loh hi chhut chhuak ta ila. Chung lamah te chuan nasa takin tlan ila. Pawn lam atanga a crore tela nitina kan lakluh hi awmlo deuh thawa kan tih theih chuan Mizo mipuite hian hma kan sawn nasa ang tih ka ring a ni.

Tichuan, tawi te te sawi loh chuan a tam ve ang reng si a. Demand no. 38, R.D. hi tawite han sawi leh ka duh. R.D. hi thingtlang lama hmasawnna hna thawk an ni a, thawh pawh hi an thawk tha a, asset pawh hi an siam nasa hlein ka hria a. Tin, job card holders hi survey bu-a a lan danah hi chuan 1,89,372 lai an ni a. 2011-12-ah khan ni 98 an thawk a, ni za inhlawhna kan tih maiah hian, 2012-13-ah hian ni 92; 2013-14-ah 68; tahchuan a tla ta dawr mai a, 2013-2014-ah 23 chiah an thawk a. Kum 2015-2016-ah a rawn pung leh deuh va, ni 70 an thawk a, a chawhrualin a nih ka ring a. Kum 2016-2017-ah hian ni 20 chauh an thawk a, thingtlang lam kan unaute innghahna ber a ni a, kan tawng haw lo se central-a Congress hunlai kha chuan a tha em em a, thingtlang mite tan pawh innghahna a tling thin a ni. Vawiin ah hian a lo tla ta duai duai mai hi a pawi hle in ka hria. Tunah hian material component inseem danah hian Project Director lam hian 40% an changa, BDO lamin 140%, VC in 20% an chang a. Ngun deuhva han ngaihatuaha chuan arva ilo seng tam ber hi VC an ni a, officer

han zin se VC in hi an thlenna a ni. Chuvangin sum han ngaihtuah dan hi an hre lo ve em em mai a, an buai ve thin a ni. Mikhual nei nafang chuan engemaw han leia han hmeh pui te an duh ve a, an sum neih te a limit ve em em a ni. Ni 100 inhlawhna te awm chho zel turah ngai ila, central sorkar budget atang khan a lang a ni. PD-in 35%, BDO-in 35%, VC-in 30% hi chu chang thei se chuan mikhual han neih fahranah pawh an ziaawm ve thei ang tih kha ka'n sawi duh a.

Tin, RD Department hnuiah hian Rest House tam tak a awm a, heng ah te hian Chowkidar kan chhawr hleithei lova, hengte hi tihdan a awm thei em aw tih ka'n sawi duh a.

Tin, Home-ah hian tawite sawi ka duh a, ka bialah khian Thingsai Police check gate a awm a, kan Home Minister hian min pe a, khilaia hawn khi a phal a. Khimi gate hawn atang khian Bike bo thin te kha a reh ta vek a ni, cylinder bur an phurh chhohna thin te leh thil dang dang an lak chhohna kha a tawp ta nge, khilai kawng khi an lo hmang ve thin nge ka hre lova, hetiang te a lo reh ta vek mai hi a lawmawm hle a ni. Hei aia nasa hian min lo equipped sak ta se, damdawi emaw, thildang ah pawh hian nasa takin khilai khian hna a thawk ang tih ka ring, ruihhlo lo lut tur te.

Tin, Sainik School Chhingchhip khi a kumkhatna atan school admission te an ti a, Chhingchhip mipui an fakawm hle in ka hria, compensation beisei reng reng lovin an ram an lo pe thei hi kan hotuten an sawi angin entawn tlak a ni tih ka sawi duh a ni.

Tin, Home Department hnuiah hian Hnahthial Police station-a kan Thana te min sak that sak vek a ni.

S P E A K E R : Ka bial chhunga nula pakhat MA zirlai Delhi-ah accident in a boral a, a ruang an rawn thlenpui dawn a, kan ngaihtuah lawk ang a, reilote tal lan ve loh chu a mawi lovin ka hria a, House phalna la in Deputy Speaker hovin a tawp in lo thleng dawn nia.

Pu JOHN SIAMKUNGA : A kawt te pawh cement kan zut vek a, a nawm pawh a nuam a, tuna endikna ah pawh a sang ber berah te kan lo tel ve ta a, a lawmawm em a ka'n sawi chhuak duh a ni.

Demand no.32-na ah hian NLUP kan neih hnu ah hian Aloe Vera te, grape te , Sapthei te , Lakhuihthei te, Theihai te han sawi ka duh a. Heng thlai rah te han chin dan pawh Aloe Vera tin 929 vel ah kan kalpui mek niin a lang a, grape pawh hi tin 2450 velah kan kalpui niin a lang bawk a. Sapthei erawh hi chu negative growth a ni ta tlat mai a, a hma khan tin 980-ah kan kalpui a, chuta tang chuan a tla ta duai a, a pawi angreng khawp mai a. Tin, Lakhuihthei hi tin 4867-ah kuthnathawktuten an kalpui mek bawk a, Tung pawh tin 500 hmunah kalpui mek a ni a. Tin, Theihai hi tin 890 hmun ah kalpui mek a ni. Chulai karah chuan heti zat hi kan lo thar chhuak tawh a ni a, kan thar chhuah hi han en mai chuan a tam hle in a lang. Aloe Vera pawh quintal 900, grapes quintal 22550, Lakhuihthei hi quintal 32870, khatiang daih kha a lo ni tawh a, hengho hi chhenfakawm tak te an ni a.

Tin, Lakhuihthei te, Sapthei te kan sawr ve thin a, Assembly Committee hian, ‘i in ang u’, kan ti a, kan han in thin a, mahse, a ram mi ngei hian a tui kan ti tlat lo. Kan han in thin a, a thlum lutuk a kan in thei lo a ni. Kan target hi a diklo emaw ni chu aw ka ti thin a ni. Kan market hnai ber tur hi chu keimahni mipuite kan ni a, mipuiten tui ti taka kan in a, kan ram chhuak ngei hi kan lam kan lam hunah chauh, a market hian beyond border kal turah ka ngai thin a ni. Ram pawn lama hralthura kan han in ngai tlat mai thin hian kan economy hi a ti thang thei lovin ka hria a ni. Nuai 10 vel bawr chawm thei tura kan inngaih chuan, kan thei thar chhuah te hi mi nuai 10 ah chuan hlawk tak a ni ang. Ama’rawhchu, kan siam chhuah te hi a quality a tha lo tih a nih zel avangin keimahnin kan hlut loh chuan ram dangin an hlut ka ring thei lova. Chuvangin kan strategy te pawh hi thlak a ngai em aw tih te kha Pu Deputy Speaker, ka’n sawi duh a ni.

Demand no.19-na hi kan hotuten an sawi tam tawh a, a pawimawh a, COLFA hnuaiah hian district zawng zawng deuhthaw kan fang tawh a. Tunah hian Saiha District leh khawthlang lampang kan la kal lova, chuti tih loh chu kan fang chhuak tawh a ni. Kan en chipchiar em em a, 13th Finance Commission hnuaia an thawh kha a tha a ni. Khaw hrang hrang kan fang a, street light te nizung chakna hmanga an lo tih te chu khaw ti hmasawn tute an ni. Tin, step an

siam te, PCC lungphah an lo siam te, retaining wall te, khaw hrang hrang ah 13th Finance Commission hnathawh hi a lang a ni. Chutiang chuan kan hmu a, kan hria a, mahse 14th Finance Commission hnuiah hian VC te tan hian sum a rawn awm ta reng reng lo mai a, chumi a nih avang chuan kan hotuten an la ngaiantuah turah ka ngai a. NEDP hnuiah hian Mizorama khaw kilkhawr ber thanna tur a awmin ka hria a. LAD hnuia hma kan lak chuan khawtin a thang ang a, an mamawh chu anmahnin an lo ngaiantuah ve ang a. Tichuan an mamawh tur leh an assets tur kha chu VC ten an duanchhuah a zarah an khawtlang tan assets kan siamsak thei zelin ka ring a ni.

Tin, a thawktu an chhia a, Mamit District-ah kan kal a, a zau khawp mai a, nikhatah kan fang chhuak hleithei lo a ni. A khaw pawimawh lai erawh chu kan tlawh thui hle mai a. Chumi tum chuan JE pakhatin Mamit District khu an enkawl a ni tih kan han hriat chhuah khan khuti khawpa zau khu engtinnge a enkawl theih kan ti a, a mak kan ti a ni. Chuvangin hei ai hi chuan thuam that a theih em aw tih te kha ka'n sawi duh a ni, Pu Deputy Speaker.

Demand no.29-na Social Welfare Department-ah hian tawite Social Welfare hian Creche Centre kan lo sa a, khangah khan a enkawlna tur kha an rawn tum thin a. Naupang awmna a ni a, a tangkai khawp mai a. Nu an feh duh a, pa an feh duh a. Khangah khan naupang an dah thin a, tichuan an feh san thei thin a. Kha kha a productive riau a ni. Chutiang chuan Creche Centre hi hmun tam takah kan sa a. Hengah te hian Creche Centre sakna te hi rawn ti thei phei se chuan a tangkai leh zualin ka ring a, khaw tin tan. Sak theih lohna khua hi kan la nei teuh tho a. Khangah khan kan Minister zahawm takin nakinah rawn react turin kan duh a.

Tin, Anganwadi-ah tunah chuan lehkhathiam an la ta hi a pawimawh khawpin ka hria. A vang chu an sikul kalna hmasa ber Anganwadi-ah hian thiamna an lo zirtir hman thin a, hmun tam takah chuan, a zawng zawng chu ka ti lo. Hengah hian hmasawnna nasa tak kan hmu in ka hria a. Pre-school ang khan an kalpui a, a hlawk a ni tih kha ka'n sawi duh a ni e. Hun a tawi deuh a Pu Deputy Speaker, heng kan Minister zahawm tak te pahnih demand hi ka rawn thlawp a ni, ka lawm e.

DEPUTY SPEAKER : Pu Lalthanliana.

Pu LALTHANLIANA : Pu Deputy Speaker, hun min pe a ka lawm e. Tlemte kan sawi ve ang e. Kan Minister pahnih te demand hi tlem tlem han sawi ka duh a. A hmasa in demand no.7-na hi kan sawi tam tawh nain ka'n sawi nawn leh duh chu MLPC Act kan kalpui zel dawn ta rau rau a nih chuan Excise Force te hi tih chak deuh a, thuam that deuh a, hei aia chak zawka hmalak dan kawng zawn ni se tih hi ka'n sawi duh a.

Demand no.16-na Home chungchang hi ka'n sawi leh duh a. Chawhma lamah khan kan thian ten an sawi tawh a. HPC'D' te nena inremna zawn a ni a, tunah hian a final stage a thleng tep tawh a. Ka lo ngaihven ve khawp mai a, Zokhawthiang-ah khan ka tel ve a. Inremna hi a pawimawh a ni tih hretu zingah ka tel ve a. Ka nghakhlel khawp mai a, tunah hian ka lo thlir ve a ni. Kan Home Minister hmalakna hi lawmawm ka ti a, a ropui ka ti a. Hemi chungchangah hian Pu Deputy Speaker, nangmah kaltlangin Mizoram mipuite pawh Pathian hnenah a lo hlawhtlin theihna tur atan kan tawngtai hi a pawimawh in ka hria a, ka ngen duh bawk a. Tin, a tu ve ve te pawh inremna a awm theih chuan tlawm a ngaih huna tlawm te, tlawm a tul huna tlawm ve ve tura kan rilru kan siam tawn hi a pawimawh khawp mai a. He thil hi hlawhtling se tih hi ka duh em em a ka'n sawi lang a ni.

Tin, thil chi hrang hrangah hma an la a. A lehkhabuah te pawh kan han en a, an report pek danah hian a in chawh chawm deuh nge ni, ka hriatthiam loh vang nge ni zawk Home hnuiai thil kal te leh Narcotic te nen hian an chawhpawlh nge ni, keini ang duang chuan kan hrethiam vak lo a ni. Governor Speech-ah pawh khan fake currency note te, gold te an man thu leh ruihlo (heroin) te, thil chi hrang hrang an man te kha an rawn ti lang duah a. A then te hi chu Narcotics hnuiai awm awm tak, SP hnuiah hian Narcotics te hi a awm hran nge, tihian a in chawhpawlh nuai mai a, Home hnuai si ah hian. A chungah demand no.7-ah hian Narcotics tih kha a awm bawk si a. Engnge ni Pseudoephedrine tih te, metahamphetamine tih te pawh an man khawm a awm bawk si a. A in chawhpawlh deuh nuaih a, hriatthiam a har khawp mai in ka hria. Tin, helaia ka'n sawilan duh chu rangkachak tlang man kha engnge a chanchin zel tih kha ka rilruah a lian khawp mai a, ka'n sawi lang a.

Tin, Aizawl hmun hrang hrang junction 42-ah camera 186 bun a nih thu kha a rawn tarlang a, hei hi tha ka ti khawp mai a. Misual hrim hrim man nan a tha tho a.

Misual lem lo accident te pawh engtinng an accident? Accident a ni em? Engtinng hetia a lo awm rikngawt tih te pawh hriat nan a that hmel in ka hria a. Hmasawnna chi khat niin ka hria a, a pawimawh ka ti khawp mai.

Tin, Police tih chak chungchang kha hmannah pawh kan sawi tawh a. Ka'n sawi nawn leh a, a tha ka ti khawp mai. Session hmasa lamah te pawh kan sawi a, Police ho hi thuam an ngai a ni. An thawh tum leh an tih tur te an tih theih loh phah nasa em em mai a. Tun anga sum leh pai te anmahni thuamchakna tur atan pek a nih chuan hma nasa takin an sAWN dawn a ni tih a hriat a ni.

Demand no.31-na Agriculture hi tawi te ka'n sawi duh chu, hemi bikah hian nichinah khan kan ngaithla a. Khulai Bukvannei velah te kan han kal a, Oil Palm chungchangah hian intodelh-a chhungkaw tam takin eizawn nan an hmang ni-a kan hriat mek lai hian, keimaha zawhna awm chu Oil Palm kung hi engatinge an kheh aw! Khulai Tut-ah khuan kan kal in ka lei a. Tin, Thingdawl atangin an rawn thawn an ti a, ka lei tawh bawk a vawikhat chu, a tui zek leh nghal a. Engvangin nge an kheh kher tih kha keimahah zawhna a awm a ni. A hlawhtlin loh vang nge a hlawhtlin vang? A tir atanga an chin khan hetia a zika kheh tura an tih chu a ni awm si lo va tih hi keimahah zawhna a awm a. A thlum tui zek leh nghal a ni. Amaherawhchu chutiang tur atana chin chu a ang lo ka ti deuh hlek a. Hei hi a hlawhtlinna nge hlawhtlin lohna? A hlawhtling vek lo a ang ka ti. A thenah chuan a hlawhtling ang a, a thenah chuan a hlawhtling lo emaw ni ka ti deuh a.

Tin, Agriculture-ah hian buh hi kan han sawi lar a. Tin, chhangban fun lianpui pawh ei ila, kan chaw chakna a la reh lo te kan ti mai mai a. Mizo te hi buh duh kan ni a, buh hi kan ngaisang a, buh lo chuan kan tlei lo reng reng mai a ni. Chuvangin buh chinna chungchangah hian leilet pawh ni se, tlangram pawh ni se, nasa leh zual zawka kan intodelhna tura tan lak leh zual a, tun aia nasa zawka sum leh pai pawh hi hemi atana hian dah tam deuh hi a tha em aw tih ka ngaihtuah a. Horticulture te ka sawisel ni lovin, kha kha tih thulh chuang si lovin tih dan a awm em aw tih ka ngaihtuah deuh a. Chu chu ka'n sawi duh deuh a.

Demand no.32-LAD chungchang hi ka'n sawi ve lawk ang e. Nichin khan an sawi a, 13th Finance Commission atangin VC-in LAD hnuaiah sum kan hmu a, hna an thawk thin. Tichuan, tunah 14th Finance Commission kan han hmang tan a. Kan hmu leh

dawn a nih phei chuan pawisa kan pek chhuah dan system hi a tha lo in ka hria a. Nikum velah COLFA te Mizoram hmun hrang hrangah kan han kal kual a. Pawisa an pek chhuah dan hi, thenkhat chu hnathawh hma in pawisa an pe chhuak vek a. Chu chu an lo thawh zawh tawh si kha chuan han complaint eng ang mahse miin an hman zawh tawh chuan tihngaihna a awm tawh lo va. Kha system kha a dik lo mang e aw ka ti a. A guideline kan han en khan a khawiah zawk nge ni 10 chhunga pek tur tih kha? RLB-ah khan nge pek tur a, LAD department-ah nge pek tur? Finance Commission atangin eng department-ah khan nge tih interpret dan kha a inang lo thei a. A tih dan phung, pawisa hnathawh hmaa pek vek kha a chi loh in ka hria a. Tunhnuah chuan thil awm leh tur a nih chuan in check chian nan kan hman a tha in ka hria a. Miin an hman zawh tawh chuan tihngaihna a awm tawh lo, man ringawt mahse tih ngaihna a awm vak tawh lo. Chawi tur an neih tawh loh phei chuan, kha kha kan tawng tawh a ni.

Tin, Horticulture chungchangah hian medicinal plant Aloe Vera te kan han hmu a. Tin, N.Vanlaiphaiah te phei chuan sunhlu an ching nasa a. Horticulture hian an enkawl tha khawp mai a. A chi te an sem a, khati khan hmun hrang hrang kan fangkual a. Amaherawhchu he project hi a nodal department atan Horticulture kha an ruat tawh si loh chuan engtinngi ni ang le? Ayush lam hian enkawl vek pawh lo ni se, a market te hi ngaihtuahpui a ngai ka ti a. Aloe vera te hi Baktawng-ah te khian a tam em em a, sahbawn siam nan vawikhatah tam tak hi a lo ngai lemlo a, khing te pawh khi tanpui an ngai ang reng a. Hei hi an inkungkaih dan ka hre chiah lo a, nichin khan zawhna chu a awm na in, a la duhthawhawm deuha ka hriat avangin sawibelh ngai, han in hrilhfiahnate pawh hi awm se. Ka sawi awmzia chu a beneficiaries te hian hlawk zawka an tangkaipui zel theih nan, umzui an nih theih nan, Horticulture hian an umzui tawh dawn lo a nih phei chuan an inhlan chhawn dan chungchangah te, a umzui zel dan tur chungchangah te pawh a department lo la chhawng tu tur te pawh hian an ngaihven thuai thuai hi a tul in ka hre khawp mai a, kha kha ka'n sawi lang leh duh a. A market pawh hi ngaihtuah pui, ngaihtuah sak kha a tha ka ti khawp mai a, chungte chu a tlangpuiin ka'n sawi a ni.

Social Welfare Department, demand no. 29-na pawh hi nichina kan thiante sawi ang tho kha ka'n sawi duh te chu an ni a. Aganwadi building te a

chhe teuh tawh a, hmanni ah pawh zawhna ka zawt tawh a, ka sawi tawh lovang a. Bengdar te, rualbanlo te tana thil mamawh wheelchair te pawh tunhma khan ka dil ve thin a, kan hlawhtling lem hlei lo a, a awm loh avangin a ni mai a, an phal loh vang pawh ni lem lovin, chungte chu a nia. Heng hi awlsam zawka ban theih tur awm thei se, ruahmanna siam theih ni se chuan a va tha dawn em aw ka ti a, ka'n sawi a.

Tin, buh kha a tawpna turin Pu Deputy Speaker, leilet ah te, tlangram ah te kan tharchhuah tam theih-na tur hian incentive lam te hi kan uar a tul em em tih ka ngaiantuah a, khang te pawh kha awm thei se chuan tam tak kan thar chhuak thei turah ka'n ngai deuh a ni.

Pu Deputy Speaker, he an Demand pahnih hi pass pui turin ka'n thlawp a ni. Ka lawm e.

DEPUTY SPEAKER : Pu K. Lalrinthanga kha a phar a, thusawi turin ilo sawm ang.

Pu K. LALRINTHANGA : Pu Deputy Speaker, ka lawm e. Vawiin kan demand-ah hian sawi hmasak duh ka nei a. Zirtawpnia kan resolution sawi ah khan MLTP Act kha kan hman leh chuan ka bial chhung Vairengte leh a chhehvel Dholai, Bhagha tih vel ah te nasa takin kan mualpho leh ang tih ka hlauh em avangin sawi pawh ka sawi thui viau a, hun pawh kha lamah khan ka khawhral tam deuh hlek a. Chutih rual chuan kei hi (tiang hian sawi ta ila) Pastor fapa ka ni a, tualchhung Kohhran-ah Kohhran Upa ka ni a. Chutiang chu ka nih avangin zu chungchanga Kohhran mite awmdan hi ka zir nasa a. Foreign a lehkha zir tawh te, Pastor zir tawh te leh reitak awm tawh te ka zawt nasa a. Chunga ka zawhna ah chuan foreign hmun hrang hrangah Pastor te tan zu in khap a ni lem lo a, mahse, an in tam phal a ni lem lo tih kha ka thinlung in a hre chhuak a. Chutiang a hriat chhuah rual rual chuan Kohhrana rawngbawltu tu tu te emaw tlem te te in thin te, in tam lem lo te ka thinlungin a zuk hrechhuak a, hun a tlem tawh avang khan ka thusawina ah khan 'khilama pastor te' ti khan ka han sawi mai a, 'tlem te te in te ka hre teuh' ti ang deuh niin ka hria, ka sawi kha video clip ka han la a. Chu chu han in lakbing na tur a awm lovin ka hria a. Helai Zoram-a kan Pastor te leh rawngbawltu te han in lakbing na tur

kha a awm lovin ka hria a. Chuvangchuan khami ka thusawi ah khan mi pawi te ka lo sawi a nih chuan min ngaidam turin ka ngen a, he House kaltlang hian Pastor te leh House member te ngaihdamna ka dil a ni tih kha ka han sawi a ni.

Chutichuan Excise chungchangah hian ka sawi nawn leh duh chu a control-na lamah hian nasa taka tan kan lak hi a ngai ka ti hrim hrim a. Chungte pawh chu tawi te khan ka han sawi kha a ni a. Tun hunah hian MLTP Act kan hman tawh loh avang khan Prohibition & Control a ni bawk a, hei hi kan hman lai a ni bawk a. Sorkar chak tak tunah hian a kal mek a, Excise Department te pawh hi ti lian deuhin a control-na lamah hian hmun tin hmun tangah hian hma la se a tha in ka hria a, chu chu ka han belh lawk duh a ni.

Demand no. 16-ah khan ka sawi hmasak ber duh chu nizanah khan Saipum khua IR awmna khuaah IR pakhat leh khawtual mi pakhat an intibuai a, chuta lo hre vetu pakhat chu in atanga chhuak in anmahni te pawh kan hriat theih phah a. Chutichuan dar 12:00 hnu ah dar 1:40 thleng an ti a, silai vawi 15 a puak tih tukin zingah report ka dawng a. Chutiang a nih chuan, ‘hei vawiin ah session kan nei a, kan Home Minister hnenah ka lo thlen dawn nia’, ka ti a. Tukin ah ka ziak a, Home Minister hnenah ka thlen a. Kan Home Minister hi a lo tuan rang khawp mai, IR pathum a lo suspend hman der mai a, mak ka ti hle a, a chak ka ti a, lawmawm ka ti a, a hnenah pawh lawmthu ka sawi a ni. Khatianga mipui titlabartu te laka hma a lo la hman kha ka lawm tak zet zet a. Chutia min hrilh veleh chuan Saipum khaw mipui te pawh ka han hrilh nghal a, chutiang chuan boruak a awm a ni tih ka han tarlang duh a ni.

Chutih rual chuan ka sawi tel leh duh chu kan Home Minister in remna leh muanna a vawnna kawngah te, a hmalakna kawngah te, a thil tih that te hre tu zing ami niin ka in hria a. Chutih rual chuan keini chu HPC area engemawzat nei kan ni a. Inbiakna te a han kalpui a, tihian kan constituency leh constituency dangah te pawh thlamuang takin bial chhungah te pawh kan zin thei a, hlim takin kan awm ho a (khawtlang mipui te nen). Chutianga kan awm chhoh theih avang chuan lawmawm ka ti a. Inbiakna hi tluang takin kal sela. Thu lawmawm tak mai a lehlam lehlam in kan hriat theih tur thleng se tih hi ka duh tak zet zet a, chu chu ka han tarlang ve leh duh a ni.

Demand no. 31-ah khan Agriculture a ni a. Link-road chungchang hi sawi ka duh a. Bukvannei-ah khuan oil-palm herna khawl bun a ni a. Oil-palm hi kan ching nasa hle a, keini bial ah chuan mi tam takin eizawn nan kan hmang a. Oil – palm hi tha riaua hriatna ka neih chu rilru nei vak lo tan ti ta ila a dikan ka ring a. Mahni pawisa neih ang ang hmang zo thuai thuai te tan hian a tha leh zualin ka hria a, kum tluanin lawh tur a awm a, a hralth reng theih mai a ni. Pawisa neih loh pawh khan an han lo a , an va hralth leh thei mai zel a. Thingtlanga dinhmun sang vak bik lo te (kan tawng an huatthu suh ah) tan khan a tha leh zualin ka hria . Eizawn nan tunah chuan Kolasib District mipui tam tak te chuan an lo hmang mek a ni a. Mahse hei link-road kan han lai a, mi tam takin an tangkaipui tawh rualin Bukvannei-ah khuan pa pakhat oil-palm ngah deuh, mahse a oil-palm neihna hmun chu motor kawngpui atanga hla tak mai a awm a. Chu chuan a va lawh a, a rawn phurh haw khan a hlawk tak tak lo a, Oil palm chu a nei tam a, a ngah a, a rah pawh a ngah a, chumi chuan motor hmanga a lakluh na tur a kalkawng a hla si a, ‘a duh duh in in va lo thei ang, a thlawnin ka pe ang che u’ a ti hmiah mai a ni. Chutiang chuan heng agriculture link road kan tih te hi kan la indaih lo a. Chutih rual rual chuan kumin chhung ah pawh boulder phah thei turin Agriculture Minister hian ruahmannengemaw zat a siam a ni tih te kan han hmu a, lawmawm ka ti a. Thingtlangah kan awm a, sorka-in kal kawng, agriculture link road te min han laih sak a, fur a lo ni a, hmun thenkhat chu a lo min a, a kal theih loh a, thual that leh a ngai a. Hmanlai kan naupan lai te chuan thingtlanga kan lo neihna hmun chu a kal hleih theih loh chuan VC ten hnatiang an ko a, khawtiangin kan siam tha mai thin a ni. Tun dinhmunah hian siamthat tum hi kan awm teh chiam ta lo a, sorkar hi kan nghak deuh tlat a. Chutia kan nghah tlat rual chuan link road hi thingtlang eizawnna atana awlsamna kan Minister ten an han buatsaiah hi lawmawm ka ti a, lawmthu ka han sawi duh a ni.

Tin, nikum tun ang hun Session-ah khan a niin ka hria, Kolasib District-ah khuan buh herna khawl awm ve se tih ka sawi a. Ka sawi lai khan kan Minister khan a chhinchiah nghal in ka hria a, a pen kha a la a, a zu ziak nghal in ka hria a. Khami vang kha a ni nge ni lo chu ka hrelo a, tunah hian buh herna khawl Kolasib District-ah a han buatsaiah dawn ni awm in ka hria a, lawmawm ka ti tak zet zet a. An buh thar te khulai atang khuan Cachar-ah tam tak a lut thla a, Mizo mipuiten kan tangkaipui tehchiam lo a

ni. Mizoram-a leilet awm chhuna kan thar te Mizo in kan ei aia tam kha an ei zawk a ni. Chutiang a nih avang chuan buh herna khawl te kha kan mamawh in kan hria a, kan han sawi kha a ni a, a lo hlawhtling tur hi lawmawm ka ti tak zet zet a ni.

Rural Development chungchang ah hian thinglang mipuite kan innghahna a ni ber a. Hun kal tawh ah chuan LAD te kha kan innghahna a ni thin a. Mahse, LAD-ah sum leh pai te a awm mumal ta lo a. Finance Minister zahawm takin Year of Consolidation kum hnih lai a puang a. Chutiang a lo nih rual chuan LAD ah kan mipui te tan innghahna tur a awm lo a. Chutih chhung chuan Rural Development hi mipui te in nghahna a lo ni a. Chutatang chuan kan mamawh eng eng emaw tuikhur te, kalkawng te siam a ni thin a. Rural Development hnathawh hi lawmawm ka ti a. Tichuan, Rural Development kaltlang chuan School te pawh hi kan run a ni deuh ber a. Private school din reng reng chuan VC te hmangin Job card neitu te sum leh pai an dil a, thawh khawm in zitirtu hlawh te an lo pe a. Chutiang chuan Vairengte-ah te, Bilkhawthlir-ah te, Rengtekawn-ah te (keini bial ang ah chuan) sum leh pai siam in school an han siam ve thei a ni a. Chuvangchuan lawmawm ka ti tak zet zet a. (Deputy Speaker : I hun i hmang zo a nia, tih tawp tum la). Pu Deputy Speaker, khang te kha ka han tarlan theih a ni, ka lawm e.

DEPUTY SPEAKER : Pu Lalruatkima kan sawm ang a, a dawt ah Pu T. Sangkunga.

Pu LALRUATKIMA : Pu Deputy Speaker, ka lawm e. Vawiin hi (demand-a kan luh hma in), he House Leader pawh lo ni tawh Brig. T. Sailo thih cham kha a ni a, he House-a record-a awm ve atan ka han tarlang hmasa ni sela.

Vawiinah kan Minister zahawm tak te pahnih Pu R. Lalziriana leh Pu P. C. Lalthanliana te demand kan han sawi dun dawn ni a, kan sawiho mek a, a lawmawm khawp mai a. Ka'n sawi hmasak duh chu demand no. 7-na Excise & Narcotics-ah khan kan hriat angin kan ram ah MLPC Act kan hmang a, a hlawhtlin loh dan pawh kan hre vek a Zirtawpni-ah pawh nasa takin kan debate a, tihlawhtling tur chuan Excise Force te pawh thuam chak leh zual an ngaih dan te pawh kan hmu in kan hria a. Khami kawngah khan tan lak leh zual ni se a lawmawm in ka hria a. Tuna kan kal phungah hi chuan Excise Force te field-ah duty lo in zu dawr-ah an duty nilenga. Central YMA, SRS ten tlawmngaiin ruihhlo do beihpui an thlak a, chutah chuan mi hausaten zu kan zuar a,

mirethei ten drugs kan zuar leh emaw tih mai tur in drugs addict thar kan han tih hi naupang tete leh mi harsa zawk te an ni a, tan lak nasat a ngai hle in ka hria a. Chuvang chuan dan anga zu zawrh a nih laiin dan lo in lei tur a tam a. Dan lo a zu in an tam bawk a, kan dan a muthlu a, NGO ten dan kan lekkawh na chin pawh a awm a, tan kan lak a ngai nasa khawpin ka hria. Tin, Zoram mipui in Study Group te pawh kha kan nghakhlel khawp mai a. Tun kum chhunga report thehlut tur an ni a, an la thu khawm mumal chiah lo nge ni, kan Minister zahawm tak khan an hmalakna a la rawn chhang thei lo a. Chuvangin khang te pawh kha mipui in kan nghakhlel a ni tih hria in khanga mawh phurtu, kohhran ang zawnga rawn tel nge ni kan hrelo a, kohhran rawngbawl tu Pastor pension te, ni lai mek te, kohhran upa te an telna hming aiawh khan nge an rawn tel a, an kohhran upa nihna te pawh hriathiam har a. Kohhran kan rawn lo ang kan tihna karah khan anni tan pawh thil ngaihtuah thiam a har ngawt in ka ring a. Chuvang chuan helai ah hian kan Excise Force te ti chak a, study committee ten rang thei ang bera hma la zar zar turin kan sawi tel duh a.

Tin, demand no. 16-na Home-ah khan, Serlui bialtu MLA zahawm tak khan a rawn sawi tawh a, nimin lamah kei pawh thu ka lo dawng a, zing vartian ah nizan lamah Saipum khua an ralkhel hle mai a. Zanolai ah khatiang khan khaw chhung ah IR camp atangin silai ri an han hria a. Chutiang a nih nachhan chu a bul ber ni-a lang report ka dawn dan chuan zuruih vang tih kha ala ni cheu mai a. Khatiang te kha a pawi khawp mai a, tun hnu ah chuan thleng tawh lo sela. Kha kan Home Minister zahawm takin action a la nghal a. Chuvangin in heng ang hi mipuite ti thlabartu, rikrap tu a nih avangin heng kawngah hian in thununna kan lek nasat leh zual a tul in ka hria a.

Tin, kan ngaihthlak tak ang khan HPCD te nen inbiakna neih mek a ni a, third round kan thleng tawh a, chutah chuan kan hriat tlan ang in July 27, 1994 khan Memorandum of Settlement HPC leh Mizoram sorkar ten kan siam a, amaherawhchu tunah HPCD an lo awm leh a chungte nen chuan inbiakna neih mek a ni a. Inremna te pawh kan nei ngei turah kan beisei a. Amaherawhchu kan inbiakna draft han en hian fimkhur a ngai hle in ka hria a, tih sual palh a awm chuan kan ram tana thalo thei thil tam tak awm palh thei a ni a. Kan Home Minister zahawm tak pwhin a hria in ka hria a, hemi ah hian fimkhur leh zual in, party pahnih te tana na si lo kan inrem theihna tur kha zawng ila, chuti niloa Mizoram thendarhna emaw, he kan ram dan neih mek, kan sorkar-in dan a

neih mek siam that a, thuneihna pumbilh emaw, khatiang zawnga an area a a awm palh a nih khan kan ram kal zelna tur ah hian thil pawi tak a thleng thei dawn a. Chuvangin chung zawng zawng chu sawi vek lo ila, khang ah khan fimkhur a tul in ka hria a. Tin, Law and Order-ah hian tan lak a ngai khawp mai a. Kan hriat angin Home department-ah hian hmasawnna tur tam tak central lam atang te in a rawn awm a. Tunhma Minister pakhat chuan ‘Home department-ah chuan salute chiah a tam e’ a ti thin e, an ti a. Mahse tunah chuan a ni tawh bik lo ang a, police in hmanrua changkang tak tak te an nei a, ram venhimna-ah pawh anni thlazar hnuaih mipuite kan thlamuang zel turah ngai ila. Chung angah chuan member zahawm tak te khan an han sawi a.

Kan tha ber ang zia zang hian kan han in sawi thin a. Kan that na hi uar leh lutuk hi chuan Pu Deputy Speaker, i vei lam ami te hi chuan kan that lohna lai hi kan lo hmu ve teuh mai tih hi min hriatpui ula, kan Parliamentary Secretary in bula bomb puak te em em kha chu ngaihtuah in garrage te a han tichhia te kha chu kan la theihnghilh thei lova. Tualthahna te, tualthihna te, khuangcher bo hial te pawh a thleng a thleng ta mai a. Thian dun ram vak te pawh kan intipalh a, silai hman chungchang-ah te pawh inzirtir kan ngai khawp mai.

Tin, Aizawl khawpui lun laiah te kan ngaihthlak tawh angin, Mission veng lamah te, Treasury Square helai he House zahawm tak sir maiah te, Labour Employment & Industrial Training office-ah te khatiang khan bomb te a han puak a, Biakin vawm chhiat te a thleng a. Ayodhya chungchang te kan hria a, rapthlak kan ti a, chutihlai chuan kan ramah ngei pawh thil thleng theilo a kan ngaih te pawh alo thleng ta zel a. Judge te an office leh an chenna in te kan bei a. Chawngte a thil thleng te phei kha chu politician te in leh lo te an tichhe vek a nih kha. Khang ang chi te pawh kha kan la theihnghilh awm lo ve. Chuvang chuan hemi kawng ah hian a mawhphurtuten tan kan lak lehzual a ngai a.

Tin, silai tawlh ruk te a tlem ta a kan ti a, silai 300 lai kan man te kha kan lo theihnghilh ta mai emaw ni chu aw ka ti a. A hlawmin silai battallion khat dawn mai ralthuam kan man a nih kha Aizawl dai mai ah! Khatiang te kha kan ni a. Khangah te khan National Security Agency lam pawhin an phuara te ngei pawh kha sorkar ah duhsakna kan la chan tir leh a ni deuh ber mai a. Tawngkam tun an huatthu suh ah, kan sorkar leh silai tawlhrutute hi an inthurual a ni ti ila kan sawisual lo mai awm mang e aw

tih chang te pawh a awm a. Khang ah khan kan hotute kan kal fimkhur a ngai khawp mai a.

Tin, kan police training te hi ration fee te kan han la a, chungah chuan an ei leh in pek chungchang ah te (hah taka training te an ni a) pawh hian duhthu te pawh a sam tawk lo ni te pawhin a lang a. India ram chhungah BSF te ration an dawn chungchang ah sawiselna nasa tak mai a awm a nih kha. Heng kan police training lai te hi chu ei leh in ah te pawh tha zawk, changtlung zawk, tuihnai zawk pek te pawh hi an phu ve in ka hria .

Chumai chu ala ni lova Pu Deputy Speaker, huan leh in saknaa chhawr te pawh hi sawi ala awm ta fo mai a, kan sim viau dawn emaw kan ti a, an vau na viau a, mahse kan Minister zahawm tak vau kha alo tawklo deuh aniang. Lo in en let nan zel hmang ila.

Tin, Aizawl free traffic jam an tih kha hmalakna hi a tha khawp maiin ka hria a. Kan Aizawl khawpui ah motor jam avangin harsatna nasa tak kan neia. Chung sut kianna tur chuan kawtlai dung zau tak tak ah motor kan dah khat a. Kan dah hnawk tlat a, chung a bo theihna tura sorkar in theihtawp a chhuah hi a lawmawm ka ti a, chungah te pawh chuan tan lak nasat lehzual te pawh a ngai, mipuite pawh hian kan la hrefiah tawklo emaw ni. Aizawl free traffic jam chungchange Vanapa Hall a kohkhawm tumin Local Council ho ka bial ami deuh chauh mai kha an kal a. An phur tawklo deuh nge ni, phur a ngaiin ka hria a, mipui zawng zawng ten kan harsatna intawm a ni.

Demand no.31-na Agriculture hi kan lut leh lawk ang a. Pu Deputy Speaker, kan intodelh loh chhan ah hian he House-a thu thinte hian mawh kan phur in ka hria. Mawh i la ngam ang u, kan mawhphurh a ni lo tih hi sawi chi ah pawh ka ngai tawhlo a ni. Khawilai ah emaw kan sawi kan sawi thin a, kan mawhphurhna hi la ngam ila, monitoring ah te, evolution chungchang ah te pawh kan kuthnathawktute pawh hi i fin chhuah ila, i kaihruai ang u, chuti a nih loh chuan heta tana sum leh pai kan hman hi a tam tawh lutuk a ni. Punjab Chief Minister lo ni thin, Bhairam Singh-an green revolution a tih theihna zat ang kha NLUP-ah pawh hian Pu Deputy Speaker, kan seng tawh a ni. Mahse vawiin ah chuan NLUP hi a hlawhtling kan han ti a, political measure-a in teh vang a ni. 2008 ah a hlawhtling a, 2013 election-ah a hlawhtling kan ti a. Amaherawhchu economic measure-a han teh chuan production te GSDP in a percentage hauh kha han en

ila, Agrigulture and allied sector-ah khan a tlem em em a ni. Chuvangin theihtawp kan chhuah tlan a, tan kan lak a ngai khawp mai.

Tin, project hrang hrang kan thawh ah hian MR te minimum wages anga pe lo department engemawzat kan la awm hi a pawi ka ti a, tan i la ang u. Anmahni chu kan inhre vek awm e. Tin, demand no 38-na RD-ah khan thingtlang hmasawnna turin ni 100 inhlawhna te, BADP te leh NRLM te pawh kan han nei a, project pawh tam tak kan nei a ni. Amaherawhchu ka sawi ang khan Agriculture ang chiah hian hmasawnna turin sum leh pai tam tak kan hmu, kan dawng a ni. Amaherawhchu hmasawnna a kal chak tawk lova, chungah chuan keimahni atang hian theihtawp chhuaha tan kan lak tlan a ngai tak zet zet in ka hria a. Helai chu sawi thui lo ila.

Tin, LAD demand no.39-na ah Village Settlement Act neih a ngai kan ti a, duh duhna ah khua an din a, a then ah zu te an zuar a, khatiang khan harsatna a thleng a. Khaw thenawm ten an rawn hal a, chungah chuan law and order a nghawng a ni. Hengah hian Pu Deputy Speaker, Manifesto-a kan telh ang khan hei hi chu tan i la ang u. Chutilochuan heng angah hian foreigner te kan invite tel a ni tih kha ka ngaihtuahna ah chuan a awm a.

Tin, Social Welfare department hi demand no.29-na, pum chhung atanga tar kun khup bih thlenga enkawltu an ni, an pawimawh khawp mai. Minister changtu in keini ai chuan a sawi thiam zawk daih ang a. Creche centre te a lo tawp a nih chuan Aganwadi te pawh hi tihchangtlun a ngai khawp mai a. Ka bial ah chuan rangva te kan pe ve thin a, Aganwadi sak nan hian. Khatiang khan Aganwadi sak nan hian (Deputy Speaker : Hun i hmang pel viau tawh ania aw) Minute khat lek Pu Deputy Speaker, Aganwadi hi naupang ten zirtirna leh ei tur tha an dawn na hmun a nih avangin helai hi ngaihpawimawh leh zual a ngai a.

Tin, PWD Commissioner vawiin thleng in kan la neilo ni te pawhin ka hria a, Women and Child development department te an indang thar niawm tak a ni a, a lawmawm ka ti a. Heng an hmalakna ah hian theihtawp chhuahin naupangte dikna, zalenna, sexual abuse chungchang ah te pawh dan tha tak kan nei a, heng-ah hian naupangte an him loh chuan kan ram a himlo thei a ni tih kha kan sawi ve duh a.

Pu Deputy Speaker, a tawp ber atan chuan Horticulture department hi department pawimawh tak mai a ni a. Chutah chuan anni hi kan thei tharchhuah min

tharchhuah sak tute an ni a, chutah chuan MIDH atang te, RKVY atang te in hma an han la a, chuta an hmalakna pakhat Dragon fruits supply chungchangah pawh hian thil fello tak mai a awm niin a lang a. July, 2016 khan open tender chhuah a ni a, amaherawhchu an fixed hma in a aia to daihin tunah hian an lei mek a, hei hi an officer te firm hminga supply a ni lehnghal a. Kan sawi kan sawi tawh a, fimkhur a tha a, mi harsa tak tak in firm an siam a, amaherawhchu officer te hian kan luahlan vek mai emaw tih mai tur hi a ni a. Heng te hi DPAB rate thar tur pending ni tlat si karah hian helaiah hian hnunghthak in hiah tawnna awm palh thei a ni a, fimkhur a tha khawp in ka hria a. Chuvang chuan he Horticulture department hmalakna hrang hrang ah hian tan kan lak a tul a, kan ram intodelhna turin thei leh thlaia kan intodelhna tura an hmalakna ah hian tun aia tan la lehzual turin ka sawm in ka inchah duh a ni e. Ka lawm e.

Pu Deputy Speaker, ka lawm e. Vawiinah kan Minister fel tak tak pahnih te demand kan sawi dawn a, kan sawi mek a, a lawmawm khawpin ka hria a. A hmasa berin Home department-ah hian han bung chawt ila,hun a tawi si a. Tawi te te a sawi leh sawi kim hman loh tam tak kan nei dawn a, a uiawm dawn hle in ka hria . Kan hriat angin Home department-ah hian kum 30-40 chhunga kan tih theih miah loh Police Centre DSP Office leh Police Station hmun hrang hrang ah kan sa uaih uaih mai a, a lawmawmin ka hria. Hei hi chu achievement ropui a tlingin ka hria a. Ka lo beisei phak ngai loh a ni a, hetianga building thar leh playground thlengin engkim an han tichho hi kan Home Minister hi a fakawm tak zet zetin ka hria a ni.

Chutih rual chuan, ka bialah khian police awmna pakhat te tak te Dungtlang-ah a awm a, Burma ram atanga sumdawnna bungrua leh thil thalo tinreng lo luhna leh bike ruka tlanchhohna hmun, smuggling kalkawng a ni a. Kan Home Minister pawhin ngun takin min en sak tawh a, mak a ti khawp a, a chhiat zia te pawh min hmuh sak a. Hei hi hetianga TA te leh thil chi hrang hrang tihna tur sum NEDP leh kan budget thar ah te a han awm tawh hi chuan Dungtlang Police Station khi chu min hriatsak ve sela. A thir te khi a mawih zo dawn a, a far lo lai pawh khi a awm mang tawh lova, a far lai kawh theih pawh khi a awm mang tawh lova, khi khi min hriat sak se ka duh khawp mai.

Tin, law & order dinhmuna kan improve zia hi sawi a chakawm hle mai a, kan sawi hman lovah ngai ta ila. Ka'n sawi chak em em chu Sainik School hi a ni a. Tun

hmain Home department-in an chang lova, Home-in an han chang ta a, chak deuh maia kan kal hi lawmawm ka ti a. Assam Regiment an din nachhan Mizote kan nih thu ka sawi tawh a, Assam Regiment ah hian Mizote tan tun thlengin quota 20% a awm.

Zoram buai laia sipai chhuti lo haw te kal leh kan phal loh avang leh underground ten sipaia luh thar an awih loh avangin battalion tina Mizo tamna ber Assam Regiment-ah tamna battalion kan nei ta lo va. Mahse kan Chief Minister , kan House Leader Pu Lal Thanhawla a CM hmasak atang tawh in Pu Lalsangzuala leh Brig.T.Sailo te nen tan an lakna zarah sipai kan ngah chho leh ta zawt zawt a. Tunah Assam Regiment battalion 16 laiah khuan battalion tinah hnam khatah chuan Mizo kan tam ber leh ta a, a lawmawm ka ti hle mai a. Amaherawhchu Sainik School kan neilo hi a pawi em em a. Kum 8 lai kal ta ah khan pawl chak tak pakhatin “inthlan dawnah enge kan demand ang?” tiin min rawn a, “No 1-ah Sainik School ti rawh u” ka ti a, an telh lo khiah mai a. Kan Chief Minister hmasa kha a office-ah darkar chanve ka leng a “Ka pu, Sainik Welfare & Resettlement Board-in an project siam Sainik School hi a tlang ruah tawh si a, engatinge i tih ngam loh? Ti hram teh, sipai officer kan tlem lutuk” ka va ti a. Ani min chhanna chu “Pu Sangkung, a dik khawp mai, a building sakna hi chu DONER-ah pawh ka hmu mai ang. Mahse recurring fund, recurring expenditure tur zirtirtu hlawh hi ka lungngai a ni”, a ti a. “Ngawi teh, sipai officer neih hlut zia leh sipai officer mai ni lo Sainik School chhuak doctor leh engineer te, technical department hrang hranga awmte an thatzia en hian, kei chu hei hi chu number 1-ah ka ngai a ni” ka ti a. “Recurring expenditure tur hi ka huphurh a ni” a ti a, ka hmin zo ta lo a.

Tuna kan Chief Minister hi 2008 inthlana a rawn chak veleh, hna hmasa bera a rawn nei chat mai hi chu a lawmawm ka ti a. Kuminah naupang 60 kan han la lehnghal dawn a, reiloteah Sainik School an neih vanga kan House Leader sawi fo, Manipur-in sipai officer kutzungtang chhiar tham pawh an neih loh laia (Mizo-in kan ngah viau tawh hnu ah), tunah chuan sang chuang fe, a sang tel Commission Officer an neih tak nachhan a sawi thin ang chiah hian, he Sainik School hi kei chuan kan thalaite a tak taka dinchhuahna tur, keinin a dang danga skill kan han tih te hi chu a hniamte te te tan a ni a. Hei zet hi chu ram siamna tur a tlingin ka hria a ni.

Chubakah mirethei `50,000 annual income neilote tan, an fate a free-a an dah thei tur te, `1,00,000 chin nei te tan a zahve 50% fee awl tura han siamte hi ropui ka ti a. Kan bial ang mirethei fate pawh an thiam phawt chuan hetah hian officer tha tak an ni dawnin ka hria a. Home Department hnuaia thil tih ropui tak niin ka hria a, ka lawm tak zet zet a ni.

A dawt lehah chuan demand no. 7, Excise-ah khan lut leh ta ila. Kei chu hna hi a thawktu a zir hian mihring tam leh tam loh hi a innghatin ka hria a. American ho police neih tlem zia em em te khu hna an hneh em em mai si a, quality hi a ni zawkin ka hria a. Excise force kan ngah tawk lo tih te pawh a dik em em rualin, an quality a that phawt chuan American police ang khuan tha sela kan thei a ni mai. Khutiang em ema kan tih loh pawhin, Pu Sesana, Chief Electoral Officer a nih a a sawi ka la hriat reng chu a lai lutuk a, ama rank ang pahnih ah an dah chho ta mai a, (pay inang) . Chuta a sawi chu “Hna thawh tham ka nei hleinem! Minute 5 chhungin ka zo vek mai thin,” a ti a. Ni khatah minute 5 vel thawk tur ah a inngai a. Ani kha IAS-a in interview dawn pawhin Chennai atangin a lo chho a, cham hman mang loin a in interview a, interview-ah 1-na a ni, an ti a. Khatiang kha a ni a, quality a that phawt chuan Election Commission kan indaih lo an ti, han tih te kha ani chuan hneh hi a in ti em em mai a, midang kawngkhar te kha a lo kakh vel mai mai a, khatiang kha a ni a. Excise department-a thawkte hian hma an sawn a. Minister fel kan nei a, rui ka hmu ngai reng reng tawh lo. Chuvangin quality zawngin kan kalin ka hria a, hei pawh hi harsatna tam tak karah tha deuh zawka kan enkawl chhoh te ka’n beisei a.

Ka hmaa Pu Ruatkima sawi ka tawm em em chu Commission hian tuna zir chian tur an report hi thehlut vat sela, rei em em han zirtur a awm dawn em ni le? Mizoram lah an hrechiang em em a, India ram lah internet-ah keipawhin ka hmetchhuak zung zung a. Hemi hian prohibition kum 1952-ah an ti tawp, 64-ah an ti tawp, chumi an ti leh tih te hi duh duhin kan hmetchhuak thei vek a. Har reng reng a awm lo va, zin an phal bawk si a, Zoram inhnial nasa lutuk hi, kuminah hian kalna lam tur turah kan kal hi a dik tawhin ka hria a, ka hmanhmawh ve em em a ni. I veilam ami te leh i dinglam ami te Pu Deputy Speaker, kan lungrualna niin ka hria a. Excise Minister chak tak hian nichina I.R. 3 an suspend nghal e, a tih ang khan, lo nawr chak se a tha khawpin ka hria.

Hetianga keini hnathawk paha kan ngaihtuah hi a lo kim tawk hauh lo mai a. Kan Department neitute, khatia pastor pension te, YMA atang tea Committee dinin ngun taka an ngaihtuah a, an recommend kha chu a tha berin ka ring.

Pu T. SANGKUNGA : Hlauh neilo in rawn zir ula, in zir chian ang kha, inhmuh ang dik tak rawn report vat teh u. Khatiang report base-a thil kan tih kha chuan kohhran thleng pawhin a lungawi thlak deuhin ka ring a. Tuna rinthua kan hmuh pakhat, tu sawi emaw kan rik pui luai ang hi a tha lo thei. In report hmuh hi chu a nghahhlehawm ngawtin ka hria.

A dawt lehah chuan ka ngaih pawimawh em em chu Jeevan Raksha Padak hi a ni. Kang thelh chungchangah te, tui tla-ah te Mizo hian mahni nunna thapa thian chhana che kan tam. YMA tlinglo taka kan hruai ve lai khan, conference-ah heng award Jeevan Raksha Padak Series, lawmman nuaih 1 te, sing 6 te, sing 3 te hmuh tur chithum a awm a, a form pawh office-ah ka kawl teuh mai, ‘rawn la rawh u’, ka ti thin a. Political department-ah ka chan lai phei kha chuan nodal department kan ni a, ka awm lai vekin Home Department-ah hian sown a ni a. Tunah hian mi nunna chhan avanga thite an thi hnu rei fe a ka zu zawhin ‘chutiang dil tur a awm e law?’ te an lo ti a. Tuitla chhara thi te, kangthelha thi te award in-kind-a lo kal te hi a mawi em em, President of India-in a rawn sem a, chhungte tan pawh hian a hlu ber hle in ka ring. He Jeevan Raksha Padak Series hi kan bial theuh YMA-te, MHIP-te pawhin kan bialah tungé khatiang hmu tlak awm tih kha ngaihven ila. A form hi tunah pawh ka kawl a, Home-ah te an kawl teuh a, DC tinin an kawl. Citation ziak that kha a pawimawh a. Ka chan lai chuan BDO, SDO leh D/C ten an ziak thin. Khang ho citation kha a pawimawh em em a. Kha kha kan sawi lar vak loh he award hi ka’n sawi leh duh a.

A dawt lehah chuan demand no.32-na, Horticulture chungchang hi ka sawi duh a. Eden huan atang khan Pathian hian thei ei turin min ti a ni. Thei ei tam hi an hrisel bik. Nimbu leh zawngtah, serthlum leh sawhthinga chakna tam zia te hi India rama magazine lar ber ber leh chi hrang hrang atangin a lo lang thin a. Chuvangin, thei chi tha kan neih theihna turin Central of Excellence, Horticulture department-in an nei nual a, Chite-ah te Thiak-ah te, Thingdawl-ah te, Mualthuam leh Haulawng inkarah te an lo ti ta a, a lawmawm ka ti a. A siam nan central in crore nga te min pe thin. Hetianga chak taka kan Minister-in a ti chho hi lawmawm ka ti a, tipung zel se ka duh a.

Pu Deputy Speaker, hun tlemte mi dang pawhin an dil belh che ang khan ka'n dil belh duh a. RD hnuiah hian BADP hi a lawmawm ka ti. Deputy Secretary ka nih laiin central-in an rawn ti chhuak a. Khawthlang bialtu kha Minister a ni a, a bial velah an hmang zo deuh vek zel mai a. Pakhat ka hriat reng chu Phaileng-ah C.H.C damdawiin la awm reng reng lo CHC building sak nan khawthlangah an hmang zo vek a, khatih lai khan khawchhakin kan hmu ngai lo reng reng a. Mahse tunah chuan kan Minister chakna zarah a rawn pung nasa ta em em a.

MLA-a kan tlin ve hlim 2013 ami aia kumina a punna ringawt pawh hi vaibelchhe 1623 in a pung tawp mai a ni, a punna ringawt a ni chu chu. Chuvangin kuminah hian vaibelchhe 5600 vel kan neih beisei a ni a. Hei hi kan Minister a fel bawk a, kan hmang tangkai em em mai a. Kan bialah te chuan rual taka sem a nih tawh avangin, a bialtu lamah khan a tam bik tawh lo. Chuvangin field, hall, kawng leh thil chi hrang hrang siam nan hian kan hmang a. Tunah phei chuan oxygen khawl te kan sem dawn a. Training-na tur rawn ti ngei ngei rawh u an ti bawk a. YMA bak ah MHIP leh MUP building pawh hi kan sa chho zut zut mai a ni. Khatiang khawpa tangkai, BADP fund a'n tipung thei hi kan Minister hi ka fak tak zet a. Hemi chungchanga kan biala a hnathawhte han sawi a chakawm a, amaherawchu hunin min daih si lova, a uihawm hle.

A dawt lehah chuan SPMRM, Centrally Sponsored Scheme zawng zawng rawn combine a hnathawh tur central-in a rawn tichhuak thar a. Centrally Sponsored Scheme-a conversion kan tih loh avanga mahni tih tih a kan tih pawi zia hi ka hmu hman a. Agriculture-a kan awm lain kan Commissioner hovin bul tan kan tum a. Department tinin mahni fund kha mahni in hman an lo duh theuh mai a. Ka hoin department hrang hrang min fan tir thin a, Agriculture leh allied department hna kan en thin a, mahse kan hlawhchham der! Tuman midang tan an fund hman an phallo. Hetia central-in a rawn ti ta hi a lawmawm ka ti a. Chubakah, kan Minister leh a thawhpuite an fel a, India rama implement tha ber kan ni. Chuvangin min rawn pek belh leh hial a ni. Hei hi thil lawmawm tak a ni.

A tawp nan, NEDP-a (Pu Dy. Speaker, min ngaithiam la) step kan han rem hi kan Minister hi a fak tlak tak meuh a. Hmannia ka sawi ang khan Khawbung-ah, Secretary LAD kan neih lai tih loh te chuan kan bialah LAD step hi a awm kan hre lo. Tunah chuan Chawngtui-ah te, Zawngtetui-ah te, Thekte-ah te pawh LAD step rem a ni

vek dawn a ni. Tunah hian work order an hmu vek tawh. LAD step rem that em em na chu, khawchhung a ni a, nipui laiin a khu lova, ruah surin an pheikhawk a berh lo ve tawh a. Khawlai black top te chu sawi loh, thingtlang khua te chu in hre vek a, a berh thin si a. Kha kha khawchhung miten LAD step hi an chhawr em em mai a. Tuna fund pun dan en hi chuan hemi let aia tam hi kum tharah kan nei dawn ni in a lang a. Chuvangin, NEDP an han tichhuak te hi an fakawm bakah kan LAD Minister-in khawte te ensan lova, Bethlehem Judai ram ami tiat lek lek te pawh min kep vek mai hi a ropui a, a lian phei chuan hmun thum te an nei a ni. Hemi hnuai thovah Agriculture link road hi ropui ka ti. District Council pakhat kan nih laiin Assam Minister a lo kal a, kawng chanchin kan CEM zawtin, “Is it jeepable?” a ti a, ani khan “Yes, it is also cowable” a ti a. Minister kha a beidawn hmel khawp mai a, a hawi hu hu mai an ti a. Thiam tawka an kawng sial kha cowable a ni a. Ka bialte khi chu sakawrable a tam em em mai a. Buh phurh dawnah ‘ ka pu, helai hi min rawn tihsak chuan 407 truck a tam ve tawh, buh hi kan phur thei ang. Burma an hausa tawh a, sakawr a lo thleng mang tawh reng reng lo’, an ti a. Sakawrable hi tunah hian motorable-in kan siam teuh tawh a ni. Chuvangin lawmawm ka ti em em mai a. Hetia Agriculture link road engemawzat kan Minister leh kan House Leader remhriatnaa kan nei leh, nakumah phei chuan kan nei belh tam lehzual dawn ni in ka hria a. Horticulture link road hi tuna kan hmabakah chuan ₹ 27.00 crore sanction sa kan la nei a, kha khan kawng laih belh ila. Kawng laih laih tur hian min daih dawn emaw ni aw! ka ti a. A min zawng zawng lah min then zawh sak vek bawk si a. Chuvangin Pu Deputy Speaker, a lawmawm ka ti em mai a han sawilo thei ka ni lova. Sentence khat chiah ka la bak chu, Social Welfare Minister zahawm tak hnuaia demand no.29-na ah naupang te te hnena nutrition an sem hi a tha lutuk a, naupang in an hmelthat phah, an puitlin hnu ah pawh. Miss North-East kan neih nachhan te pawh hei hi a ni awm mang e aw! ka ti a. Chaw tha sem hi a tha em em, hetiang ang tha tak mai an han ti zel te hi lawmawm ka ti. Awle, kan Minsiter chak tak pahnih te demand hi pass ngei turin ka han support a ni e. Ka lawm e.

DEPUTY SPEAKER : Pu Lalrobiaka.
Pu LALROBIAKA : Pu Deputy Speaker, sawina hun min pek avangin i hnenah lawmthu ka sawi a. Chutih lai chuan ‘YMA-a kan awm lai chuan’, tih sawi tur ka nei ve hauh lo mai a. Amaherawhchu, ka sawi tawi deuh zawk turah ngai ta

ila. Kan Minister zahawm tak Pu R. Lalzirliana demand no. 7 Excise & Narcotics-ah khan, ni e, nichinah khan an sawi tawh hlawm a. A pawimawh ber chu Excise & Narcotics Department te hian quality leh discipline an mamawh viau a ni tih ka sawi duh a. Chutih rual chuan kan check dan te, mi min hmuh dan te hre rengin NASA zawka kan improve a ngai a ni tih ka sawi duh a ni. Tawi te te in ka sawi ang a.

Demand no. 16-Home Department-ah hian ka sawi duh chu tun kan budget-ah hian an harsatna te hre rengin kan Minister chak takin duhsakna a pe hi a lawmawm ka ti a. Chutah chuan kan Finance Minister speech-ah khan kan hmu a, thil chi hrang hrang ruahmann a neih te, motor senso atan 427.7 lakh han dah ang chi te kha a pawimawh hle a ni tih ka sawi duh a. A bik takin border area bial kan nih avangin kan bialten kan mamawh hle thin a, bial kan fan pawhin an chuanna tur te nen lam kan tumsak a ngai fo thin a ni. Hei hi himna zawk atan te leh ram tana a mualpho thlakna tam tak a awmin ka hria a. Amaherawhchu, chutiang chu awm tawh lo turin huang zau takin kan Minister hian a rawn dah chho thei hi a lawmawm ka ti a.

Tin, ka sawi fo thin chu kan Home-a thawktute, kan officer-te pawh hian a thar thar hi an lo thlang deuh thin em maw ni tih te pawh hi rilru ah hian a awm thin deuh a. A chhia apiang hi hla deuh ah hian kan dah emaw chu aw tih tur a ni in ka hria a. Hengte pawh hi a area azirin, a hmun azirin, motor tha mamawhna laiah chuan, khawpui chhungah te chuan a tha lo pawh kha tha takin a siam theih a. Chutiang siamna awm lo hmunah chuan a tha te pawh hi kan dah a ngai a ni tih hi ka sawi duh a.

Tin, Pu Deputy Speaker, nangmah kaltlangin kan Home Minister, he demand neitu in min lo assure tawh, Kanghmun-ah a hmun pawh pek vek tawh, outpost hmun tur kha engtiknge kan sak theih dawn? Kan sa thei dawn ta em tih te pawh kha min han hrilhfhiaf thei se ka duh khawp mai a. Hmun tha lai tak mai Kanghmun khua in an pe a, chungte pawh chu hma lak a chakawm tawh khawp mai. A bik takin, Kanghmun tlangdung khaw 14 hi West Phaileng atangin an bial a. West Phaileng atang chuan kal har tak a ni, Rawpuichhip-ah lo chhoh a ngai a, Rawpuichhip atangin kal phei leh a ngai a. Chuti a nih chuan incident awm se engmah kan ti hman lo reng reng. Incident engemaw a awm chang pawhin Kulikawn ah te an han ti a, amaherawhchu, Kulikawn in extra petrol kan nei lo an tih chuan kal ngaihna a awm lo. Chuvang chuan harsatna tam tak kan nei thin a ni tih te kha ka han sawi duh a ni.

Tin, kan Econocmic Survey-ah khan police upgradation tam tak kan hmu a, a lawmawm khawpin ka hria a. A bik takin Forensic Science Laboratory thuamna tur atana pawisa dah te pawh kha a beitham hle nachungin nasa zawka tan kan lak a ngai a ni tih ka sawi lang zeuh duh a.

Chutih rual chuan Prison hi han lut leh zawk ila. Prison-ah hian ka lo hriat lar vak loh, lawmawm em em ka tih chu jail tangte zingah khuan IGNOU Study Centre-te lo siamin, BDP equivalent to Graduate kha mi pathumin kuminah pawh an pass a ni. Tin, khatiang ang chi thil chi hrang hrang carpentry tih te, stitching, weaving, agarbati-making tih ang chi te kha an lo inzirtir a. Anmahniiin pawisa an khawl piah lamah nasa takin an chhuah hunah pawh kha khan an nun a siamtha dawn a ni tih chiang takin a langin ka hria a, lawmawm ka ti hle a ni.

Tichuan, Agriculture-ah hian sawi leh ka duh chu, agriculture ah hian hmasawnna tam tak kan nei a. Mi sawi loh lam deuh sawi ka duh chu, Agriculture through-a hma kan lakna hrang hrang KVK-te, keini bial angah chuan kan hmang tangkai em em a, Lengpui-ah khuan kan nei a. Hengte pawh hi thuam that deuh theih ni se a lawmawm ngawt ang tih ka han sawi rualin, agriculture-ah hian NLUP kan tih atangin ram, lo hmun nghet kan neih avangin jhum cultivation kha mi tam takin an kalsan tawh a. Chu an kalsanna avang chuan 2010-2011-ah hian tikhan a kum telin, a figure sawi lo mai ila, an tlem tial tial a ni. Chu chuan afforestation, forest kan ngah telh telh dawn a ni tih a ti chiang em em a, hei hi a pawimawh khawpin ka hria. Vawiinah chuan ecological unbalance nasa taka a awm tawh avangin, kan sik leh sa leh kan tuihna te'n min kam san zo tawh a. Vawiinah Chite te kan en chuan, (tunhma chuan ti ve khanglang ila, a la rei lo viau a ni) kan chenna thin chu vawiinah chuan chawn thleng pawhin kan dai hlei thei tawh lo a ni. Chuti khawp chuan tui hna a tlem tawh a ni. Chutiang chu a nih avangin he hmalakna hi a lawmawm hle a ni tih ka han sawi duh a.

Tin, Rural Development hi ni e, thingtlang bialtu te tan leh thingtlang atana ding a nih angin, nasa zawkin tan an la chho zel a, a lawmawm hle in ka hria a. Watershed Development tih te, thil chi hrang hranga he department in hma a rawn lak te hi a lawmawm khawpin ka hria a. Tin, tun hma khan GCI inchung rangva kan sem thin a, chungte chu tihzawm leh theih dan hi a awm em aw tih te kan Minister hian min rawn react sela tha in ka hria a. Kan chhawr tangkai a ni, inchung nei lo te'n inchung an lo

neih phah a. Chu mai piah lamah chuan ka han sawi duh chu nimin piah thlipui tleh ringawt ah pawh khan keini bialah chuan in sawm chuang, a thente chu luah tlak miah loh, West Phaileng-ah te, West Phulpui khua ah te kan tuar a ni.

DEPUTY SPEAKER : Ngawi rawh aw lawk, hei dar 4 a ri a ni mai a. Engtinnge kan kal zel dawn nge tih kha House ngaihdan? Kal zel mai a tha em? Member 15-in an sawi tawh a, sawi tur vak kan awm hmel tawh lova. Tlang law law a tha mai em? A tha mai maw? Tlang law law ila, i hun i hmang zo hrim hrim a, tihtawp tum deuh tawh la a tha ang.

Pu LALROBIAKA : E, a zo tawh a ni maw? Tawi thei ang berin tih ka'n tum ang e. Rangva te, khang ang chi te kha kan mamawh em em zel a ni a. Kan Minister hian min hriat sak sela tih ka sawi duh a.

Tin, LAD hi an pawimawh em em mai a, khaw thatna tur atan te leh inrelbawlna chungchangah an pawimawh zia kan hria a. Min hriatsak tura ka duh chu, khua kan han siam a, entirnan, kan bial chhungah hian Hreichuk khua te, West Phulpui khua te leh khaw dang, tunhma atanga rauh san, mahse pem lut leh kha an han awm leh a. Chutah chuan harsatna an tawh chu an ram a hmaa neitu ni chung si in, an chhuah hlan khan an thenawm khua ten an ram ah an lo rin lut ve leh tawh a, chu mi vel a ramri ah chuan harsatna an nei a. Chutiang bawkin Marpara ruam ah te kan nei a, chutiang te chu kan Minister zahawm tak hian min solve sak theih chuan a lawmawm ngawt ang tih ka sawi duh a.

Social Welfare hi kan hriat ang khan naupang te atanga tar kun thlenga enkawltu an ni a, an hna hi a Pathian thu em emin ka hria a. An hnathawh chi hrang hrang, hmeithai chawmtu neilo pension an pek ang te, thil hrang hranga tanpuina te leh, thingtlangah phei chuan eitur tha an hmuoh loh lai pawhin supplements chi hrang hrang an sem te hian nasa takin, Pu Sangkunga'n thiam taka a sawi ang deuh hlek khan, tunlaiah chuan thingtlangah pawh naupang chhia leh tawp tak tak, naupang dawrawm tak tak awm thin ang kha kan hmu ta lova. Hei hi anni thawhchhuah a ni tih ka sawi duh a.

A tawp ber atan chuan Pu Deputy Speaker, Horticulture hian nasa takin hna an thawk tih kan hria a. Kan thei te, session hmasa-ah pawh ka sawi tawh a, Dragon fruit te, Kiwi kan tih te, theihmu chikhat Strawberry ang te introduce nachang an hria te leh, North-east ah pawh heng Dragon fruit te phei chu a ti hmasa ber pawl kan lo ni awm

a, chutiangte chu kan lo nei chho a. Amaherawhchu hei hi a tawk lo. Miin min hriat theihna tur atan leh nakin zela hlawhtlin pui thei tur khawpa sincere taka hma kan lak hi a pawimawh a ni tih lai kha ka'n sawi duh a ni.

Sawi tur a tam khawp mai, amaherawh chu ka duhtawk mai ang e. Ka lawm e.

DEPUTY SPEAKER : Pu Vanlalzawma.
Pu VANLALZAWMA : Pu Deputy Speaker, Minister zahawm tak Pu Thanliana chan lamah hian kal hmasa ila. Tam tak ka sawi lovang a, member dang ten an sawi teuh tawh a.

Ka sawi hmasak ber duh chu, Local Council pawh a ni tho ang a, Village Council-ah hian Anti-defection Law hi hman ve hi a tha awm mang e aw, ka ti a. A chhan chu hei hian kan political system hi a ti chiri tlat a ni. Kan hre vek a, ruling lam pawhin. Engemaw hlek avangin kan VC te an insawn kual an insawn kual hian min ti zahawm lova, he hnam hi a ti zahawm lovin ka hria. Dik tak chuan, MLA chinah te chuan tunhnai chho atang hian a tute pawh mai hi fel hi ka ti a. Party awmna an sawn dawn a nih chuan MLA-na te an bang hmasa a, tichuan an contest leh mai a. hei hi chu a fair a, a mawi a, mi rama kan hriat loh ang hi kan hre chho mek a. Chutiang chiah chuan Local Council/VC-ah hian hei hi a hman ve theih lawm ni aw, tih hi kan VC lam changtu kan Minister zahawm takin ngaiantuahna min hman sak se. A tu party tan mah hian tha pawh chuangpawh in ka hre lova, ruling tan phei chuan advantage zawk te pawh a ni mai thei a, amaherawh chu, ruling atanga opposition-a lo kal te pawh kan nei ve reng tho a. Hei hi he hnam tan hian thil tha ber a ni lo ani lawm ni? A thlangtute thlan chhuahna party-ah hian awm se anmahni tan pawh a tha a, he ram leh hnam tan pawh tha in ka hria. Chu chu ka sawi hmasa duh a.

A dawt leh ah chuan Social Welfare an sawi zinga ka rilrua awm pakhat chu, pian phunga rualbanlo tan hian tun ai hian hma a la lak leh theih zual em tih hi. Ram changkangah chuan kan hmu thin a, in lian deuh leh building pawimawh angah hi chuan wheel chair kalna tur an duang ngei ngei a ni. Kan ramah pawh kan ti ve tan deuh chuan ka hria a. Amaherawhchu kan damdawi-in ngei-ah te pawh, private hospitalah te phei chuan 'a awmlo' ti ila kan tisual vak awmlo mang e. Entirnan, kan Assembly Session te pawh, pianphunga rual-banlote'n lo ngaithla ve duh se han chet ve theihna hi a awm reng

reng lo. Hengho hi ngaih pawimawh leh zual a tha mang e, chu chu kan hmasawn chhoh zelna ah kan la tih tur tho tho a ni. Ti hma-ah tang ta ila, hnam fing kan lo ni mai dawn niin ka hria a. Kha kha Social Welfare-a ka sawi duh chu ni sela.

Tin, Horticulture-ah hian ka ngaihtuah dan awm ve hrim hrimin ka hria a, ti hmasawn tura kalpui zel hi a tha in ka hria a, Mizo te hi thei hmun han siam a thei han phun mai hi chu kan thiam a, a tute pawh hian kawmthlang huan han siam mai a eng thei emaw han phun ve mai hi chu kan thiam sa niin ka'n hre deuh a. Mithenkhat ten an tih ang deuhin leilet han daikawi tak tak tur hi chuan kan chawn te a lian deuh a kan tlin meuh lo a ni an ti a, kan leilet han neih ve te pawh engemaw hnu ah hi chuan vai te, khawchhak lam mi te kan ruai leh thin a, Champhai lam ah te khian ni in ka hria. Amaherawhchu a taima deuhin ram huan an siam a, chutih laiin a taima vak lo te pawhin inbul huan han siam a thei han phun mai hi chu kan thiam ah hian kan ngaisa deuh a. Hei hi awmze nei lehzual hian kalpui tai la kan ram intodelh nan hian a tha ang tiin ka ngaihtuahna ah hian a awm ve reng thin a. Kha lam atan khan Horticulture department hi tih chak leh zual a tha awm mang e tih kha kan sawi ve leh duh a.

Kan Minister zahawm tak Pu R. Lalzirliana demand-ah hian kal ta ila, pahnih han sawi ve duh ka nei a, pakhat chu Excise & Narcotic department-ah hian hmanni lawk ah kan sawi teuh tawh a. Kan Minster pawhin a sawi tawh kha, helai ah hian Review & Evaluation Committee din a ni a, nikum July ni 15. 2016 atang khan, a lawmawm hle mai a. Member tur atan pawh khan, kan ngaihthlak zawh tawh ang khan he dan MLCP Act kan hman chhoh dawn vel laia ‘kohhran kan rawn dawn lo’ tih thawm ring tak ang kha a ni ta lo deuh em ni aw ka ti a. Tah hi chuan a member-ah hi chuan hei non-officials member 17 lo lang zing ah hian member 10 zet mai hi chu kohhrana an nihna te nen dah lan an ni a, a lawmawm hrim hrim chuan ka hria. A list-ah hi chuan kohhrana an nih na emaw ni kan dah chhan tih chu engmah a lang lova, entirnan Upa Professor Lianzela te pawh hi a upa nihna atangin nge a university professor nihna lam in kan ruat ? Hetah a thlang ah te pawh Upa Dr. C. Lalrekima te pawh hi a Dr. nihna lam nge kan dah chhan a upa nihna lam tih kha engmah ziah chian a awm lo ni khan ka hria. Tin, Rev. Lalengkima te, Upa J.H. Ramnghinglova te, Upa R.K Thanga te pawh hi Upa a nihna lam nge MUP President a nihna lam? Tin, Upa Lalbiakzuala te pawh kohhran Upa a nihnaa dah nge sorkar hnathawk a nihna atanga dah nge, Central YMA

president a nihna tih hi a lang lova. Chutiang zel chuan Rev. Dr. K. Lalrinthanga te, Rev. R. Lalrinsanga te, Salvation lam Colonel Lalramhluna te hi? A chhan chu a pawimawh si a, he committee hian kan future tur kha an decide dawn a ni a. Pawn lam atang te pawhin thurawn te pawh va pe dawn ila he an appointment hmuhna key hi kan hriat fuh loh chuan a buaithlak thei viau in ka hria. Entirnan Pu Mabiaka te pawh YMA lam atanga appoint a nih chuan YMA key angin advise te pawh kan va pe thei a, mahse a kohhran upa nihna atang a nih kha chuan a key kha a dang lo thei dawn lova, helai hi tih chian theih a ni em ka'n ti deuh a. Chutih mek lai chuan terms of reference-ah hian Economical & Social Aspect tih hi a point khat-na a ni a, pahnihna-ah Health aspect a ni a, pathumna-ah Pu Deputy Speaker, i phal na in kan chhiar tlang law law ang e. Review of the Implementation of the MLPC Act and Rules, 2014 tih a ni. A tha khawp mai a, hetah hian Religious aspect te hi telh ve chi a ni lo em ni aw ka ti a. A chhan pawh a member tam ber pawh khalam background nei an ni a. Chutih mek laiin he MLCP Act-in a nghawng nat em em chu kan sakhuana thil, kan sakhuana hi a ni. Kan kohhran, kan religion hi a ni. Chutih lai chuan Presbyterian Kohhran anga sawi phei chuan kan Pavalai Pawl hi a nawk na hle mai a, a tibuai viau ni te pawhin veng tam takah hian ka hria a. Chuvang chuan religious aspect kha en turah hian a tel lova, hengte pawh hi en turah khan telh leh ni se a tha lo maw tih te kha rawtna angin Excise chungchang kan sawinaah hian kan sawi lang tel duh a. Tichuan khalam chu duhtawk leh ta ila.

A tawp ber atan chuan ti tawh mai ila, hun te kan hmang nasa tawhin ka hria a. Home Department chungchangah hi chuan lawmthu sawina lama han tan hi kan duh ve tlat thung a. Kan Home Department leh a bik takin kan Police Officer rual awmna, sawlai Police Headquarters, a hmingin sawlai ka bial ve, Khatla Aizawl West III-ah sawn Bethel Road kan tih saw hman deuh khan kan khawtlang hruaitu, kan Local Council-te leh tlawmngai pawlte leh kohhrante nen tang tlangin kawngte kan zauh a. Sawngah sawn Police Headquarters lama kan hotute leh kan Minister-te pawh in chungah lawmthu sawi ka duh a, a bialtu MLA nihna angin. Khawtlang hruaitute nen lungrial takin engkim kan ti thei a. Sawlai kan ram han sahthlak hlek hlek ngaite pawh engmah buai lovin thil kan ti ho chho a, a lawmawm tak zetin ka hria a. Chutih mek lai chuan sawi chhuahte pawh thil pawi a nih ka ring chuang lova, thil tha lam a ni a. Khatla Presbyterian Kohhran chungah pawh sawn lawmthu sawi tur awmin ka hria a, he House-

in record-a kan neih atan pawh ka duh a ni. Saw kawng zauh chhoh nan leh a chhuat han hniam nan sawn cheng nuai li leh sangsarih an thawh a ni, kohhran pawisa kha. Chungte pawh chu vawiin-ah hian he House-a record-a awm ve hrim hrim atan lawmthu sawinain kan tan ang e kan tiyah khan sawi lan ve thain ka hria a. Mi dangte pawh hian entawn se a va tha em! Tin, Khatla Presbyterian Kohhran phei chu ka hriat sual loh chuan thlanmual kawng atan pawh sum tam tak, nuai tam tak an thawh tawh a ni. Chuti chung chuan sawlai Bethel road zauh nan leh tihniam nan leh lung rem nan te sawn nuai li leh sangsarih an thawh a ni tih kha nichinah khan kan confirm nghe nghe a, kan Local Council memberte atangin. Chungte chu ka'n sawi duh a, a lawmawm hlein ka hria a. Hetianga kan tan tlan hi chuan thil tih hi a nuam tlat a ni. Hmasawnna pawh hi a kal chak bik a ni tih te kha ka'n sawi duh a ni.

Home Department-ah hian thil han sawi leh lawk ka'n duh chu, a bik takin traffic police ho hi ka hmuh ve phak chinah hi chuan fak te pawh hi an phuin ka hria a. Rem leh rem lova a hminga MLA-te salute min lo pe hram hramte hi chu ti lo mah se a pawi lo mang e, an duty zawk hi a buai phah ang tih te hi ka hlau ve thin a. An fel hlawm khawpin ka hria a, kan traffic police hi. Chutih mek lai chuan duh ang erawh chuan an indaih tawk lo deuh a nih hi aw tih hi ka ngaihtuahnaah a awm thin a. Hei aia tam hi an dah luh theih lawm ni traffic-ah hian, engemaw hleka chuan kan mamawh nghal zel bawk si a traffic police-te hi. Chutih mek lai chuan a chang chuan an zaidam lutuk te hi kan buai phah em ni aw te hi ka ti lek lek ve thin a. Kan thiante ho pawhin an lo ti deuh a. Hetia motor kan han tlan a, Aizawl chhim lam atanga Chanmari han tlan mai pawh sawn mahniin khalh ve phei hi chuan hauh awm tak hi pahnih pathum hi kan hmu phei hman deuh ziah lehngthal a. Nilenga ding phei chuan an hmu hnem ngawtin ka ring a, mahse mi han hauh vak vakte hi an ti lem lova. Hei hian mi hi a tihuangtau lutuk em ni te hi ka ti hial a, traffic police ho hi an fakawm ka tih rualin tih tam lehzual theih te hi a ni lawm ni aw ka'n ti a.

Tin, helaiah kan House zahawm takah pawh kan Minister-te leh kan hotu pawimawh dangte pawhin an lo sawi fo thin, Constable post hi a ruak tam hle niin ka hria a, 2000 lai mai a ruak ti ang deuh khan hmanni khan helaiah hian kan sawi ni khan ka hria a. Hei hi hnawh khah dan a awm lawm maw ni le? A nihna takah chuan a hna thawktu tak tak an nih berna lai hi a awm a ni. Tukin zinglamah te pawh kan ngaithla a,

MPSC lamah kha chuan tun maiah chuan officer mamawh belh lo ni ang khan kan House Leader zahawm tak khan a sawi niin ka hria a. Chutih mek lai chuan a constable lamah hian lak thar hi an khat khawp maiin ka hria a, hei hi tih belh leh chhoh deuh ni se he ram pumpui tan hian a tul mang e tih kha ka'n sawi duh a.

Tichuan a tawp nana kan sawi leh duh chu border fencing chungchangah hian kan Home Department te hian tun ai hian ngaihtuahna kan hmang lehzual thei em tih kha a ni a. Hemi Assembly Committee-in kan member zahawm tak Pu Ramsanga hoin kan han ngaihven deuh a, Pu Nihar-an a sawi zing si a tiin. Tah chuan a tir phatah chuan Home Department zawhna kan va zawh khan “Khulam thil a ni a, central lam subject a ni a, kan hre lo” ti khan min chhang a ni. Mahse kan awih chiah lova, kan han tih kan han tih kha chuan a tawpah phei chuan kan kal zelah khan kan Home Minister zahawm tak ho hian a room-ah te pawh kan han thlir ho ta a. An lo hre tehmeuh mai a, khulai Border Fencing kalphung, a nih dan tur te pawh kha. Tichuan tunah hi chuan tha deuh hian kan thawkho ta ni ber hian a lang a, kan Home Department te leh keini Committee hi, a lawmawm khawp mai a. Chutih mek lai chuan an sawia chu Bangladesh border-ah khuan, kan inrina lamah khuan a then laiah chuan 5 km dawn dawnte helama thuka hung a awm a ni an ti a. Tin, chutih lai chuan a danah kha chuan zero point atanga yard 150 aia hnaia hung awih loh tih kha a ni a, kha kha chu kan va bawhchhiat rual a ni lova. Mahse an rawn hung thuk lutuk a ni. Kha ram kha technically chuan kan chan lo nachung hian duh hun huna kan chhuah theih tak loh avang khan engmah hi awmze neiin a va tih hleihtheih tawh loh a ni. Chulaiah chuan kan Home Department pawhin ngaihtuahna hman lehzual a tul a ni tih kha vawiinah ka sawi duh a. Vanneihthlak deuhin hmanniah kan Committee chu kan zin a. Meghalaya-a an fencing kan tlawh a; tin, West Bengal-a an fencing kan tlawh a. Meghalaya-ah chuan buaina em em an nei lova, an land system te tlema a lo dan deuh avangin. Mahse West Bengal-a an lo tih, helaiah pawh kan lo tih ve theih mai si kan tih loh awm pawi em em mai chu West Bengal-ah chuan khua a tan tlang dawn chuan kha kha chu kan kal kan hrih mai an ti. Chutih lai chuan an kal kan hrih mai lai khan flash-light hi chu kan dah tho a. Border fencing-ah hian a fencing mai bakah kawngpui leh flash-light hi dah vek tur a ni a. Chu West Bengal-ah chuan ‘Flash-light chu kan dah tho a, khaw chhungah khan mahse khawchhungah chuan engmah kan thawk lo mai a ni’, an ti a. A controversial lutuk a, an buai a ni, a buaithlak tih an sawi a.

Amaherawhchu khatianga a buai lo laiah khan an hung mai a. Tichuan kawngpuite pawh tha deuhin a sirah, a hrulah khan an siam a. Tichuan he kawngpui siam tak laia pawh hi Pu Deputy Speaker, i phalnain sawi uar deuh kan duh lai a awm a. A hminga MP ka nih ve lai khan Tlabunga bul an tan dawn lai sawn kan va kal a, kan tlawh ve a. An ti an ti a, an tih dan phung kha min hrilh a, a that vak loh dan turte chu ka ngaihtuahnaah a awm a. Mahse min convince ta tlat hi a awm a, chu chu a hrulah hian kawngpui tha em em hi kan siam ang a. Engtik lai pawha tlan zar zar theih turin, BSF duty te an tlan pur pur theihna tur a ni dawn a. Tin, lui a lo cross pawhin luiah leihlawn kan dawh ang a, kha kawngpui kha chu a tlang zel ang. Tin, a fencing pawh hi tlang zel tur a ni an ti a. Chumi a nih avang chuan kha fencing lo kal ruala awm tur road project zawk kha a tuipuiawm niin ka hria a. An bulah pawh ka ti nghe nghe a, kan tlawh lai chuan “A ! fencing te hi chu nakinah a tlu mai mai ang a. Tin, in duh leh in hmanhmawh deuh leh in lo nawr thlu deuh ang a. Thir hling neite pawh hi tihian a awm reng lo ang, amaherawhchu a kawngpui tlang ringawt tur pawh hi he ram, in area tan hian a hlawk dawn lutuk. Chuvang chuan object chiam loh phawt hi a va tha em” te ka va tihpui nawk nawk a. Chu chu kha kawngpui zawka kha tunah hian an ngaipawimawh leh mang si lova, khulai kan border hungtute khuan. A fencing lai an ngaihpawimawh viau laiin a kawngpui, a hrula kal ngei ngei tur kha an ngaipawimawh tawk lova. Chutih lai chuan flash-light kan tih pawh kha an ngai pawimawh lo a ni. Chuvang chuan Home Department atang hian hei aia uluk lehzuala ngaihtuahpuia nawrpui deuh hi a tha mang e aw tih kha vawiin hun remchangah hian ka'n sawi duh a. A chhan chu chu West Bengal-ah te pawh mihring chenna khua kha chu a su hrih lova, amaherawhchu flash-light kan vuahsak a an ti a, kha kha an chhawr em em a, street light tha tak kha a ni mai a. Tiang deuh pawh chuan kal hi a va tha em Pu Speaker, kan ti a. Hun i en i en tawh a, a bak kha ka sawi zui tawh lo mai ang a. A dangte pawh sawi tur chu sawi chakawm tak tak ka nei a. Amaherawhchu member zahawm tak takten an sawi tawh a, khang Agriculture lamte leh Rural Development lamte sawi zui ngai lovah kan dah mai ang e. Ka lawm e.

DEPUTY SPEAKER : House Leader-in sawi duh a nei em aw? A nih chuan kan sawihona kan duhtawk tawh ang a. Minister zahawm tak Pu R. Lalzirliana sawm ila, kan sawihona te han wind-up se, pass rawn dil nghal se a tha ang.

Pu R.LALZIRLIANA, MINISTER : Pu Deputy Speaker, ka lawm e. Kan sawi tui a, ka department chan hi member 16-in min sawisak a. A vai deuh thaw in min sawisak vek mai a, a lawmawm hle in ka hria.

Thuhma han neih lawk ka duh chu nichina Saipum thil thleng kha. An silai hman kha 7.62 SLR a ni a, mu 20 lai an lo kapchhuak niawm tak a ni. Chumi a nih avang chuan constable no.245 Lawrence Rochhunga leh constable no.190 Lalrinnggheta, heng hi kan Department lam officer ten an suspend nghal a, anni 2 hi police lam hotuton an duh an thlan theihloh laia lak te kha an ni a.

Chuvangin a pakhat Post Commander charge latu a ni , hei hi a mawl luat avang nge ni, hotute hnenah report vat a tum lova. Chuvangin suspend ve a ni a, hei chu Congress hunlaia lak a ni a. Chuvangin ka rilruah helaia lo awm ta hi chu session lai berkher leh ka demand sawi dawn zana Pu Deputy Speaker, hetiang lo thleng ta hi fuih ru tu an lo zu awm leh hman emawni chu aw tih te min ngaihtuahtir rum rum a ni. Vawiinah sawi nuam ti tak tak te an awm avangin.

Tin, nichinah khan kan member Pu K.Lalrinthanga khan, ‘ ka thusawi avanga mi rilru na an lo awm a nih chuan ngaihdam ka dil e’, a ti a, lawmawm ka ti khawp mai a. A changtu Minister ka nih ve avangin Excise hi keipawh khalai thu ah khan kan thianten mi rilru ah, an thusawiah mi rilru a lo na palh a nih chuan ngaihdam ka dil a.

Tin, Pu John Rotluangliana phei kha chuan ama irawm chhuak ni lovin a thiante thusawi a sawi chhawng ve mai chauh a ni a. Chuvangin khangte kha Facebook ah te ‘ka thianpa chuan’ a ti lai sawilang duh si lovin khalai chin chiah kha cut in ama irawm chhuak sawi niawm takin an thehdarh kha thil pawi tak a ni. A ngaihdan a ni hranpa lo tih kha kan chian a pawimawh a.

Tin, helai House-a private member resolution kan han sawinaah te ngat phei hi chuan party ngaihdan emaw, sorkar ngaihdan emaw kan sawi lo a ni. Mimal te hian zallenka kan nei a ni tih kha ka’n sawi tel duh zawk a ni.

Tichuan, ka department kha min phurpui a, ka lawm khawp mai a. React tur hi a tam khawp mai a. Amaherawhchu helaiah hian kan sawi duh chu Opposition Group leader zahawm tak Pu Zawman hmannia a sawi kha kan apply ve mai loh chuan

hun hi a rei lutuk dawn a. Vawiinah hian dar 4 kan pel ang tih chu hria ila chaw te lo ngaihtuah a, thingpui te pawh lo lum tur a ni a. Amaherawhchu kha kha kan ti si lo va.

Keimahin tun budget-a kan sawi tur, sawi awm tak tak te ka lo nei ve bawk si a. Hemi hi tunah react lovin ziakin, ka tihdan tura kan officer ten min han pek ringawt pawh hi tha deuh deuh vek mai a nia, dik deuh deuh vek mai. Chuvangin ziakin kan rawn chhang che u ang a. Vawiinah hian kan chhang theilo che u tih lam ni lovin, a rei lutuk hi chu kan ning deuh thin a. Kalphung thar deuh leh Parliament ah te pawh (**Pu VANLALZAWMA** : Pu Deputy Speaker, a tha zawk ziaka min chhanna kha.)

Pu R.LALZIRLIANA, MINISTER : an lo practise thin a ni a, thil thar han ti ve ila a tha ang e. A lawmawm e.

Excise-ah hian kan tan ang a. Excise hi kan tui a, kan sawi vekin ka hria a. Kan tuina chhan pawh hi zu a nia. Zu hi chu a tute pawhin kan lo buaipui vek mai niawm tak in ka hria a. Hei kohhran rawn lovang tih lai hi kan sawi nawn leh thin a. Nia, khatihlai khan, kan han tumlai vel khan, Ethics Committee-ah hian MKHC-a kan hotu, kohhran upa min leh kan pastor te kan hmang hlawm a.

Chungte nen chuan kan inah kan sawiho a, an lo leng a. ‘Hei tunah hianin zu hi sorkar hian zawrh tul a ti si a. Total Prohibition-ah pawh duh hun hunah in tur a awm a, kohhran ang pawhin in tur a awm tih hi chu kan chiang a. A chhan chu ngawlvei camp te kan siam reng a, kan buaipui ber a ni a.

Chuvangin an zu in te hi a chhe ropui si a, zu tha deuh zawk an in theihna turin sorkar hian MLTP Act hi tihdanglam a tum a ni a. Helaiah hian kohhran hi chu kan rawn dawn lo che u a ni, a chhan chu kohhranin dinna sa a nei a.

Chuvangin zu chungchangah hian kohhran sakhuua hotute kha rawn hi a tullo hrim hrim a, ngaihdan chiangsa kohhran chuan kan nei a. Kan rawn che u pawhin a rem lo ve tih kha a ni mai dawn a. Chuti chunga sorkarin a zawrh luih si chuan in tan hian a insulting lutuk dawn a, inpawisaklohma let tawp a ni dawn a.

Chuvangin kohhran thianghlimna hi humhalh a tha in ka hria. Zu chungchangah hi chuan inhambuai ve lo ila a tha in ka hria. Chuvangin kohhran hi kan rawn dawn lo che u a ni’, ka ti a.

Khalai lo kal zawng zawng kha chuan, ‘a dik chiah, kohhran hi rawn kan ngailo’, an ti vek a ni. Chu chu ka sawichhuak mai a ni a, khalaia kha han sawilan ve hrim hrim a tha in ka hria.

Tichuan Pu Deputy Speaker, Excise & Narcotic Department hi a tirah chuan Excise & Taxation Department-a bet kha a ni a. Ni 24/08/2006-ah khan Excise Department kha a inla hrang ve ta a ni. Hei hi Mizoram sorkar hnuai Excise duty/chhiah latu leh ruihhlo do tura sorkar kut leh ke pawimawh tak a ni tih hi tun hunah hi chuan kan hre vek awm e.

Darkar 24 duty, uniform ha an ni a, tunah hian Aizawl, Lunglei, Saiha, Champhai, Kolasib, Serchhip, Mamit-ah te office kan nei a. Vairengte-ah hian check gate kan nei bawk a ni. Hetianga ruihhlo dotute an nih avang hian kan officer pakhat leh constable pahnih phei chuan ruihhlo zuartute kutah hian an nunna hlu tak an lo chan tawh nghe nghe a ni. Kha post siam belh, post hi hnawhkhah atan a tha tih te pawh kha kan ngaithla hnem a. Post hrang hrang hi 635 kan nei a. Chutah chuan 511 hi fillup a ni a, 124 hi post ruak kan nei a ni.

Mizoram Liquor Prohibition and Control Act,2014 hi kan hman atang khan keini department lo teh ve danah leh mi tamtak hmuh danah hi chuan a hmaa kan huphurh ang em em ai khan a ziaawm a ni. Total Prohibition lai ai mah khan khawlaia zu rui an tlem a ni lawm ni tih theihin kan hmu ve a ni.

Chutiang chuan he dan kan hman hnu ah hian Liquor Vendor hi license hmannah khan ziak ka neih reng lai pawh khan kan sawisual a, 68 a awm a. Chutah chuan mi 61-in dawr an hawng thei a, bar license nei hi, a hmuna in theih nghal mai hi mi pahnih, hmun hnihilah a awm a ni.

Chutiang chuan tunah hian Champhai Winery te leh Mizoram Baptist Kohhrante MoU ziakin sacramental wine atan hei hi an hmang dawn a. Kan rama kan thar chhuah ngei mai hetianga kohhranin an lo hmang dawn ta te hi a lawmawm ka ti a, ka fak hle a ni.

Excise and Narcotic Department hi Mizo mipui tana rawngbawltu pawimawh tak te an nih avang hian Mizoram sorkar pawhin a ngaihthah lova, tun hunah hian a tih len dan kawng te leh office te pawh hmun dang dangah check gate te pawh hawn belh zel kan tum a ni tih te kha kan sawi ang a. Hman deuh lawkah khan

engemaw min han lak belh sak nghe nghe a ni. Khangte kha an training chhuak vek tawh a , tunah hian an duty ve mawlh mawlh tawh nghe nghe a ni.

Tichuan a rei loh nan kan ti zung zung ang a,Rural Development Department hi han sawi hmasa ila. Keini department hi central sorkar CSS atanga kan sum leh pai hi kan hmuh deuh vek a ni a. Tunah hian 2017-18 estimate (budget estimate) ah hian IWMP kan tih PMSY kan han tih tak te pawh hi a ni ang chu, chutiang ah chuan budget-ah hian nuai 3835 dah a ni a. Current financial year-ah hian nuai 3835 bawk dah a nih lai khan central atanga kan hmuh hi nuai 1606 chauh a ni a. Tichuan Mizoram state tum ve tur SMS kha tunah hian min pe kim vek tawh nghe nghe a ni. IWMP-ah hian project 89 kan nei a, chuta project 16 chu zawh tawh a ni nghe nghe a ni. PMKSYWDC/IWMP hma lakna hnuiah hian self help group 1446 kan nei a. Tahchuan production of micro enterprise hnuiah hian

DEPUTY SPEAKER : Ngawi rawh, Chair kan han inhlak lawk ang e,

S P E A K E R : Le sawi zel rawh le

Pu R. LALZIRLIANA, MINISTER : mi 2065 assistance pek an ni tawh nghe nghe a ni. NREGA (N rega) kan tih mai hi nichinah khan kan han sawi a, ni 100 inhlawnna ni a kan han hriat lar kha a hming hi a pu zo ta lo a ni tunah chuan tih kha zep thu a awmlo a. Tuna sorkar dinglai BJP sorkar phei khu chuan Congress sorkarin an lo siam kha a ni a, a tirah phei kha chuan tihtawp te pawh an han tum deuh ut ut ni te khan kan hria a. Amaherawhchu an tlinna state atanga state lian pui pui atanga nawrna nasa tak an tawn leh avang hian tunah hi chuan ngai kan awh chho leh deuh tawh a. Central share atan hian kumin 2017-18 atan hian nuai 22462 dah a ni a, tiang chuan 2016-17 ah khan kan sum dawn zawng zawng chu nuai 8744.61 a ni a. Hei hi kan state in kan lo tum ve tur pawh pek chhuah vek tawh a ni.

Sum hmuh chin atang hian average-a lakin Mizoram pumah hian tunah hi chuan ni 42 inhlawnna siam sak theih niin kan ngai a, chutiang a nih lai chuan nikuma financial year pawisa dawn atang leh tun March ni 16 maiah pawh khan Ministry atangin nuai 5706.65 an rawn release leh tawh a. Chuta tang chuan kumin 2016-17 financial year pawisa atanga kan inhlawh theihna tur hi chu ni 60 vel inhlawh thei dawnin kan in

hria a ni, hei hi a lawmawm kan ti khawp mai. Tunah hian ni khatah ` 188/- an hlawh a, April ni khat atang hi chuan ` 194/- an hlawh ve tawh dawn a ni.

IAY hi 2017-18 ah hian (IAY tih te PMAYG heng hi an duh duh hian an rawn thlak a, keini ang rual tan chuan hriat hlei theih mang loh hian a awm a) kan budget ah hian nuai 908 ruahman a ni a. Tunah hian matching share pawh kan dawng zo tawh a, 2016-17 atan khan first instalment-ah central atangin nuai 2185.845 min rawn pe tawh a, SMS pawh keimahni Finance Department hian harsatna min siam reng renglo in min pe nghal zung zung a ni. Hei hi Finance Department chungah leh Minister chungah pawh kan lawm khawp mai tih kha kan sawi tel duh a ni. Tichuan 2016-17 chhunga pawisa hmuh zawng zawng hi nuai 3136.376 a ni a IAY-ah hian. Heta tang hian chenna in 4527 sak tum mek a ni.

National Rural Livelihood Mission tih te leh thil dang tam tak hengah hian kan nei a, a vaiin kan sawi seng lo ang a. DRDA-ah hian kuminah hian nuai 164.76 central share atan dah a ni a. Tichuan central-in min rawn pek tam deuh leh khami kan lo tum ve tur kha harsa lovin helaih kan lo pe zung zung dawn a ni. SIRD hi 2016-17 ah khan budget estimate chu nuai 76 dah a ni a, kuminah hian nuai 91.20 dah a ni a. Tichuan nikum atan khan training lam hi an hma nasa a, anni hian tum 146 training tura proposal siam a ni a, amaherawhchu tun thleng hian tum 139 mi te va trained a, va kal kha an ni. Nakum atan pawh 146 tho hi trainingna hun atan chuan dah a ni tih kha ni mai sela.

Border Area Development Programme helai hi in rawn sawi tel avangin block level administration tih te, Direction and Administration tih te, Administration for Rural Development Programme tih ang chi te kan nei thluah mai a. BADP-ah hian 2016-17 ah khan nuai 4550 kan hmu a, chuta tang chuan hna chi hrang hrang 503 kan thawk a ni.

Rural Housing Scheme Distribution GCI Sheet tih hi mimal hnena rangva inchung nei zo lo te, rangva inchung chhe tawh si te hnena sem thin a ni a, bundle 4 zelin sem thin a ni a, chu chu a phek zawng chuan phek 32 a ni. Kuminah tunah hian min pe chiah lo na in NEDP lam atang hian kan hotuten engemaw zat chu mirethei te tanpuina tak tak a nih avang leh tun hma atanga kan hotupa kan Chief Minister zahawm tak hi,

amah lo hi chu rangva hetianga sem hi an awm ve lo va, chuvangin keini kan awm chhung hi chuan engemaw zat hi chu kan sem dawn a ni tih kha ka'n sawi duh bawk a ni.

Flood Control and Irrigation of Potential Area, Ngopa tih hi kan sawi tawh a, kumin chhung hian zawhfel kan tum tawh dawn tiin kan sawi tawh a, kumin chhung hian zawh fel kan tum tawh dawn a ni. Hei an tui lak hi a tha hle mai a, Ngopa mipui ten huan lo ram atan nasa takin an tangkaipui dawnah kan ngai a ni. Nichina kan sawi tawh ang khan Aloe vera te hi Horticulture lampang lo tih kha a ni awm a, amaherawhchu Rural Development hi chu CSS lam atang hian eng eng emaw kan thawk nual a, hengte pawh hi Chhanchhuahna Khawpui-ah hian nuai 446.6 lai hian thawh tum a ni a, tunah hian 74.82% thawh zawh tawh a ni. Mini Sport Complex tih te, East Lungdar -ah hian nuai 434 -in tunah hian an thawk tan mek a. Tin, Khawbung-ah hian nuai 369.86 -in an thawk tan mek bawk a. Saitual-ah hian nuai 310.33 -in multi shopping complex an sa mek bawk a ni. A chunga tuna ka han sawi tak ang te kha kumin 2016 – 2017 chhungin thingtlang khuua chengte tan hmasawna hrang hrang Rural Development-in an thawh te a ni a, kan hmalakna tam ber hi Central Sponsor Scheme hnuiaia thawh a ni deuh vek mai a. Heng hi hlawhtling taka kan thawh theih nachhan chu a department officer-te, a hnathawktute inpekna vang liau liau a ni a, an chungah hian lawmthu ka sawi duh a. Rural Development hmalakna ruahmanna siam hi thingtlanga cheng tan thingtlang lam kawng kawk deuh vek a ni. Heng hi fel fai taka kalpui zel pawh kan tum a ni.

Pu Speaker, Agriculture Department-ah hian kan kal leh zuai zuai ang a, Agriculture Department hi Directorate pahnih a then a ni a, tunah hian Crop Husbandry hi kan sawi zung zung ang a. Theihtawpin Agriculture Department hian hma an la a, buh thar te pawh a pung ve hret hret zel a. NLUP leh CSS avanga hengte hi lo pung chho zel a ni a. Kan ram hi MIRSAC lam in an hmuu dan chuan terrace leh leileta siam tlak hi hectare 74644 awmin an hria a, chutah chuan keini hian hectare 16862 hi kan khawih mek chauh a ni. A bak hi hma kan la sawn lo a ni. 2016 – 2017 hian WRC atanga kan buh thar hi metric tonne 36979 a ni a, tlangram lo neih atang hian metric tonne 23665 a ni a, a vaiin metric tonne 60644 a ni a, kum 2011 chhiarpui atanga chhutin buhfai kan mamawh zat hi 33.69 lai kan tum ve thei ta a ni awm e kan ti a ni.

Tin, Oil palm hi hectare 25027 a zauah chhungkaw 10843 -in tunah hian an ching mek a, oil palm rah fresh fruit bunch hi metric tonne 13714 kan thar ve tawh a, hei hi pawisaa an hralthna ah chuan ` nuai 725 lai kut hnathawkute kutah a lo lut ve tawh a ni. Kan leilet te hi kan ngai pawimawh hlawm a, buhthar hi kan ei hmuhna ber, kan eizawnna ber rice a nih si avangin kan tihpun a ngai a ni kan ti a. Hei hi sorkar pawhin a hria a, khawl tha chakna hmanga hei hi nasa zawka tihpun zel tum a ni a, chumi atan chuan custom hiring system hi tunah chuan hmun hrang hrangah 57 lai din a lo ni tawh a. Kumin ah hian Custom hiring centre hi 23-a tihpun leh tum a ni a, chumi piah lamah buh seng khawl te, hlo thlawh khawl te, fu her khawl te, power tiller te, tractor te, water pump set te hi subsidy-a engemaw zat pek leh tum a ni nghe nghe a ni.

NEDP hnuiah hian Agriculture Department hian nuai 2800 leh NEDP hnuiah han ti ila aw.. a dik tho ang chu nuai 28 min rawn pe a, chu chu purun chin nan te kan han hmang a. Hetah hian khaw 35-ah hectare 86.72 -a zauvah hian loneitu 221 ten tunah hian purun hi an ching chhin ve a, qntl engzatnge kan thar dawn tih kan chiang lo a, an la seng lo a, qntl 1600 aia tlem hi chu thar lo turah kan in beisei a ni.

Agriculture link road nichina pawisa min rawn pek kan han sawi ang khan Agriculture link road atan hian nuai 2600 lai Agriculture Department-ah hian kan nei a. Tender pawh koh fel vek tawh a ni a, heta tang hian km 416 laih kan in beisei a. Amaherawhchu nichina member zahawm tak ten in rawn sawi ang khan km 1 ah ` 5,00,000/- a ni a, a beitham viau a. Hei hi kawng tha ah chuan JCB te, 407 te chu kal thei mai tura kan laih theih pawh kan in beisei a, tin kawng awm sa a min avang te-a kal theih loh khatiang kha km 100 siam theih kan in beisei a, chutah chuan ` nuai 416 kan nei bawk a, chu chu kan siam deuh vek tawh a, tunah hian siam lohna bial district chu a la awm zeuh zeuh a. Tin, boulder all weather road-a siam hi kan duh a, amaherawhchu tun hunah mai hi chuan kan la siam thei lo chungin boulder, fur laia kal theih lohna zual lai lai te phahin hemi atan hian nuai 470 kan dah a, km 94 lai siam theih kan in beisei a ni.

Heng link road te avang hian khaw chhak lam sakawte kan ramah (khaw chhak lamah pawh) Khawhai tlang dungah pawh hmuh tur an awm ta lo hi a vanneithlak kan ti khawp a ni. Nichina kan ngaihthlak tawh ang khan rice mill hi hetianga tan kan han lak tak tak chuan kan neih ve a dik a ni kan ti a, Kolasib district-ah nuai 80 hemi siam nan hian dah a ni a, private entrepreneur te nena tang ho a din tum a ni nghe nghe a ni. NLUP hi kumin atan hian (kan project pangngai kha chu kum 5 atan a ni a), a tawp tawh a, amaherawhchu khami ah khan 3rd instalment, 4th instalment tih te la pek loh kan neih hlawm avangin kan la chhunzawm zel a, chutih chhung chuan kumin atan pawh hian crore 15 a thar hlak dah leh tum a ni nghe nghe a ni. Kuminah hian tun kan current financial year ah hian NLUP avang hian chhungkaw tam tak dinhmun nghelnghta in siam an awm laiin duhthusam ang zat chuan a vai hi chuan kan hlawhtling hran lo a ni tih hi kan sawi duh hram bawk a ni.

Tichuan RKVY te hi a pawimawh khawp mai a, heng hi kan department hrang hrang line department-te kutah dah thin a ni a. Kumin ah hian vaibelchhe 19 leh nuai 5 leh sing 6 kan hmu a ni. Tichuan National Food Security Mission (NFSM) an tih te hi tunah hian kan kal tan mek a, hengte hi buh chin dan inzirtir na te, tuikhuah siam na tur te, pipe leina tur te, tlhai venhimna chi hrang hrang leina te, buh leh be leh vaimim a bika enkawlna te an ni a, hengah hian central atangin ` nuai 112 kan hmuh tawh a; tin, state-in min pek tur zawng zawng pawh min pe vek tawh a ni. National Mission for Sustainable Agriculture tih hi RAD kan ti a, soil health management te leh PKVY te hemi hnuaih hian kalpui mek a ni a. Chutiang chuan lei hi engnge ni a dinhmun tih te, a lei thur dan te an test a, report te pawh an pe thin a. Tichuan PKVY hnuaih hian organic farming kalpui tura ruahman mek a ni nghe nghe a ni.

National mission for oil seed and oil palm hi han sawi leh lawk ila, hemi hnuaih hian kuminah hian 1679 hectare-a zau ah oil palm chin belh a ni a. He scheme hnuaih hian oil palm chin dan zirtir te, tuikhuah siam leh a chi hrang hrang kha kan nei a, nichina ka sawi oil palm kawng bik hi NEDP atanga link road kan laih loh ah khan 45km lai kuminah hian kan lai nghe nghe a ni. Mission organic chain development for

North Eastern region tih nichina MLA zahawm tak ten in sawi tawh ang kha tunhnai mai khan central sorkarin India hmarchhak state ten organic farming hi hmasawnna turin rawn duan an nei a, chu chu kum thum tan a ni a, thlai chi pariat rawn thlan a ni a. Hmarchate te , aieng te, sawhthing te, Mizo hmarcha te, bean, behliang, bekang te, lakhuihthei, sapthei te hi kan department-ah chuan tih tur a ni a. Hmarchate hi chu Horticulture Department lam chan te a ni mah mah maithei e, heta tan hian ` 5,09,67/- lakhs ruahman a ni a, chumi zing atang chuan ` 1882.43/- kan hmu tawh a hei hi central sorkar tum vek tur a ni.

Chubakah Research & Extension (R&E) tih hi tawi te in ka'n sawi ang a, hemi normal plan fund atan chuan ` 20 lakhs tunah hian dah a ni a, Centrally sponsored scheme hnuiaia kan tih deuh vek a ni a. Hemi ` 20 lakhs atang hian Directorate te, Integrated Training Centre Hnahthial ami te, KVK pasarih te, Agriculture farm leh Chemphai,Bilkhawthlir ami te enkawl nan hman a ni a. Hnahthial ITC-ah hian kum tin thalai hna nei lo mi 25 – 30 basic agriculture course training tir thin an ni. KVK awmna hmun theuh kha chu sawi ta lo mai ila, heng ah hian thil tha tak tak an zir chhuak a, research an bei a.

Pu Speaker, Home Department-ah hian kal ta ila. Police mimal chhawr tih te kha an han sawi ri a, tunhma sorkar lakah kha chuan tun hunah hian nasa takin kan police te hi an in siamtha a, a chhawrtu nih bik pawh hi an zak tawh niin ka hria, chutiang chu an dinhmun a ni a, a lawmawm kan ti khawp mai. Kum 2016-2017 chhung hian law & order thil ah hian harsatna neuh neuh awm thin mahse kan police chak tak te avangin chinfel zel a ni a. Dan leh thu pek kenkawhna ah hian harsa lutuk kan tawk lova. Amaherawhchu, a kalphung hriat tawk loh na avang Lunglei Judicial quarter leh Court building te leh Saiha-a PS hmun beih a ni a, hei hi a pawi khawp mai a. Kan police ten hna an thawh that avanga misual an han man te khawtlang thinrim laiin an man mai thin si a, khang mi te kha kan hmu ve duh e tih mai mai a mipui Dan hre tawk lo te pawngpawrh pung khawm in heng buaina te hi an siam a ni a, a pawi kan ti khawp mai a. Heng mi te hi Dan anga man an ni a, Dan anga hrem tura dah an ni hlawm a ni.

Tichuan, nichina kan ngaihthlak tak ang khan HPCD te nen hian tum thum inbiakna neih a ni tawh a. Zokhawthiang dai a an lo lambun naa kan police silai an lak zawng zawng te pawh kha tunah hian an rawn theh kir leh vek tawh a. Tichuan hun reilo te ah remna tluantling nei tura inbiakna hi hmawr bawk theih kan in beisei tawh a ni.

Sorkar phalloh thil man hi a tam khawp mai a, kan sawi seng lo ang a. Khawvel sorkar pahnih kar cheh a state awm kan nih avangin hel ho leh smuggler te tan Mizoram hi khan remchang tak a ni a. Chuvangin kan police te leh a vengtu te NASA takin an alert a, an in ring lawk a, chumi a nih avang chuan kum dang ai hian kuminah hi chuan ralthuam leh hetiang hi man kan nei tlem zawk a ni.

Traffic chungchang hi han sawi ka duh a, Aizawl khawpui in harsatna kan tawh lian tak hi chu kan motor tawt lutuk hi a ni a, kan kawng te pawh hi a zim chhe bik lova. Amaherawhchu, motor kawngpui sira motor dah vek kan tum hlawm avangin hmun chengker deuh leh hnuaihnung deuh te pawh hi han widening mah ila chutah chuan kan dah khat deuh zel tawh a ni tunah hi chuan. Chuvangin kan sorkar hian kan harsatna traffic jam tikiang tur hian NASA takin hma a la a, khawilai kawng zim lai deuh emaw te, kawng kawi chep lai deuh han tih zauh te in tunah hian hma la in UD & PA lamin hna an thawk mek tih kan hria a. Chutah chuan traffic jam free project, traffic jam free Aizawl tih hi uar taka tih kan tum a ni. Tunah hian chutiang chuan a ruhrel duan deuh ruak a ni tawh a, ni 475 hun kan in pe a mipui te, vawi leh khat-a tih that chi kha a ni lo va chuvangin an in rin lawk na turin mipui te khan garage/motor dah-na kawngpui hrula in nei leh motor nei te chuan an dah vek tur a ni kan ti a. Chutiang chuan NASA takin tan kan la a. Heng te pawh hi mipui hriat ah Radio-ah te, T.V.-ah te, chanchinbu ah te puanzar reng thin a ni a, hemi hun hi kumin December thla ah hian a tawp dawn a, chuvangin hemi hnuah hi chuan Dan hi a tul anga lekkawh tur a nih avang hianin hma hian mipui te hian motor dah na tur nei lo, chhun ah te traffic rush lai bera kawnga lo dah mai mai te an awm thin a, chutianga dah lo tur chuan tun hunah hian kan han in ngen than leh a ni. Kan traffic police te an ti tha thin khawp mai a, kuminah hian inzirtirna road safety awareness te, Sikul-ah te leh motor khalhtu ah te an nei a, chung te avang chu a ni bawk ang a, tun Krismas leh Kumthar ah te pawh khan motor accident kan han awm lo ringawt mai te kha a ropui kan ti a, kan hnathawktu te leh Pathian-in a venpuina a ni tih kan hria

a, kan lawm hle a ni. Kum kal mek chhung khan Dan bawhchhia te chawitir zat hi ` 3,59,50/- lakhs lai a ni nghe nghe a ni.

Ruihhlo do naah hian theihtawpin sorkar-in hma a la a, kan NGO te nen MoU te, Police te leh Excise te nen siam in thawhkhona duhawm tak kan nei a. Chu chu kan chaklohma laiah te, helaia thu kan hriatah te inhrilh tawn zelin tun hunah hian tan kan la tlang thei te hi a lawmawm kan ti khawp mai a. Chutianga sual do tur leh hetiang ang bei tur hian a mihring te pawh kan tam a ngai a. Chuvangin, VDP thi tawp te pawh kha tunah hian tuai thar leh VDP te chher thar lehna atan sorkarin cheng nuai 30 min pe a, Police Department-ah kan hlan a. Anni chuan theihtawp an chhuah a, VDP tha zual 11 te hnenah `13000/- an pe a, a pangngai 270 te hnenah `6000/- theuh an pe tawh a. Chubakah chuan hei hian rah tha tak a chhuah niin kan hria a, VDP din thar leh te an lo awm zel a, tunah hian unit 275 te hnenah `5606/- theuh pek leh tum a ni tih kha kan sawi leh duh a ni.

Chutiang chuan Police Department-ah ruihhlo do bikna atan hian `40 lakhs kan pe bawk a. Tin, Excise Department-ah hian `30 lakhs kan pe a; tin, Central YMA-ah, khawtinah tan an lo lak ve theih nan `30 lakhs pek a ni bawk a ni.

Chutichuan Bru repatriation hi kum 2010 atang khan kum 7 tih a ni tawh a. Chutah chuan chhungkua 1622 lai Mizoramah seng luh leh tawh an ni. Tunah hian Tuikuk ralstan Tripura-a awm te hian Supreme Court-ah writ petition an thehluh avangin Supreme Court chuan Tuikuk laklet hna hi lo chawlhsan turin min ti a, kan chawlhsan ta a ni.

Sainik Sikul kha nichin khan kan ngaithla tawh a, hei hi a lawmawm khawp mai a. Kan Chief Minister hmalakna liau liau a ni a, a ropui a ni. State sorkar leh Ministry of Defence, Govt. of India chuan 13.4.2004 khan inremna thuthlung an ziak a. 2017-2018 academic session class VI atanga hawn tan tum a ni a, tunah hian cadet 60 lak tur a ni a, kan state ta a nih avangin zirlai 40 te chu

Mizoram tana hauh bik a ni a. Kuminah phei chuan a vai hian kan nei thei dawn em aw tih te engemaw ri ret ret te chu a awm a ni. Helaiah hian a lut duh an tam ve viau mai, application thehlut pawh. Tichuan, 60% hi zawh tawh a ni a, he sikul tan hma hian a vaia zawh fel tum a ni.

Kelpal thubuai hi a ho viau na a han sawi mai mai ka'n duh chu khatihlai sorkara supply order an pek dan dik loh avang khan tunah hian sorkarin '605370/- lakhs kan ba ta ringawt mai a. Court-in 'hei hi pe tawh rawh u', min ti si a, chutiang a nih tawh chuan out of court settlement kal pui a nih a, a supply tute nen hian inbiain '450 lakhs -a inremsiamna kan nei thei a, hei hi kan pe thei mai dawn niin kan hria a ni.

Central sorkar-in silai chungchang hi fel fai zawka ken kawh a nih theih nan National Data Base of Arm licence a siam a. He date base-ah hian silai neitu leh silai chungchang upload vek tur a ni a, data base-ah hian, an fimkhur viau tawh mai a. Silai licence hi Mizoram-ah hian a lo tam em em tawh mai a, 153555 lai a lo awm tawh a. Heng hi lei vek a nih leh nih loh chu ka hre lova. Chutah chuan 15109 hi data base-ah hian thun tawh a ni. Central sorkar hian Arm Rules hi 2016 khan a duang thar a. Chutah chuan .22 Airgun tih te, .17 Airgun tih te pawh hi Sava te kahhlum theih vek a nih avangin heng ho te pawh hi licence neih vek tur a ni. Licence nei lo va an hmang a nih chuan Arms Act-a hrem theih an ni dawn a ni.

Tin, Aizawl khawpuiah hian CCTV Project a bika ruahman a ni a. Hei hi central sorkar in min tum sak vek a ni a, hemi sum atang hian project maintenance –na atana sum ngai te pawh tunah hian dah a ni a, nuai 1265 lai tunah hian hman tur leh hman mek a ni a, hman tawh a ni a. Aizawl khawpui chhungah hmun hrang hrang 33-ah bun a ni a, camera te dah a ni a. Aizawl SP room atang hian control room a awm a, eng lai pawhin chung lai zawng zawng chu a hmuh theih vek a ni. Control room tenau zawk Aizawl P.S. hrang hrangah hian dah a ni a. Tin, a project-ah pawh te lve miah lo, a thawktute thahnemngaihna avangin traffic police control room siam sak a ni nghe a ni. Hnathawktute hian kum 4 an maintain dawn a ni.

Tichuan, kan Police te hian sorkar sum bawm rawn zen kher lovin hma an lo la ve a, Police 980 te hian Group Insurance Scheme hnuiah '4107389/- lai group insurance policy neitute hnenah hian pek a lo ni tawh a.

Tin, SBI nen Police Department hian MoU te ziakin SBI Salary Package Scheme atang hian an lo siam a. Chutiang chu SBI -a hlawh la ten accident an lo tawh a an lo thih chuan cheng nuai 8-10 thleng an dawng thei dawn a. Tin, thlawhna accident-ah an lo tel chuan cheng nuai 5 -25 thleng an dawng thei dawn a. Tin, overdraft loan te interest rate hniam zawka an lak theihna turin ruahmanna an lo siam a ni.

Kan Police te hi training reng ngai an ni a. Hei hi kan sorkar-in a hria a. A tira budget-a min pek mai bakah cheng nuai 15 dang min pek belh leh a, chu chu mi 1700 te hnenah tum 82 zet training conduct a ni leh nghe nghe a ni.

Tunah hian Mizoram Police te leh FIFA / MFA te chuan Football zirna tur hmun bik, Centre of Excellence din turin MoU an ziak a, a hmun atan chuan 3rd MAP hi thlan a ni a. Hei hi Police te tan hriselna leh sports-a hma kan sawn zel theihna tur atana buaisaih a ni.

Forensic laboratories hi sorkarin justice delivery system hi a ngaihpawimawh em avangin Directorate tharah a siam a. Chu a siamna hnuiah chuan changtlung zawka hna thawh mek a ni a. Tichuan tunlai technology changkang ber, sang ber DNA thlengin kan state-ah hian a tih ve theih ta a, lawmawm kan ti khawp mai a. India ram state te leh U.T. 12 lai maiah hian DNA hi anmahni state-ah an la ti theilo a ni. Tichuan, FSL hian misual kutzia (finger print) 5600 tunah hian an computerized vek tawh a. Heng hi misual man chhuah nan a pawimawh khawp mai a, forensic thiamna tello chuan mi kan man chhuak thei meuh tawh lo a ni.

Chutiang a nih lai chuan thil pawi em em, kumkhuaa reh thei tawhlo tur chu Rev. Chanchinmawia thihna chungchangah khan Police Officer te pawh an awm ve reng a, khatianga Tuboh te, Chemte te lo silfai vek kha a pawi kumkhua dawn ta a ni. Mi ringhlel duh an awm a nih chuan kumkhua hian khatih lai sorkar

khan rinhleh an kai phah dawn a ni, thil pawi tak a ni. Chuvangin tun hnu ah chuan thihna te, inrawkna te engemaw a awm chuan khatianga an kuthnu lang thei tur anga kha mipui vantlang hian hre vek ila, tuman kawih lovin kan police te an thlen hma loh chuan khang kha khawih lova dah tawh tur a ni.

Tin, Fire and Emergency hi tunah hi chuan kan changtlung sawt viau va, hmun hrang hrangah kan inzar pharh chho zel a ni. Tunah hian Kolasib, Mamit, Serchhip -ah te building tha tak kan sa mek a, kumin chhung hian zawh theih ngei kan in beisei a ni. Hanthawktute pawh kan lak belh a pasarih tunah hian Guwahati-ah an training mek a ni.

Mizoram Home Guard hi tunah centralin engemaw zat lak min phalsak a a chanve an rawn tum tur a ni a, mahse kan la la full thei lova. Hmanni deuhah khan Employment kal tlangin advertisement chhuah a ni a, mi 48 lak an ni a. Heng lak thar te hi Serchhip-ah leh Mamit Jail hawn thar ah khan dah an ni tawh a ni. Mizoram Home Guards Volunteer te hmun pawimawh tak tak ah duty-na an nei a , FCI godown / kudam-ah te leh company te pawhin an duh chuan an hire thei a ni man chawiin. Kumin chhung hian Home Department atang hian army 165 lak an ni a, Navy 17 lai an ni ve nghe nghe a ni.

Tuna kan sawi ang khan District jail pahnih hi hawn thar a ni tawh a, Saitual-ah hian 13th Finance Commission hnuaiah khan sak a ni bawk a, mahse tihtawp a nih avangin kan zo hman lova, state sumin zawhna turin tender koh mek a ni.

Tin, NLCPR atang hian separate woman jail Aizawl-ah sak a ni a, nuai 1400 lai kan hmang a, tunah khuan nasa taka sak tawh a ni. Tunah hian MLAPC Act kan hman leh Police te, Excise Police te efficient avangin Jail -ah tang an tam zel a, Jail 9-ah hian nikhatah mi 1130 awm ang vela chhut a ni a, chu chu thlakhata an ei ringawt hi cheng nuai 25 atang 30 vel an ei ral a ni. Kum khatah chuan nuai 300 vel hi chu khel lovin an ei a ngai ta a ni. Jail zawng zawngah Video Conference neih theih tura ruahman a ni nghe nghe a ni. Kha kha ni maisela Pu Speaker, ka demand nos.:-

7 Excise & Narcotics 31,40,01,000

16 Home 5,78,30,09,000

31	Agriculture	1,82,52,71,000
38	Rural Development	3,64,11,08,000
	Total	11,56,33,89,000

Heng zawng zawng hi House min pass pui turin ka sawm a che u.

S P E A K E R : Pu R.Lalzirlian a demand nos. 7,16,31,38 te tan 2017-2018-a pawisa hman tur a zavaia belkhawm `11,56,33,89,000 chu pass a rawn dil a, remti zawngin ‘remti’ ti rawh ule. (MEMBERS : Remti) House in lungrial takin kan pass pui e.

Tunah chuan Pu PC Lalthanliana kan lo sawm ang a, pass te pawh rawn dil nghal sela, i lo sawm ang.

Pu P.C.LALTHANLIANA,MINISTER : Pu Speaker, ka lawm e. Ka hmaa wind up tuin an zighthna te ziaka chhan mai te kha an ti tawh a, mahse Zoram mipui hriatin zighthna an siam a anmahni chauh hriata chhan kha chu ka duh vak lova, zighthna zawng zawng Zoram mipuiin an hre si a. Chuvangin chhan hram hram kha tha in ka hria a ni.

Kan hmalakna hi sawi tur ka ngah khawp mai a, kan Department officers te leh thawktute hnathawh hi sawi tham a awm a. Ka Department chan zawng zawnaga officers leh staff te chungah lawmthu ka sawi duh a.

A hmasa in member zahawm tak tak te ka demand in sawi leh inthahnemngaihna ah lawmthu ka sawi a.

A hmasa ber in LAD-ah tan ila, LAD ah hian sawitu tam tak ten VC lawmman sang zawk leh thuneihna sang zawk te an sawi a, heng hi a tul leh a hun awmah hian kan sorkarin a tul angin a en zel a. State Finance Commission-in sum min pek leh 13th Finance Commission-a sum kan lo dawn tawh te member zahawm tak ten VC-a a luh dan an han sawi a. 13th Finance Commission atanga sum kan hmuu pawhin Local Body te sum tur hi an account-ah direct-a thun tur a ni a, Finance Department hian keini kal tlangin an ti thin a. An tih khawtlai phei chuan penalty Finance Department hian an chawi thin a ni. Chutiang chu a guide line a nih avangin VC account-ah khan direct-in ka va dah tawp a, cheng khat pawh kan khawihpui thei lo a ni. Amaherawhchu

inhriatthiamna in kan member-in a sawi ang khan an account-a pawisa a luh tawh si chuan hnathawk tha duhlo VCP emaw, kawhmawhbawl an lo awm khan, an draw theihna tur khan Bank lamah an hnathawh dan a zira slip kan rawn ziah chiah, ‘lo draw tir rawh u’, kan ti ve thung a. Chutiang chuan a tha zawk tur ang khan department te hian kan kalpui a ni. Dan ang thlap in an account-ah a full in hna an thawh hma in Local Body, V/C kan tih teah hian sum lut tur a ni tlat a ni. Tin, tunah hian kan State Finance Commission in a vawikhatna atan a rawtna angin kan sorkarin V/C hnenah pek turin cheng vaibelchhe 6 leh nuaih 80 leh 14000 min pe a. Tunah hian Treasury-ah kan draw tep tawh a. Hei pawh hi kan tih dan ang khan Local Body, V/C-ah, an account-ah a lut dawn a. Nichina member zahawm tak ten an sawi ang khan he pawisa hi kan lo tih dan thin in population base-a sem a ni. Amaherawhchu 2011 census kha State Finance Commission-in guideline-a hmang tura min tih lain 2011 census-ah khan khaw tin kha a khaw wise-a village population census kha a chian tawk loh avangin LAD hian 2013-14-ah khan baseline survey khaw tinah kan lo nei a. Chumi base chuan vawiinah chuan kan kal rih dawn a ni. A tul angin engemaw fello a awm a nih chuan kan la en zel ang tih te kha ka sawi duh a.

Tin, Park Recreation kan tih ang chi te, ni e, a pawimawh a ni. Term hmasaah khan kan hotute duhsakna in LAD ka enkawl a. Hmun 9 deuh thaw-ah Park hi kan hawng a ni. Pathian zarah kan tluang a, ram te kan hmu thei a. Vawiinah Aizawl khawpui hnai takah sawn kan han bei a. Hmanniah zawhnaah ka sawi tawh a. Saw phei saw chu tuna kan thawh lai atang hian YMA kan pun loh hi chuan Hlimen V/C te kan pun loh chuan duh aiin mi an tam mah mah a, hnathawh lai a ni a. Chutiang chuan a ni a, kan hmang tangkai hle in kan ring a. Tin, Mamit khu district a ni a. District capital-ah khuan hetiang Park hi neih ve an duh na an MLA, Minister zahawm tak pawh in a sawi zing a. Tun kumah hian bul kan tan ang a. Park te hi vawi leh khat, thawk leh khata tih thut theih leh changtlun theih a ni lo va. Zawi zawi a tih changtlun a ni ang a. Nuai 40,50,60 vel chu bul tan nan kan dah nghe nghe a ni.

Tichuan, LAD-ah pawisa tam zawk, heng minor works thawh nan te hian awm thei sela kan va ti ve, an ti a. 2016-17-ah khan capital expenditure atan khan, minor work tihna atan khan vaibelchhe 20 NEDP hnuai atangin min pe a. Khawvel awm tirh atangin LAD-ah minor works-a pawisa neih tam ber a ni, a lawmawm em em a ni. Tuna

kan budget-a a lan dan hi chuan nikum aia tam vaibelchhe 30 min han dah sak phawt chu a ni a. Mahse hei aia tam pawh hi kan hotute sawi atang khan min pek belh duh mai awm mang e tihna te kan nei a. Chutiang chu kan dinhmun a ni a.

Tin, hemi State Finance Commission atanga V/C te tana sum, nikumah cheng vaibelchhe 6 leh nuai 80 leh 14000 min pek laiin tun kuma kan hmuh tur Mizoram Finance Commission in min ruahman sak, grant-in-aid a pek tura min ruahman sak hi nuai 1626.94 a ni a. Nikum aia a let in kan V/C a lut tur hi a tam dawn a ni. Amaherawhchu heng hi kan state revenue kan hmuh atanga state sorkarin min pek tur te a nih thin avangin, kan revenue beisei ang kan hmuh loh palhah te danglam thei a ni tih kha kan hriat a tha a. He House kaltlanga ka'n sawi ve duh hrim hrim chu Serchhip bazaar khian High Mast an nei thin a, thli in a ti chhia a, rei tak an sawi thin a. Amaherawhchu vawiinah chuan High Mast tha tak, Serchhip Damdawi In, khilai bazaar hmun pawimawh tak maia an neih thin, rei tak an neih loh kha nei leh turin nuai 11 leh 5000, bialtu kan Chief Minister hmalakna leh duhsakna te pawhin a ni ang chu an nei thei dawn ta a. Sanction te pawh tih fel a ni tih kha kan sawilang ve hrim hrim duh a ni.

Helaia ramri buai kan tih te, V/C thar pek tul kan han tih ang te kha chu V/C thar hi danah awm chiah lo mahsela V/C General Election kan neih dawnah pek thar tur te hi ngaihtuah thin a ni a. 2018-ah kan han sorkar leh ang a, 2019 V/C inthlan dawnah khangte kha chu kan la ngaihtuah turah ngai ila, a tha in ka ring a. Tin, ramri buai te pawh hi official-a fel taka DLAO kaltlanga ziaka thlen ni sela. A theih chin chin hi kan chingfel thin a. Amaherawhchu chinfel har tak a ni. Ramri buai lam ai mahin a mipui lam rilruah hian a buai tel, a khuaah hian a buai tel thin a. Chu chu kan harsatna pakhat a ni. Khang kha a tlangpui a an han sawi leh kan sawibelh thar duh ni sela, LAD atan chuan tawk mai sela, Pu Speaker.

Social Welfare-ah hian lawmthu te pawh House kaltlanga han sawi hi tha in ka hria a kan hotute hnenah. ICDS hi strengthening a ngai a, tuai thar leh tih chak thar a ngai a. Central sorkar pawh in post 91 lai mai create a lak min phalsak a ni. Amaherawhchu khang kha duh ang duak duakin vawikhatah a lak theih lo va. Amaherawhchu kan sum harsatna te awm reng mahse, kan hotuten min duhsak a, ‘post 57 heta tang hian la phawt ila’, an ti a, min han lak fel sak a. Heng te hi a lawmawm em

em a. Social Welfare Department thawktute pawh hi kan sorkar chungah an lawm in ka hria a. Chu chu he House kaltlangin kan hotute hnenah pawh kan thlen ve ni sela.

Tin, kan sawi tam berah khan Anganwadi hi a tha a, kan chhawr tangkai a. Tih changtlun emaw a building te, ama Anganwadi kalphung hrim hrim tih te a ni a. Tunah hi chuan worker-ah pawh Matric pass chin tih a lo ni ta a. Tin, chumai bakah India sorkar pawhin a ngai pawimawh a. Khatianga Anganwadi-a kum 6 a sikul kal mai tur te, sikul an va kal hunah pawh an buai loh na tur khan zirtirna tha pek tel hi an duh a. Chuvang chuan Early Childhood Care & Education (ECC) kan ti a. Chutiang tur chuan hman deuh mai khan khatiang bik thiam tur kha mi 27, kan project 27-a pakhat zel awm turin kan la fel a. Chung chuan central-in curriculum a siam ang khan, naupang kum 6 hma lamah pawh khan Anganwadi worker te training in, tha takin zirtirna an pe dawn a ni tih ka'n sawi duh a.

Tin, rualbanlo te lamah thahnem kan ngai a. A dik a, an duhsak awm a ni. Amaherawhchu vawiinah hian kan theih ang tawk bak hi han tih vak dan hi a harsa khawp mai a, kan duhsak lo ni lo in. Hei hi kan state pawh in a ngai pawimawh a, an pual liau liau atan PWD (Person with Disability) te Commissioner Office te pawh an hawng a. Chuta Commissioner lakna tur RR kan tih ang te pawh sorkarin a buatsaih a. A peih fel tawh a, Gazette mai theih tura ruahman a ni tawh a. Reiloteah Commissioner puitling te pawh kan nei ang a. Chutah chuan a guideline ang in Search Committee a awm ang a. Search Committee-a lo lut zawng zawng chu an han ti ang a, Selection Committee in an ti leh ang a. Chutiang chuan Commissioner, PWD pawh hi kan nei thuai turah kan ngai a ni.

Tin, article 275(1) hnuiah hian India Consolidated Fund atangin tribal mipuite hamthatna tam tak a awm a. Chung atan chuan central sorkarin Social Welfare Department kaltlang hian min pe thin a. Chunga kan hnathawh zawng zawng chu vawiinah hian sawi dawn ila, kan sawi seng lovang a. Kan bialah, chumi khamiah PMRS te pawh in ti a, kan va duh ve kan ti a. Ni e, hei hi kan hmang tangkai khawp a. Tunah hi chuan article 275(1) pawisa bik hman dan tur hi central-in duh dan thar a nei tawh a. State level-ah Chief Minister kaihhruaina hnuiah Committee a din a. Chumi hnuiah Chief Secretary kaihhruaina hnuiah Executive Committee a din leh a. Chutiang chuan kha article-a sum lo kal tur ang ang kha department, a concern department te ko khawm

in engnge kan mamawh, engtinngé kan tih ang tih ang chi a ngaihtuahnaa he article 275 hi tunah chuan kalpui a ni a.

Nikum pawisa ah pawh khan Social Welfare department ngawt kha a nodal kan ni nangin kan thu tawh lo va, entirnan han sawi ta ila Education department-ah ringawt pawh hian hemi article atanga kan hmu cheng nuai 2003 atang hian cheng nuai 636.74 kan pe dawn a ni. Tah chuan hostel te a tulna hmun ah te an sa ang a, khatiang chi kha a ni dawn a.

Tin, Soil department-ah hian cheng nuai 24.80 hi District pawimawh ah chuan soil testing laboratory tha kan neih theih nan Aizawl, Lunglei leh Kolasib ah tal hi chuan neih ve ni se kan ti a, Soil Department-ah hian kan pe dawn a ni.

Tin, Health Department-ah hian engemaw infrastructure an mamawhna deuh building han tih belh ngai ang chi, an mamawh ang chi an han tih nan hian nuai 157.08 kan pe dawn a. Tin, medical equipment hmanrua leina turin nuai 116.53 kan pe dawn a, a vaiin Health-ah pawh hian nuai 273.61 hi kan pek tur a ni a.

Horticulture-ah Dragon fruit tam zawk tharchhuah a nih theih nan a hmalak leh off-season cabbage kan tih zikhluum fur lai pawha thar chhuah a hmalak a nih theih nan nuai 170.85 pek an ni dawn a.

Tin, Vety Department-ah pawh hian an building mamawh ang sak that nan leh a tul zual ah nuai 40 kan pe dawn a. Sericulture ho hian Commercialship warm rearer te an tanpui theihna turin nuai 94.71 kan pe dawn bawk a. Chutiang chuan Department hrang hrangah Committee hian an mamawh angin article 275 clause (i) atanga sum lokal hi a pe thin a ni.

Tin, rualbanlo te tan a bika building lama hetiang wheelchair pawh kal theih na tur han tih te ang chi hi SIPDA atangin kan hmu tawh thin a, tunah pawh hian nuai engemaw zat kan zu dil a. Khu kan Secretariat Office-a Lift te khu hemi scheme hnuai atanga Social Welfare-in rualbanlo te, khatiang tan pawh ramp han tih leh vek a harsat si avangin Lift-a an kal theih nan khung te khu kan tih a ni tih te pawh kha House kaltlang hian ka'n sawi ve duh hrim hrim a. Chutiang chuan office pawimawh zual zualah ramp an tih theihna turin pawisa

kan sem thin a, amaherawhchu a tlem tham a khatiang kha a ni, hetiang kawngah pawh hian hma kan la mek zel a ni.

Tin, eng engemaw department-in kan han sem thin ang bengdar kan han tih te, wheelchair tih te kha Pu Speaker, a tangkai em em a. Amaherawhchu tunah hi chuan min pe thin tu NIAOH-khan department-ah pe tawh lovin direct-in hetah NGO ah a pe tawh a, a awm reng tho a rualbanlo tan khan. Keini Social Welfare Department kha a nodal kan ni ta lo mai a ni. SCERT -ah office an nei a. Tin, Spastic Society ang te pawh tiang khan Certificate kan neih phawt kha chuan kawng a awm thin a. Tin, bengdar te pawh hi sem tawh loh a tha a, a chhan chu tarmit ang deuh a nia, a mil kha a ngai tawh a tunlaiah chuan. ₹350 a tir ah pawh a hmang a, a tha tak tak vak lo va ni in ti mai teh ang, a changkang tawh lova Chuvangin beng te hi enthlap a, a mamawh anga a mil inpek thin a ni a, a pawimawh khawp mai.

Tin, wheelchair te pawh department-in a tul zualpui a kan tih theih loh hi a buaithlak kan ti a, kan bank interest Finance-in min han pek ah te pawh tlem azawng chu wheelchair leh bengdar, amaherawhchu chu pawh chu a diltu kha doctor-ah a kal ang a, engkim doctor-in a en ang. Pali /nga vel a nia, ka sawi rual rual hian a zo tawh mai in ka hria a. Ka sawi avang khan a awm e rawn tih huang tur kha chu a awm lo maithei a. Pali/nga vel te hi chu han tih ve hram tum ila kan ti a, kan lei kha chu a ni a. Wheelchair hi chu ala awm em ka hre lova, keipawhin pahnih khat chu ka pe tawh a. Chutiang chu an hamthatna atana kan hmalakna chu a ni.

Tin, Crèche Centre hi chu state sorkar, Social Welfare Department-in kan enkawl chiah hi a ni lova. Mizoram State Women Advisory Board (MSWAB) ho atang te, Child Welfare Committee atang te hian central sorkar atangin an hmu ve thin a, a worker leh helper hlawh an rawn tum a, kha kha department va ti lovin an out-source a, MHIP ten an lo run a. MHIP-in In an lo nei a, tiang khan a kal ve mai a, chuvang chuan a sak that hi chu keipawh ka bial ah chuan ka fund hi ka pe mai a, tiang khan an repair mai a, an sa tha ve mai a. Heng hi MLA te pawhin kan hriat tlan a pawimawh khawp in ka hria a. Khatiang kha Social Welfare-a a tlangpui ka'n sawi a.

Tin, rualbanlo te duhsakna, rualbanlo te tan NHFDC atang khan hmanah khan loan kan la a nuai 50, kei ngei pawh Delhi-a meeting-a ka kal in, 'in duh zat zat kan pe ang che u', an ti a. Mahse nuai 50 kan han la a, a channelizing bank-ah Rural Bank kan han hmang a, mi kan han select a, kan han ti a, zaithlak khawp in a recovery a tha lo em em a, a dang pawisa tam zawk pawh kan hnukchhuak thei lova, a buaithlak khawp thin a. Khang te kha chu hmang tha in han ti ila chu in duh zat zat kan pe ang che u an tiyh kha a pung kha a tlem bawk lehngthal a, tha deuh tur hi a ni a, keimahni te pawh hi kan inhnawhpinna chen pawh hi a awm ve a. Tin, kan hriat tlan atan maternity benefits programme hi thil thar deuh a ni a. A hma chuan IGMSY an ti a, UPA sorkar lai khan India ramah district 91 an thlanchhuah ah Lawnglai saw min rawn thlang ve a, tah chuan kan pe tawh thin a. Tunah hi chuan a scheme hming hi MBP an rawn ti a, tunah chuan district 8 cover a ni. Tah hian hmeichhia in nau a pakhatna leh a pahnihna a neih ah khan tanpuina ₹6,000 pek theih a ni a, chu chu Health Sub-Centre-ah emaw, Anganwadi worker-ah emaw an in report ang a, tiang khan a kal dan tur kha a awm ve a. Chungte chu he House kaltlang hian mipui ten kan lo aware a kan lo hriat atan te pawh thil tul tak niin ka hria a, a pawimawh in ka hria a. Tin, hmeichhia bik te tan kan thil thar neih deuh House-ah hian ka sawi tawh em ka hre lova. Universal Women Help Line kan ti a, darkar 24 chhung duty, hmeichhia harsatna tawk te tanpui an nih zung zung theihna tura tanpuitu tur hi office te kan hawng a, thawktu fel tak tak te an la tawh a. Mi engemaw zat chu heng hnua atang hian tanpui pawh an ni tawh a. Tin, tunah hian centre kan ti a, hmeichhia kut tuar a ni emaw, sawisak tawk a ni emaw, engemaw khatiang chi te an rawn tlan luh na tur leh lo enkawl na tur ang kha kan ruahman mek bawk a, building te kan buatsaib a. Hmeichhia te tan hian kan sorkar-ah Social Welfare Department hian nasa takin hma ala a ni tih kha kan sawi duh a. Tin, EMRST hi hemi article (D) 75 hnuaiah hian Lunglei leh Serchhip-ah kan nei tawh a, tunah hian Lawnglai-ah leh Chawngte-ah leh Tuipang-ah leh Ngopa-ah bul kan tan mek a, tender a ni a, thawktu tur pawh thlan fel a ni tawh a. Agreement te an han ti ang a, chumi hma chuan central lamin min hmanhmawh pui avangin hna chu an tan tawh a, a ban te pawh a then ah chuan an phun tawh a, tiang chuan a side preparation te pawh an ti a. Heta tan hian sum hi

vaibelchhe 29 hmuh fel sa vek tawh a ni a, heng ah hian school naupang ten a thlawnin lehkha an zir ang a, an ei leh in engkim tum a ni ang a. PMRS kan han nei tur pawh hi a tha em em a ni. Chu chu Pu Speaker, Social Welfare Department-a a tlangpui an rawn sawi ka react paha ka sawi theih ni mai sela, a tawi lam kha chu pawi in ti lo niin ka hria.

Horticulture Departmen-ah hian han kal leh ta ila. Pu Speaker, vawiina ka'n sawi duh pakhat chu a hmasa ber in he ram ah hian Horticultur-a hma kan sawn tak tak na tur chuan sum chu a pawimwh e, farmer te pawh kan pawimawh e, chutih laia pawimawh ber number one pakhat kan House Leader, kan Chief Minister zahawm takin kan sorkar hmasa atanga central-a UPA a sorkar laia Sarat Pawar nen an intlian thatna avanga Horticulture College pek a tiam bawhzuia vawiina a tak ram kan lo thleng ta hi he House ah hian han sawi lan ka duh a. June 2016 nikum ah khan he laiah Session te pawh tan in Central Minister in helaiah lungphum te a rawn phum a. Class chu kan tan tawh a ni Selesih Veterenry College-ah khian. Zirlai 17 an awm a, zirlai 20 awm tur a ni a, state dang quota rawn ti kim lo an awm a. Vice Chancellor hnenah pawh a tir khan zirtirtu leh lecturer ah pawh qualified an awm a nih chuan Mizo te duhsak ni se kan ti a, kawng engkimah ani pawhin theih chen chen ah min duhsak a, phunnawi na tur kan nei lo. A then ah chuan Mizo nula/tlangval kan lo awm si lo a, lak theih an ni lo a.

Tin, helai kan sawi lan duh chu class hi tan kan duh avangin department-a doctorate degree nei kan Horticulture Department-a thawk mek ten tun ah hian an pui bawk a ni, chutiang chuan class te kan tan ta a ni. Tichuan, kan House Leader, kan CM zahawm takin chak zawka a pawm ngei Thenzawl-ah he College hi din a nih thuai a, class te pawh tan a nih theih thuai nan hma a la a, vawiinah chuan hemi atana National Project Construction Corporation Limited (NPCCL)-a thawktu tur ngaihven tu tur te pawhin a hmun an rawn tlawh tawh a. Tichuan, tunah hian Pre-fabricated in classs te, hostel te lo awm a, nakum 2018 a class tan ngei ngei turin an bei a, kan House Leader te ngenna in, chumi tur chuan an inbuatsaih a, chung fabricated sakna tur te chu tunah hian a hmun an ti zawl tan a.

Tin, chumi chung chuan tunah hian a construction tak tak cement concrete-a satu tur te kha an lo thleng ve leh tawh a, chu chu an survey tir a, chumi rual chuan an lo sa mawp mawp bawk ang a, chutiang chuan Horticulture College kan neih tak hi a tak

ram zel a thlen leh zel theih nan chak takin kan House Leader ten hma an la a, kan lawm em em a, hei hi vawiinah han sawi lan hrim hrim a tha in ka hria a ni.

Tichuan Pu Speaker, Horticulture Department hian kan ram tan a thawh hlawk hle a ni. Member zahawm tak te sawi ang khan vawiinah hian kan thar chhuah kan sum deh chhuah punna ber pakhat te pawh hi a ni mai thei a, tute sorkar ah emaw phei chuan CM in a lak chat thin kha a ni a, a pawimawh a, a dik viau a ni. Kan nau ten an chhut dan phei chuan Horticulture Department a kan thar chhuah ringawt passion fruit kan tih ah te, orange ah te, pineapple ah, Cherry ah te, Areca nut te, Banana te, Turmeric, Ginger ah, Chilli, Anthurium, Vegetable, heng bik ah hian 2016 – 2017 khan cheng 4,487 lakh hi Mizoram hian a thar chhuak in a hralth chhuak ah kan ngai a ni. Chutih lai chuan member tam tak ten chutiang khatiang an ti a, a dik khawp mai a, amaherawhchu Horticulture Department hi a process lam ti tur kan ni lo a, a production ringawt siamtu tur kan ni a, kan thuneihna piah lam a va ni tawh a a processing lam kha chu. A production siam turin, Mizoram-a thar chhuah tam tura hma latu Department kha kan ni a, chu chu a kalphung a ni a, mahse chuti chung chuan kan sorkar hian a ngaihtuah a.

Tin, tunah te hi chuan Mizoram-in state pawnal thawn chhuah ang chi kan neih te, kan sum lakluhn te hi, horticulture crop leh fruit item hi a ni deuh vek a ni. Chuvang chuan Horticulture hi Mizoram tan hi chuan a pawimawh tih hi a chiang Hmarchha te, Serthlum te, Iskut te, Flower-ah hei Anthurium kan ti a, Rose kan tih ang te kan thawn chhuak a. Kuhva-ah cheng nuai tam tak, khawthlang lam phei chuan chhungkaw khat in nuai 10 te an la a. Tin, sawhthing hi department hian a hralthna ah hian mawh kan va phur tur chu a ni loveng a. Amaherawhchu Pu Speaker, sawhthing hi tu party emaw sorkar emaw hi in dem theih tak tak niin ka hre lova. Kan MNF unau te an sorkar lai pawh khan a chinna tur nen lam sum an pe a, ‘tihian in han ching ang a, in kawtkai ah cheng sawm in kan rawn la zar zar ang’, an ti a, a hun alo thleng a, a teuh lo hle a ni.

A hrechiangtu vek kan ni. Chuvangin a hralthna lam hi hei tun kum chu kei pawh 18qtls ka ching a. Ka ngaihven ve reng a, a rate hi ka hriat ve dan chuan South India lamah a tlawm a. Khulam ah an thar tam bawk si a; tin, demonitisation avang khan khulaia rawn chho thin ser te pawh khawlaiah tun kum kha a tam lo thei lo va. Vaiho in a

nuai tel rawn khar tur khan pawisa a thih avangin ken tur an nei lo ani. Sawhthing pawh kha a tir takah chuan pawisa a hlawm a rawn ken tur an nei lo. Vairam-ah chuan pawisa thi kha an pawmlo nghal vek si a, chungte avang pawh chu a ni a. Engpawhnise, kan hotuten heng kawngte hi an ngaihtuah mek a ni.

Tin, link road han tih kha a pawimawh a, link road tha tak kan neih loh chuan kan production cost te hi alo sang thin a. Vawiinah chuan bike-a feh te, lirthei-a feh te hi khawi hmun ah pawh kan tihdan emaw tih mai tur a ni ta a. Tunah hian Horticulture department hian NLUP sum kan neih kan hman ban te nen convergence kan ti dawn a. Chutah chuan vaibelchhe 27 kan hotuten link road atan an ruahman a, hei hi NEDP core committee hmasa berah a lut ang a, a guideline fel zawka siamin kuthnathawktute link road laih nan khan kan hmang leh thei dawn a ni a.

A ropui hle in ka hria a, vawiinah NLUP kan han ti a, kan thar chhuah te pawh hi alo tam ta em em a, a lawmawm a, hlawhtlinna tam tak kan hmu a ni. Amaherawhchu hetih lai hian tam zawk, awmze nei zawka kan kal hi a tha in ka hria a. Keini department te pawhin kan duh a. NLUP avang te pawh a ni ang a, a lo nei tawh sa te kha kan han pui a, khatiang khan hlawhtlinna tam zawk a lo kal a. Mizoram-ah hian kuthnathawktute hi kan sorkar chungah hian Pu Speaker, an lawm tak zet in ka hria a ni. 2013 inthlan dawn ah khan ‘kan sorkar leh a nih chuan NLUP pawh hi kan chhunzawm zel dawn a ni’ kan hotupa in a tia, a mak khawp mai a, kan House Leader-in, ‘ka ti ang’, a tih hi chu a ti mai tur angin mi in an ring mai a ni.

Tute emaw in an han sawi hi chu ngaihtuah chian a ngai a ni tih hi a ni mai a, khatih lai te pawh khan nuaikhat tho a ni. Khatih lai khan party thenkhat ten SEDP-ah nuaithum thum an ti a, Chakma Council kan inthlan lai te pawhin an rawn ti a, mahse ‘mumanga nuaithum neih ai chuan a taka nuaikhat neih hi a hlu zawk a ni’, an ti a. Chuvang chuan 2013-ah pawh NLUP chhunzawm turin kan han sorkar leh a. Vawiinah chuan keini NEDP han tih ve te chu ‘Chepa a nih chuan anni chu Sakhi’ an han ti a, mahse Zoram kuthnathawktute hian an tih leh tho tho tur chu mumanga Sakhi sa ei ai chuan a taka Chepa ei kha chu a la hlu fe in ka hria a. Chuvangin NLUP hi kan hlawhtlin pui em em mai a, kan NEDP te nen Horticulture ah te hian a ni.

Tichuan tunah hian Pu Speaker, kan department hotute ngaihtuahna thar ah leh central ministry-a sum min petu lam atang pawhin 2017-18 ah hi chuan thei ah pawh

chi hnih ah chiah kan kal dawn a ni. Nagaland phei chu thei ah pawh pakhat ah chiah an phal sak a, keini hi thei ah chi hnih ah kan kal ang a, Dragon fruit leh Serthlum ah kan kal na dawn a ni. Dragon fruit te pawh hi Taiwan atangin India ramah hian an lalut a. Chuvangin a maka maka tam thar chhuah hi a ngai a. Chuvangin Dragon fruit-ah hian state advance ni ila, kan ti fuh ang a, kan ti ve deuh a. Chutiang chuan kan han ti a, Vawiina kan sawi tel duh a chu kan MLA member zahawm tak tak te hian tun kum thar ah phei hi chuan vaibelchhe riat dawn Dragon fruit ringawt-ah kan nei dawn a. Kan bialah a ti tak tak duh,nichina member tam tak in an sawi Monitoring evaluation hi tih that ni se tih ang khan hetah khaw pakhat ah pakhat in, hetah khaw dangah pahnih in monitor hi a har em em mai a ni. An sawi kha a dik a ni. Chuvang chuan compact area emaw, cluster emaw in kan kal ang a, member tute pawh opposition kan ni emaw, kan bial ah khatianga tui tak taka ti duh kha chhungkaw 10/20 tin litin nga hmun nei an awm phawt chuan khang kha kan hotu, kan DHO division-ah te report a, hemi scheme hnuaiah hian in tih a ngai a ni. A tiak leh a chi te engkim kha chu kan in pe thei dawn. Duhthusam erawh chuan kan in pui vek thei lovang. Chuvang chuan thei ah hian chi hnih ah chiah kan kal dawn 2017-2018 budget ah chuan. Chu chu NEDP-a kan hotu ten nikum atanga min apply tir tawh a ni, kan department ah chuan.

Tichuan vegetable ah hian tomato ah leh off season cabbage ah te kan concentrate dawn a. Off season cabbage kan han tihna kher chu fur lai hian India ram state dangah khung phaiah te khuan zikhlum an thar thei lo. Chuvangin fur lai pawha kan thar theih, a hunlo pawha thar theih ang chi kha a ni ta a, hetah hian kan kal na bawk dawn a. Chutiang chuan kan han kal tak tak ang a, tun ah pawh heti khawpa hlawhtlinna hi kan ramin a hmu tawh e, dukhawp chu awmlo mahse. A chhe lai, a thalo lai, kan induhthawhna lai hi kan sawi tam mai pawh a, a thalai sawi tur hi tam tak a awm ve a ni. Tin, Green House hi protected cultivation an ti a, green house hi kan uar thar a pawimawh a. Kan uar deuh deuh a tul a, chuvangin helam pawh hi hmanni lawk ah kan han tender a, a chhuak tawh a. Engemaw zat chu subsidy-in kan pe leh thei dawn a ni. Bialtu MLA te pawhin tih tak taka khatianga mamawh an awm kha chuan recommend kha pek inthlahrun tur a nilo. I vei lam ami te pawh inthlahrun tur a ni lo. A ti tak tak peih tan hi chuan engkim hi a awm thei a ni. Khatiang khan hmalak kan tum a, chumi a nih avang chuan nikum 2016-2017 RKVY Scheme-a Green House kan neihah phei

chuan Kolasib, Lunglei leh Aizawl district ah hian, thalai te Green House kan pe ang a, tah chuan thalai khan kha Green House kha ava training ang a. Amahin a thar chhuah zawng zawng amahin a hlawkna a tel anga, chutiang chuan season khatah thalai 5 zel kha an ti ang a.

Tichuan a season dangah midang an rawn training ang a, tichuan chung ho kal chhuak te chuan, khatianga Green House hnuiaia awlsam zawka eizawnna leh thianghlim bawk si kha an tih duh chuan Green House te kha tiang khan kan han pe zui ang a. Chutiang chuan a technology kha zuk hriat ve deuh te kha a ngai a. Chuvang chuan RKVY hnuiaia unit 30 kan neih kha, hetiang atan hian hmang ila, kan department hotute nen phei chuan kan sawi ho a. **Khatiang kha kan kal tum dan a ni.**

Tichuan a bikin dragon fruit te kha, a rate chuti khati han tih te kha a awm a. Tin, department nursery tih te a awm a, a dik chiah. Keipawh Horticulture ka chan hlim khan, department kan in kohkhawmah pawh, ‘in hmingchhiatna ber leh mi sawi duhna chu department officer ten nursery te an lo nei ve thin a, heng hi in hmel tibal tute a ni a, fimkhur chu a tha’, kan in ti a. Amaherawhchu kan ramah NLUP avangin thil chi tam tak planting material kan mamawh a ni, NLUP ngei pawhin loan in tute emaw a tih tir hial a ni. Mahse paper nursery hi a tam em em a ni kan ramah hian nursery neitur hian.

Chutih lai chuan department-a thawk thenkhat ten thahnem ngai taka a tui leh a thawktu an lo nih a an tih ve kha awmlo phei se chu, thil dang tam takah hian thil chi tha hi chu kan hmuh ka ring lo, kan enhian ve khan. Chuvang chuan paper nursery chu a tam a, vawiinah chuan NLUP runpui a tawp phei chuan khang ho kha chu paper pawh kha a paper nursery pawh kha a tling pha tawh pawhin ka ringlo. Chutiang chu a tak rama ti lo pawh hi kan tam em em a, khatiang kha a awm ve thin a, inthik nek nek te pawh hi.

Tin, dragon fruit kan tih tirh khan foreign atanga lakkluh a ngai a, chuvang chuan a to a ni. A chi pakhat kha 350 a ni, hei hi tunah chuan Mizoram-ah kan lo titam ve tawh a, open tender-a tih ni se, kan rate hi heti em em chu a ni tawh lo vang kan ti a. Kan han tender a, chumi hnu ah vawi 2 kan tender tawh a, tunah hian kan tender hnuhnung berah chuan ` 100 a ni tawh a ni. Chutiang chuan kan kal ve tawh a. Thil hi

han insawi vel te hi a tam ve a, lehlamah chuan Horti-a thawk na na na an lo ni a, an lo tui ve nazawng te pawh a lo ni ve a, Doctor te pawh an lo tui a in lamah te free clinic te an ti a, khatiang ve tho mai kha a ni a. Engpawhnise khang kha mi chanai va eisak emaw, corruption va tih nan emaw hman erawh chu thil dik a ni hauh lovang tih ka ring a, chutiang chu a ni. Tichuan kan thil thar chhuah hi Pu Speaker,

Pu LALRUATKIMA : Pu Speaker, khawngaihin, khalai dragon fruit chungchang kha nikum July thla khan open tender chhuah a ni a, (khawngaihin min lo hrethiam ula), chutah chuan '100 khan lowest tenderer khan a chhanna kha an la a.

Mahse chumi hnu lawkah chuan August 16, 2016 khan '350 khan lei leh a ni si a, chumi inkar chu a zau viau mai a, kha kha enge a awmzia ber? Engatinge DPAB rate kha kan pending mai chhan kha enge ni , min hrilhfiah thei em kan ti a ni.

Pu P.C. LALTHANLIANA, MINISTER : Pu Speaker, DPAB rate a awm laia tender-a chuti zatin a chhang a tih kha thil inkawkalh deuh ni in ka hria a. Cheng 100-a chhang tur a thar a awm a nih chuan DPAB rate hlui zawk kha chu a nung lova, a thar zawk kha kal mai awm a ni a.

Pu LALRUATKIMA : Pu Speaker, ka sawi fiah lo deuh emaw ni. A chhang hniam ber khan '100 in a chhang a, chutih lai chuan an tih fel hnu ah khan '350 in pek leh a ni a, supply order kha (SPEAKER : Demand sawiho lai te khan sawi ve awm.) Chulai chu, enge ni khalaiah khan ka sawi a, chumi chhanna chu clarification chu a rawn ti a ni.

Pu P.C. LALTHANLIANA, MINISTER : A lawmawm e. Tender hi chu technical thil deuh a ni a, vawiinah fiah fai takin ka clarify thei lo a, chiang lo deuh a clarify ai chuan clarify loh law law a that ka ring a. Member zahawm tak kha a duh hun hunah ka office-ah lo kal sela, a tul leh Department officer-te kan ko ang a, thingpui in pahin la sawiho ila, fiah takin kan hrilh thei turah ka'n ngai a ni.

Pu Speaker, 2017-2018 ah hian hetianga kan kal dan phungte kan han thlak rual khan tum pakhat kan nei a. Chutah chuan district tinah headquarter-ah hian Pack House kan siam ang a, cold chain kan ti a, khatianga thil dah thatna a awm ang a. Tichuan, Aizawl khawpuiah a awm bawk ang a, freezer van kan nei ang a. Tun kum

2016-2017 ah hian freezer van lei nan hian nuai 130 kan nei tawh a, Ministry chuan 9 lei turin min ti a. Amaherawhchu, freezer van khatiang ang chi, a vawt engkim dahthatna, a lian deuh law law lei ni sela, pahnih, pathum te pawh ni sela. Ministry duhdan chiah lo deuha cheng nuai 10 te te a lei ngawt ai chuan, pathum vel lian deuh, tha deuh te lei a. Tichuan Kolasib-a cold chain-a awm, khulaia an thar chhuah an dahte kha an hralth zo lo a nih chuan, cold chain ami hetah phurh chhoh a, khatiang ang khan. Chung ang motor-te pawh chu (Department hian, Farmer Interest Group hi tunah chuan hmun tam takah kan din tawh a), chung ho Farmer Interest Group chuan neitu nihna out source ila. Khatiang khan kan marketing system, keimahni ramchhung pawh hi a vawnthatna nen, awmze nei zawka kalpui dante pawh kan zawng a. Chutiangte chu kan kalphung thar ve deuh turte pawh a ni mai thei a ni. Chu chu vawiinah hian Pu Speaker, a tlangpuiin (tute emaw lo thlen a, tawk lo chungin tih ang deuh khan), tawk mai se tha in ka hria a. Member zahawm tak tak te'n kan Department-ah thahnem in ngaihna a lawmawm ka ti a.

Vawiinah kan officer-te thahnemngaihna, thawhrimna tam tak han tarlan sak loh ka neih te hi a lehlamah chuan a hrehawm ka ti viau a. An thawk nasa a, kan hotute leh staff-te, vawiinah hian an chungah lawmthu ka sawi nawn a ni. Pu Speaker, ka demand te -

Demand No.	Purpose	Amount	Demand For Grants Page No.
1	2	3	4
19	Local Administration Department	57,95,72,000	196-203
29	Social Welfare Department	1,27,27,39,000	346-368
32	Horticulture Department	72,55,18,000	390-397
	TOTAL	2,57,78,29,000	

hi he House zahawm takin min pass sak turin ka rawn dil a ni. Ka lawm e.

SPEAKER : Awle, tunah khan Minister zahawm tak Pu PC. Lalthanliana'n a demand nos. 19, 29, 32 hnuiaia department pathum ten 2017-2018 chhunga an pawisa hman tur a vaia belkhawm vaibelchhe 2,57,78,29,000 chu he House pass pui turin a rawn dil a. Pass remti zawngin 'Remti' ti ru le. ('Remti'). Remti lo kan awm em? Awmllo. Tichuan, heng department pathumten 2017-2018 chhunga pawisa an hman tur, a vaia belkhawm vaibelchhe 2,57,78,29,000 chu he House hian lungrial takin a pass ta a ni.

Pu P.C. LALTHANLIANA, MINISTER : Pu Speaker, ka lawm e.

SPEAKER : Awle, vawiina kan tih tura duan lawk zawng zawng felfai takin, tluang takin kan zo thei ta a. Hengte hi a ropui a, a lawmawm em em a ni. Tichuan, vawiinah chuan kan chawl rih ang a, naktuk Thawhlehni, tahrik ni 28 zing dar 10.30-ah kan kal khawm leh dawn a ni.

The sitting is adjourned (6:00 pm).